

ॐ नमः परमात्मने, श्री महागणपतये नमः श्री गुरुभ्यो नमः,
हरिः ॐ

2 कृष्ण यजुर्वेदीय तैत्तिरीय ब्राह्मणे द्वितीय

Contents

2.1 द्वितीयाष्टके प्रथमः प्रपाठकः - अग्निहोत्रब्राह्मणम्	2
2.2 द्वितीयाष्टके द्वितीयः प्रपाठकः - होतृब्राह्मणम्	18
2.3 द्वितीयाष्टके तृतीयः प्रपाठकः - होतृब्राह्मणशेषः	38
2.4 द्वितीयाष्टके चतुर्थः प्रपाठकः - उपहोमाः	52
2.5 द्वितीयाष्टके पञ्चमः प्रपाठकः - उपहोमशेषः	73
2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च	86
2.7 द्वितीयाष्टके सप्तमः प्रपाठकः - सवा एकाहविशेषः	115

ॐ नमः परमात्मने, श्री महागणपतये नमः श्री गुरुभ्यो नमः, हरिः ॐ

2 कृष्ण यजुर्वेदीय तैत्तिरीय ब्राह्मणे द्वितीयाष्टकं

2.1 द्वितीयाष्टके प्रथमः प्रपाठकः - अग्निहोत्रब्राह्मणम्

2.1.1 अनुवाकं 1 - अग्निहोत्रस्योपोद्धातः

TB 2.1.1.1

अङ्गिरसो वै स॒त्रमा॑सत । तेषां॑ पृश्नि॒र्-घर्म॑धुगा॑सीत् । सर्जी॑षेणा॑जीवत् । तै॒ऽब्रुव॑न् । कस्मै॑ नु
स॒त्रमा॑स्महे । ये॒ऽस्या ओष॑धीर्न॒ ज॒नया॑म् इति॑ । ते दि॒वो वृष्टि॑-मसृजन्त । याव॑न्तः स्तो॒का
अ॒वाप॑द्यन्त । ताव॑न्तीरोष॑धयो ऽजायन्त ॥ ता जा॒ताः पि॒तरो वि॒षेणा॑लिम्पन् १

TB 2.1.1.2

तासां॑ ज॒ग्ध्वा रु॒प्यन्त्यै॑त् । तै॒ऽब्रुव॑न् । क इ॒दमि॒त्थ-म॑क॒रिति॑ । व॒यं भा॑ग॒धेय॑-मिच्छ॑माना इति॑
पि॒तरो॑ऽब्रुवन् । किं॑ वो भा॑ग॒धेय॑मिति॑ । अ॒ग्निहो॑त्र ए॒व नो॑ऽप्य॒स्त्वित्य॑-ब्रुवन् । तेभ्य॑ ए॒तद्-भा॑ग॒धेयं
प्राय॑च्छन् । यद्धु॒त्वा नि॒मार्ष्टि॑ । ततो॑ वै त ओष॑धीर-स्वदयन् ॥ य ए॒वं वेद॑ २

TB 2.1.1.3

स्वद॑न्तेऽस्मा॒ ओष॑धयः । ते व॒थ्समु॒-पावा॑सृजन् । इ॒दं नो॑ ह॒व्यं प्रदा॑प॒येति॑ । सौ॑ऽब्रवी॒द्वरं॑ वृ॒णै
। दश॑ मा॒ रात्री॑र्जा॒तं न दो॑हन् । आ॒सृज्ज॒वं मा॒त्रा सु॒ह च॑रा॒णीति॑ । तस्मा॑द्-व॒थ्सं जा॒तं दश॑
रात्री॑र्न दु॑हन्ति । आ॒सृज्ज॒वं मा॒त्रा सु॒ह च॑रति । वा॒रेवृ॑त॒ऽह्यस्य॑ । तस्मा॑द्-व॒थ्सः स॑ऽसृष्ट॒धयः॑ रु॒द्रो
घातु॑कः () । अति॑ हि स॒न्धां ध॑यति । ३

(अलिम्पन् - वेद - घातुक एकं च) (A1)

2.1.2 अनुवाकं 2 - अग्निहोत्रनिरूपणम्

TB 2.1.2.1

प्रजापति-रग्नि-मंसृजत । तं प्रजा अन्वंसृज्यन्त । तमभाग उपोस्त । सोऽस्य प्रजाभि-रपोक्रामत् । तमवरुधु-समानोऽन्वैत् । तमवरुधुं नाशक्रोत् । स तपो ऽतप्यत । सोऽग्नि-रुपारमुतातापि वै स्य प्रजापतिरिति । स रराटादुदमृष्ट 4

TB 2.1.2.2

तद्-घृतमभवत् । तस्माद्यस्य दक्षिणतः केशा उन्मृष्टाः । तां ज्यैष्ठलक्ष्मीं प्राजापत्येत्याहुः । यद्-रराटादुदमृष्ट । तस्माद्-रराटे केशा न सन्ति । तदग्नौ प्रागृह्णात् । तद्व्यचिकिथ्सत् । जुहवानी(3) मा हौषा(3)मिति । तद्-विचिकिथ्सायै जन्म ॥ य एवं विद्वान् विचिकिथ्सति 5

TB 2.1.2.3

वसीय एव चेतयते ॥ तं वाग्भ्यवद-जुहुधीति । सोऽब्रवीत् । कस्त्वमसीति । स्वैव ते वागित्यब्रवीत् । सोऽजुहोथ-स्वाहेति । तथ्स्वाहाकारस्य जन्म ॥ य एवः स्वाहाकारस्य जन्म वेद । करोति स्वाहाकारेण वीर्यम् ॥ यस्यैवं विदुषः स्वाहाकारेण जुह्वति 6

TB 2.1.2.4

भोगायैवास्य हुतं भवति ॥ तस्या आहुत्यै पुरुष-मसृजत । द्वितीय-मजुहोत् । सोऽश्व-मसृजत । तृतीय-मजुहोत् । स गामसृजत । चतुर्थ-मजुहोत् । सोऽविमसृजत । पञ्चम-मजुहोत् । सोऽजामसृजत 7

TB 2.1.2.5

सौऽग्नि-रं॒बिभेत् । आहु॑तीभिर्वै मा॑ऽऽमो॒तीति॑ । स प्र॒जाप॑तिं पुनः प्रावि॑शत् । तं प्र॒जाप॑ति-रब्रवीत् । जाय॑स्वेति॑ । सौऽब्रवीत् । किं भा॑ग॒धेय॑म॒भि ज॑निष्य॒ इति॑ । तुभ्य॑मेवेदः॒ हूया॑ता॒ इत्य॑ब्रवीत् । स ए॒तद्-भा॑ग॒धेय॑म॒भ्यजा॑यत । यद॑ग्निहोत्रम् 8

TB 2.1.2.6

तस्मा॑द॒ग्निहो॑त्र-मु॒च्यते ॥ तद्धू॑यमा॒न-मा॑दित्यो॑ऽब्रवीत् । मा हौ॑षीः । उ॒भयो॑र्वै-ना॒वेत॑दिति॑ । सौऽग्नि-र॑ब्रवीत् । कु॒थं नौ॑ होष्य॒न्तीति॑ । सा॒यमे॒व तुभ्य॑ जु॒हवन् । प्रा॒तर्म॑ह्य-मित्य॑ब्रवीत् । तस्मा॑दु॒ग्रये॑ सा॒यः हू॑यते । सू॒र्याय॑ प्रा॒तः । 9

TB 2.1.2.7

आ॒ग्नेयी॑ वै रा॒त्रिः । ऐ॒न्द्रम॑हः । यदनु॑दिते॒ सूर्ये॑ प्रा॒तर्जु॑हुयात् । उ॒भय॑मे॒वाग्ने॒यः स्या॑त् । उ॒दिते॑ सूर्ये॑ प्रा॒तर्जु॑होति । तथा॑ऽग्र॒ये सा॒यः हू॑यते । सू॒र्याय॑ प्रा॒तः ॥ रा॒त्रिं वा॑ अनु॑ प्र॒जाः प्र जा॑यन्ते । अ॒ह्ना प्र॑ति॒ तिष्ठ॑न्ति । य॒थ्सा॒यं जु॑होति 10

TB 2.1.2.8

प्रै॒व तेन॑ जायते । उ॒दिते॑ सूर्ये॑ प्रा॒तर्-जु॑होति । प्र॒त्ये॒व तेन॑ तिष्ठति ॥ प्र॒जाप॑तिर-का॒मय॑त् प्रजा॑येयेति॑ । स ए॒तद॑ग्निहो॒त्रं मि॑थु॒न-म॑पश्यत् । तदु॒दिते॑ सूर्ये॑ऽजु॒होत् । यजु॑षा॒ ऽन्यत् । तू॒ष्णीम॑न्यत् । ततो॑ वै स प्राजा॑यत । य॒स्यै॒वं वि॒दुष॑ उ॒दिते॑ सूर्ये॑ऽग्निहो॒त्रं जु॑हति 11

TB 2.1.2.9

प्रै॒व जा॑यते । अथो॒ यथा॑ दि॒वा प्र॑जा॒नन्ने॑ति॑ । ता॒दृगे॒व तत् ॥ अथो॒ खल्वा॑हुः । य॒स्य वै द्वौ॑ पु॒ण्यौ गृ॑हे वस॑तः । य॒स्तयो॑र॒न्यः रा॒धय॑त्य॒न्यं न । उ॒भौ वा॒व स ता॑वृ॒च्छती॑ति॑ । अ॒ग्निं वा॒वादि॑त्यः सा॒यं प्र॑वि॒शति॑ । तस्मा॑द॒ग्निर्दू॒रान्न॑क्तं द॒दृशे । उ॒भे हि तेज॑सी स॒प॒द्येते॑ 12

TB 2.1.2.10

उ॒द्यन्तं॑ वा॒वादि॒त्य-म॒ग्नि॒रनु॑ सु॒मारो॑हति । तस्मा॑द्धूम ए॒वाग्ने॑र्दि॒वां द॑दृशे । यदु॒ग्नये॑ सा॒यं जु॑हुयात् ।
आ सूर्या॑य वृश्च्येत । यथ्सूर्या॑य प्रा॒तर॒-जु॑हुयात् । आ॒ऽग्नये॑ वृश्च्येत । दे॒वता॑भ्यः सु॒मदं॑ दद्व्यात् ।
। अ॒ग्नि॒ज्योति॑र॒ज्योतिः॑ सूर्यः॑ स्वाहे॒त्येव॑ सा॒यं हो॑तुव्यम् । सूर्यो॑ ज्योति॒र॒ज्योति॑र॒ग्निः स्वाहे॑ति
प्रा॒तः । तथो॒भाभ्या॑ं सा॒यं हू॑यते 13

TB 2.1.2.11

उ॒भाभ्या॑ं प्रा॒तः । न दे॒वता॑भ्यः सु॒मदं॑ दधाति ॥ अ॒ग्नि॒ज्योति॑रि॒त्याह॑ । अ॒ग्निर्वै॑ रे॒तो॒धाः ॥ प्र॒जा
ज्योति॑रि॒त्याह॑ । प्र॒जा ए॒वास्मै॑ प्र ज॑नयति ॥ सूर्यो॑ ज्योति॒रि॒त्याह॑ । प्र॒जास्वे॒व प्रजा॑तासु रे॒तो
दधाति ॥ ज्योति॑र॒ग्निः स्वाहे॒त्याह॑ । प्र॒जा ए॒व प्रजा॑ता अ॒स्यां प्र॑तिष्ठापयति । 14

TB 2.1.2.12

तूष्णी॑मु॒त्तरा॒-माहु॑तिं जुहोति । मि॒थुन॑त्वाय प्रजा॑त्यै ॥ यदु॒दि॒ते सूर्ये॑ प्रा॒तर॒-जु॑हुयात् । यथा॑ऽति॒थये॑
प्र॒द्रु॒ताय॑ शून्याया॑व॒स्था-या॑हार्यं॑ ह॒रन्ति॑ । ता॒दृगे॒व तत् । का॒ह त॒तस्त॑द्-भ॒वती॑त्याहुः । यथ्स॑ न
वेदं॑ । यस्मै॑ तद्व॒रन्तीति॑ । तस्मा॑द्-यदौष॑सं जुहोति । तदे॒व संप्र॑ति () । अथो॒ यथा॑ प्रा॒र्थमौष॑सं
प॒रि वे॒वेष्टि॑ । ता॒दृगे॒व तत् । 15

(अ॒मृष्ट - वि॒चि॒कि॒त्संति॑ - जु॒ह्वं - त्य॒जाम॑सृज - ता॒ग्नि॒होत्रं॑ - सूर्या॑य प्रा॒तर॒ - जु॒होति॑ - जु॒ह्वति॑ -
संप॑वेते - हूयते - स्थापयति - संप्रति॑ द्वे च) (A2)

2.1.3 अनुवाकं 3 - उपयोक्ष्यमाणस्य हविषः संस्कारः

TB 2.1.3.1

रु॒द्रो वा ए॒षः । यद॒ग्निः॑ । प॒त्नी स्था॑ली । यन्म॒द्व्ये॒ऽग्ने-र॑धि॒श्रये॑त् । रु॒द्राय॑ प॒त्नीम॑पि दद्व्यात् ।
। प्र॒मायु॑का स्यात् । उ॒दी॒चोऽङ्गा॑रान्नि॒रू॒ह्याधि॑ श्रयति । प॒त्नियै॑ गोपी॒थाय॑ ॥ व्य॑न्तान् करोति ।

तथा पत्न्य-प्रमायुका भवति । 16

TB 2.1.3.2

घृ॒र्मो वा ए॒षोऽशान्तः । अ॒हर॒हः प्रवृ॑ज्यते । यद॑ग्निहोत्रम् । प्रति॑षिञ्चेत् प॒शुकाम॑स्य । शान्तमि॑व
हि प॑शव्यम् ॥ न प्रति॑षिञ्चेद्-ब्रह्मवर्च॑सकामस्य । समि॑द्धमिव हि ब्रह्मवर्च॑सम् ॥ अथो॒ खलु॑ ।
प्रति॑षिच्यमेव । यत्-प्रति॑षिञ्चति 17

TB 2.1.3.3

तत्-प॑शव्यम् । यज्जु॑होति । तद्ब्रह्मवर्च॑सि । उ॒भय॑मेवाकः ॥ प्रच्यु॑तं वा ए॒तद॒स्मा-ल्लो॒कात् ।
अ॒गतं दे॒वल॒ोकम् । यच्छृ॑तः ह॒विरन॑भिघारितम् । अ॒भिघो॑तयति । अ॒भ्येवैन॑द्वारयति । अथो॒
दे॒वत्रै॑वैन॑द्-गमयति । 18

TB 2.1.3.4

पर्य॑ग्नि करोति । रक्ष॑सा-मप॑हत्यै ॥ त्रिः पर्य॑ग्नि करोति । त्र्या॑वृद्धि य॒ज्ञः । अथो॒ मे॒द्वय॑त्वाय
॥ यत्-प्रा॒चीन॑-मुद्वा॒सये॑त् । यज॑मानः शु॒चा ऽर्प॑येत् । यद्-दक्षि॑णा । पि॒तृदे॒वत्य॑ स्यात् ।
यत्-प्र॒त्यक् 19

TB 2.1.3.5

पत्नी॑ः शु॒चा ऽर्प॑येत् । उ॒दी॒चीन॑-मुद्वा॒सय॑ति । ए॒षा वै दे॒वमनु॑ष्याणां शान्ता दिक् । तामे॒वैन॑दनूद्-
वा॑सयति शान्त्यै ॥ वर्त्म॑ करोति । य॒ज्ञस्य॑ संत॑त्यै ॥ निष्ट॑पति । उपै॒व तथ्स्त्वं॑णाति ॥ च॒तुरु॑न्नयति
। चतु॑ष्पादः प॒शवः 20

TB 2.1.3.6

प॒शून्ने॒वा-व॑रुन्धे ॥ सर्वा॑न्-पू॒र्णानु॑न्नयति । सर्वे॑ हि पुण्या॑ रा॒द्धाः ॥ अ॒नूच॑ उन्नयति । प्र॒जाया॑

अ॒नूची॑न॒त्वाय॑ । अ॒नूच्ये॑वा॒स्य॑ प्र॒जा ऽर्द्ध॑का भवति ॥ सं मृ॑शति॒ व्यावृ॑त्त्यै ॥ नाहो॑ष्य॒न्नुप॑ सादयेत् । यदहो॑ष्य॒न्नुप॑ सा॒दये॑त् । यथा॒ ऽन्य॑स्मा॑ उपनि॒धाय॑ 21

TB 2.1.3.7

अ॒न्यस्मै॑ प्र॒यच्छ॑ति । ता॒दृगे॑व तत् । आ॒ऽस्मै॑ वृ॒श्च्येत॑ । यदे॒व गा॒रु॒ह॒प॒त्ये॑ऽधि॒श्रय॑ति । तेन॒ गा॒रु॒ह॒प॒त्यं॑ प्रीणाति ॥ अ॒ग्नि॒र॒बि॒भेत् । आहु॑तयो॒ माऽत्यै॑ष्य॒न्तीति॑ । स ए॒ताः स॒मिधं॑-मपश्यत् । तामा॑ऽधत्त । ततो॒ वा अ॒ग्नावाहु॑तयोऽद्वि॒यन्त॑ 22

TB 2.1.3.8

यदे॒नः॑ स॒मय॑च्छत् । तथ्स॒मिधः॑ स॒मि॒त्वम् । स॒मिध॒माद॑धाति । स॒मे॒वैनं॑ यच्छति । आहु॑तीनां॒ धृत्यै॑ । अथो॑ अग्निहोत्रमे॒वेध्म॑वत्-करोति । आहु॑तीनां॒ प्रति॑ष्ठित्यै ॥ ब्र॒ह्म॒वा॒दिनो॑ वदन्ति । यदे॒काः॑ स॒मिध॑मा॒धाय॑ द्वे आहु॑ती जुहोति । अथ॒ कस्याः॑ स॒मिधि॑ द्वितीया॒-माहु॑तिं जुहोतीति 23

TB 2.1.3.9

यद्-द्वे स॒मिधा॑वाद्द्वयात् । भ्रातृ॑व्यमस्मै जनयेत् । एकाः॑ स॒मिध॑मा॒धाय॑ । यजु॑षा॒ ऽन्या॑माहु॑तिं जुहोति । उ॒भे ए॒व स॒मिध्व॑ती आहु॑ती जुहोति । नास्मै॑ भ्रातृ॑व्यं जनयति ॥ आदी॑प्तायां जुहोति । स॒मिध्व॑मि॒व हि ब्र॑ह्मवर्च॒सम् । अथो॑ यथाऽति॑थिं॒ ज्योति॑ष्कृत्वा प॒रि॒वेष्टि॑ । ता॒दृगे॑व तत् () ॥ च॒तु॒रु॒न्नय॑ति । द्विजु॑होति । तस्मा॑द्-द्वि॒पा-च॒तु॒ष्पाद॑मत्ति । अथो॑ द्वि॒पद्ये॑व च॒तु॒ष्पदः॑ प्रति॑ष्ठापयति । 24

(भ॒वति॑ - प्र॒ति॒षि॒ञ्चति॑ - गमयति - प्र॒त्यक् - प॒शव॑ - उपनि॒धा - या॑द्वि॒यन् - तेति॑ - तच्च॒त्वारि॑ च)
(A3)

2.1.4 अनुवाकं 4 - उपयुक्तस्य हविषः संस्कारः

TB 2.1.4.1

उत्तराव॑र्ती॒ वै दे॒वा आहु॑तिमजु॒हवुः । अवा॑चीमसु॒राः । ततो॑ दे॒वा अभ॑वन् । पराऽसु॒राः । यं का॒मये॑त् वसी॒यान्थ॒ स्या॒दिति॑ । कनी॑यस्तस्य॒ पूर्व॑ हु॒त्वा । उत्त॑रं भूयो॑ जुहुयात् । एषा वा उत्तराव॑त्याहु॒तिः । तां दे॒वा अजु॑हवुः । तत॑स्तेऽभवन् 25

TB 2.1.4.2

यस्यै॒वं जुह॑ति । भव॑त्ये॒व ॥ यं का॒मये॑त् पापी॒यान्थ॒ स्या॒दिति॑ । भूय॑स्तस्य॒ पूर्व॑ हु॒त्वा । उत्त॑रं कनी॑यो जुहुयात् । एषा वा अवा॑च्याहु॒तिः । तामसु॒रा अजु॑हवुः । तत॑स्ते पराऽभवन् । यस्यै॒वं जुह॑ति । परै॒व भव॑ति । 26

TB 2.1.4.3

हु॒त्वोप॑ सादयत्यजा॑मित्वाय । अथो॒ व्यावृ॑त्त्यै ॥ गा॒रुह॑पत्यं प्रती॑क्षते । अन॑नु॒द्व्यायि॑न-मे॒वैनं॑ करोति ॥ अ॒ग्निहो॑त्रस्य॒ वै स्था॒णुर॑स्ति । तं य ऋ॑च्छेत् । य॒ज्ञ॒स्था॒णुमृ॑च्छेत् । एष वा अ॒ग्निहो॑त्रस्य॒ स्था॒णुः । यत्-पूर्वाऽऽहु॑तिः । तां यदु॑त्तरया॒ऽभि जु॑हुयात् 27

TB 2.1.4.4

य॒ज्ञ॒स्था॒णु-मृ॑च्छेत् । अ॒तिहा॑य॒ पूर्वा॑माहु॒तिं जु॑होति । य॒ज्ञ॒स्था॒णुमे॒व परि॑ वृणक्ति । अथो॒ भ्रातृ॑व्यमे॒वास्वाऽ॑ति॒क्राम॑ति ॥ अ॒वा॒चीन॑ः सा॒यमु॑प॒ मा॒र्ष्टि । रेत॑ ए॒व तद्-द॑धाति । ऊ॒र्द्धं प्रा॑तः । प्र ज॑नयत्ये॒व तत् ॥ ब्र॒ह्म॒वा॒दिनो॑ वदन्ति । च॒तु॒रु॒न्नय॑ति 28

TB 2.1.4.5

द्विर्जु॑होति । अथ॒ क्व द्वे॑ आहु॑ती भवत॒ इति॑ । अ॒ग्नौ वै॑श्वान॒र इति॑ ब्रूयात् । एष वा अ॒ग्निरै॑श्वान॒रः । यद्वा॑ ह्य॒णः । हु॒त्वा द्विः प्रा॑श्नाति । अ॒ग्रावे॒व वै॑श्वान॒रे द्वे॑ आहु॑ती जुहोति ॥ द्विर्जु॑होति । द्विर्नि॑मा॒र्ष्टि । द्विः प्रा॑श्नाति 29

TB 2.1.4.6

षट् संपद्यन्ते । षड्वा ऋतवः । ऋतून्नेव प्रीणाति । ब्रह्मवादिनो वदन्ति । किं देवत्यं-मग्निहोत्रमिति । वैश्वदेवमिति ब्रूयात् । यद्-यजुषा जुहोति । तदैन्द्राग्रम् । यत्-तूष्णीम् । तत्-प्राजापत्यम् 30

TB 2.1.4.7

यन्निमार्ष्टि । तदोषधीनाम् । यद्वितीयम् । तत्-पितृणाम् । यत्-प्राश्नाति । तद्-गर्भाणाम् । तस्माद्-गर्भा अनश्नन्तो वर्द्धन्ते । यदाचामति । तन्मनुष्याणाम् ॥ उदङ्पर्यावृत्याचामति 31

TB 2.1.4.8

आत्मनो गोपीथाय ॥ निर्णेनेक्ति शुद्धयै ॥ निष्टपति स्वगाकृत्यै । उद्दिशति । सप्तर्षीनेव प्रीणाति ॥ दक्षिणा पर्यावर्तते । स्वमेव वीर्यमनु पर्यावर्तते । तस्माद्-दक्षिणोऽर्द्ध आत्मनो वीर्यावत्तरः । अथो आदित्यस्यैवावृतमनु पर्यावर्तते ॥ हुत्वोप समिन्धे 32

TB 2.1.4.9

ब्रह्मवर्चसस्य समिद्धयै ॥ न ब्रह्मिरेत् प्र हरेत् । असंस्थितो वा एष यज्ञः । यदग्निहोत्रम् । यदनु प्रहरेत् । यज्ञं विच्छिन्द्यात् । तस्मान्नानु प्रहृत्यम् । यज्ञस्य सन्तत्यै ॥ अपो नि नयति । अवभृथस्यैव रूपमकः () । 33

(अभवन् - भवति - जुहुयान् - नयति - मार्ष्टि द्विः प्राश्नाति - प्राजापत्य - माचामती - न्धे - ऽकः) (A4)

2.1.5 अनुवाकं 5 - काम्यानि होमद्रव्याणि

TB 2.1.5.1

ब्रह्मवादिनो वदन्ति । अग्निहोत्रप्रायणा यज्ञाः । किं प्रायण-मग्निहोत्रमिति । वृथ्सो वा अग्निहोत्रस्य प्रायणम् । अग्निहोत्रं यज्ञानाम् ॥ तस्य पृथिवी सदः । अन्तरिक्ष-माग्नीध्रम् । द्यौर-हविर्द्वानम् । दिव्या आपः प्रोक्षणयः । ओषधयो बरहिः 34

TB 2.1.5.2

वनस्पतय इद्धमः । दिशः परिधयः । आदित्यो यूपः । यजमानः पशुः । समुद्रोऽवभृथः । सम्वृथ्सरः स्वर्गाकारः । तस्मादाहिताग्नेः सर्वमेव बर्हिष्यं दत्तं भवति । यथ सायं जुहोति । रात्रिमेव तेन दक्षिण्यां कुरुते । यत्-प्रातः 35

TB 2.1.5.3

अहरेव तेन दक्षिण्यं कुरुते । यत्-ततो ददाति । सा दक्षिणा ॥ यावन्तो वै देवा अहुतमादन् । ते पराऽभवन् । त एतदग्निहोत्रं सर्वस्यैव समवदायाजुहवुः । तस्मादाहुः । अग्निहोत्रं वै देवा गृहाणां निष्कृति-मपश्यन्ति । यथ-सायं जुहोति । रात्रिया एव तद्भुताद्याय 36

TB 2.1.5.4

यजमानस्या-पराभावाय । यत्-प्रातः । अहं एव तद्भुताद्याय । यजमानस्या-पराभावाय । यत्-ततोऽश्नाति । हुतमेव तत् ॥ द्वयोः पयसा जुहुयात्-पशुकामस्य । एतद्वा अग्निहोत्रं मिथुनम् । य एवं वेद । प्र प्रजयां पशुभिर्-मिथुनैर्-जायते 37

TB 2.1.5.5

इमामेव पूर्वया दुहे । अमूमुत्तरया । अधिश्रित्योत्तरमा नयति । योनावेव तद्-रेतः सिञ्चति प्रजनने ॥ आज्येन जुहुयात्-तेजस्कामस्य । तेजो वा आज्यम् । तेजस्यैव भवति । पयसा पशुकामस्य । एतद्वै पशूनां रूपम् । रूपेणैवास्मै पशूनं रुन्धे 38

TB 2.1.5.6

प॒शु॒मा॒ने॒व भ॑वति । दु॒द्धे॒न्द्रि॒य का॑मस्य । इ॒न्द्रि॒यं वै द॑धि । इ॒न्द्रि॒या॒व्ये॑व भ॑वति । य॒वा॒ग्वी॑
ग्रा॒म॒का॒म॒स्यौष॑धा वै म॑नुष्याः । भा॒ग॒धे॒ये॒नैवा॑स्मै स॒जा॒ता॒न॒वं-रु॑न्धे । ग्रा॒म्ये॑व भ॑वति ॥ अ॒यं॒ज्ञो वा
ए॒षः । यो॑सा॒मा 39

TB 2.1.5.7

च॒तु॒रु॒न्न॑यति । च॒तु॒र॒क्षर॑ रथ॒न्त॒रम् । रथ॑न्त॒र॒स्यैष॑ वर्णः । उ॒प॒री॒व ह॑रति । अ॒न्त॒रि॒क्षं॑ वा॒म॒दे॒व्यम्
। वा॒म॒दे॒व्य॒स्यैष॑ वर्णः । द्वि॒र्जु॒होति॑ । द्वा॒य॒क्षरं॑ बृ॒हत् । बृ॒हत् ए॒ष वर्णः॑ । अ॒ग्नि॒हो॒त्रमे॑व तथ्
सा॒म॒न्वत्-क॑रोति । 40

TB 2.1.5.8

यो वा अ॒ग्नि॒हो॒त्र॒स्यो॒प॒सदो॑ वेद । उ॒पै॒न॒मु॒प॒सदो॑ नमन्ति । वि॒न्द॒तं उ॒प॒स॒त्ता॒रम् । उ॒न्नी॒योप॑ सा॒दय॑ति
। पृ॒थि॒वीमे॒व प्री॑णाति । हो॒ष्य॒न्नुप॑ सा॒दय॑ति । अ॒न्त॒रि॒क्षमे॒व प्री॑णाति । हु॒त्वोप॑ सा॒दय॑ति । दि॒वंमे॒व
प्री॑णाति । ए॒ता वा अ॒ग्नि॒हो॒त्र॒स्यो॒प॒सदः॑ 41

TB 2.1.5.9

य ए॒वं वे॑द । उ॒पै॒न॒मु॒प॒सदो॑ नमन्ति । वि॒न्द॒तं उ॒प॒स॒त्ता॒रम् ॥ यो वा अ॒ग्नि॒हो॒त्र॒स्या॒श्रा॒वितं॑
प्र॒त्या॒श्रा॒वितः॑ हो॒ता॒रं ब्र॑ह्माणं॑ व॒षट्का॑रं वे॑द । तस्य॑ त्वे॒व हु॑तम् । प्रा॒णो वा अ॒ग्नि॒हो॒त्र॒स्या॒श्रा॒वितम्
। अ॒प॒ानः प्र॒त्या॒श्रा॒वितम् । म॒नो हो॒ता॑ । चक्षु॑र्-ब्र॒ह्मा । नि॒मेषो॑ व॒षट्का॑रः 42

TB 2.1.5.10

य ए॒वं वे॑द । तस्य॑ त्वे॒व हु॑तम् ॥ सा॒यं॑ या॒वा॒नश्च॑ वै दे॒वाः प्रा॑त॒र्या॒वा॒णश्चा॒ग्नि॒हो॒त्रि॒णो गृ॑ह॒मा॒गच्छ॑न्ति
। ता॒न् यन्न॑ त॒र्पये॑त् । प्र॒जया॑ऽस्य प॒शुभि॑र्वि ति॒ष्ठेर॑न् । यत्त॒र्पये॑त् । तृ॒प्ता ए॒नं प्र॑जया॑ प॒शुभि॑स्त॒र्पये॑युः
॥ स॒जू॒र्दे॒वैः सा॒यं॑ या॒वा॒भि॒रिति॑ सा॒यं॑ सं मृ॑शति । स॒जू॒र्दे॒वैः प्रा॑त॒र्या॒वा॒भि॒रिति॑ प्रा॒तः । ये चै॒व

देवाः सायं यावानो ये च प्रातर्यावाणः 43

TB 2.1.5.11

तानेवोभयाः स्तर्पयति । त एनं तृप्ताः प्रजयां पशुभिः स्तर्पयन्ति ॥ अरुणो ह स्माहौपवेशिः । अग्निहोत्र एवाहः सायं प्रातर्वज्रं भ्रातृव्येभ्यः प्र हरामि । तस्मान्-मत्पापीयाः सो भ्रातृव्या इति । चतुरुन्नयति । द्विर्जुहोति । समिध-सप्तमी । सप्तपदा शक्करी । शाक्करो वज्रः () । अग्निहोत्र एव तत्सायं प्रातर्वज्रं यजमानो भ्रातृव्याय प्र हरति । भवत्यात्मना । पराऽस्य भ्रातृव्यो भवति । 44

(ब॒रु॒हिः - प्रा॒तर॒ - हु॒ताद्याय॑ - जा॒यते॑ - रु॒न्धे - ऽसा॒मा - क॑रो - त्ये॒ता वा अ॑ग्निहोत्रस्यो प॒सदो॑ - वष॒ट्कार॑ - श्वं प्रा॒तर्यावा॑णो - वज्र॒स्त्रीणि॑ च) (A5)

2.1.6 अनुवाकं 6 - अभ्युद्ववणं, होमाभावप्रतीकारश्च

TB 2.1.6.1

प्रजापति-रकामय-तात्मन् वन्मे जायेतेति । सोऽजुहोत् । तस्यात्मन् वदजायत । अग्निर्वायुरादित्यः । तेऽब्रुवन् । प्रजापति-रहौषी-दात्मन्-वन्मे जायेतेति । तस्य वयमजनिष्महि । जायतां न आत्मन्-वदिति तेऽजुहवुः । प्राणानामग्निः । तनुवै वायुः 45

TB 2.1.6.2

चक्षुष आदित्यः । तेषां हुतादजायत गौरेव ॥ तस्यै पयसि व्यायच्छन्त । मम हुतादजनि ममेति । ते प्रजापतिं प्रश्नमायन् । स आदित्योऽग्नि-मब्रवीत् । यत्रो नौ जयात् । तन्नौ सहासदिति । कस्यै कोऽहौषीदिति प्रजापति-रब्रवीत्-कस्यै क इति । प्राणानामहमित्यग्निः 46

TB 2.1.6.3

तनुवा अहमिति वायुः । चक्षुषोऽहमित्यादित्यः । य एव प्राणानामहौषीत् । तस्य हुतादजनीति ।

अ॒ग्नेर् हु॒ताद॑ज॒नीति॑ । तद॑ग्निहोत्रस्या॑-ग्निहोत्र॒त्वम् । गौ॒र्वा अ॑ग्निहोत्रम् । य ए॒वं वे॒दु गौ॑र॒ग्निहो॑त्रमिति । प्रा॒णापा॒नाभ्या॑-मे॒वाग्निः॑ सम॑र्द्धयति । अव्य॑र्द्धुकः प्रा॒णापा॒नाभ्या॑ भवति 47

TB 2.1.6.4

य ए॒वं वे॒द ॥ तौ वा॒युर॑ब्रवीत् । अनु॒ मा भ॑जतमिति । यदे॒व गा॒र्ह॒पत्ये॑ऽधि॒श्रित्या॑-ह॒वनी॑य-
म॒भ्यु॑द्वान् । तेन॒ त्वां प्री॑णानित्य॑-ब्रूताम् । तस्मा॒द्-यद्-गा॒र्ह॒पत्ये॑ऽधि॒श्रित्या॑ह॒वनी॑य-म॒भ्यु॑द्ववति ।
। वा॒युमे॒व तेन॑ प्रीणाति ॥ प्र॒जाप॑तिर्-दे॒वताः॑ सृ॒जमा॑नः । अ॒ग्निमे॒व दे॒वता॑नां प्रथ॒म-म॑सृजत ।
सोऽन्य॑दा॒लम्-भ्य॑मवित्त्वा 48

TB 2.1.6.5

प्र॒जाप॑तिम॒भि पर्या॑वर्तत । स मृ॒त्यो-र॑बिभेत् । सोऽमु॑मा॒दित्य॑-मा॒त्मनो॑ निर॑मिमीत । तश्च॑हु॒त्वा
परा॑ङ्पर्या॑वर्तत । ततो॒ वै स मृ॒त्युमपा॑जयत् । अप॑ मृ॒त्युं ज॑यति । य ए॒वं वे॒द ॥ तस्मा॒द्-यस्यै॒वं
वि॒दुषः॑ । उ॒तैका॑हमु॒त द्व्य॒हं न जु॑ह्वति । हु॒तमे॒वास्य॑ भवति () । असौ॑ ह्या॒दित्यो॑ऽग्निहोत्रम् । 49

(तनु॑वै वा॒यु - र॒ग्निर् - भ॑व - त्यवित्त्वा - भव॑त्येकं च) (A6)

2.1.7 अनुवाकं 7 - हविषः सर्वदेवतासंबन्धेन प्रशंसा

TB 2.1.7.1

रौ॒द्रं गवि॑ । वा॒यव्य॑-मुप॑सृष्टम् । आ॒श्विनं॑ दु॒ह्यमा॑नम् । सौ॒म्यं दु॒ग्धम् । वा॒रु॒णमधि॑श्रितम् ।
वै॒श्वदे॒वा भि॑न्दवः । पौ॒ष्णमु॑द॒न्तम् । सा॒रस्व॑तं वि॒ष्यन्द॑मानम् । मै॒त्रः शरः॑ । धा॒तुरु॑द्वा॒सितम् () ।
बृ॒हस्प॑तेरु॒न्नीतम् । स॒वितुः॑ प्र॒क्रान्त॑म् । द्या॒वापृ॑थि॒व्यः ह्रि॑यमा॑णम् । ऐ॒न्द्राग्र॑-मुप॑सन्नम् ।
अ॒ग्नेः पूर्वा॑ ऽऽहु॑तिः । प्र॒जाप॑ते-रु॒त्तरा॑ । ऐ॒न्द्रः हु॑तम् । 50

(उद्वा॑सितः स॒प्त च) (A7)

2.1.8 अनुवाकं 8 - दोहनप्रकारोऽग्निहोत्रहोत्रश्च

TB 2.1.8.1

दक्षिणत उपं सृजति । पितृलोकमेव तेन जयति ॥ प्राचीमावर्तयति । देवलोकमेव तेन जयति । उदीचीमावृत्यं दोग्धि । मनुष्यलोकमेव तेन जयति ॥ पूर्वौ दुह्याज्येष्ठस्यं ज्यैष्ठिनेयस्यं । यो वा गतश्रीः स्यात् । अपरौ दुह्यात्-कनिष्ठस्यं कानिष्ठिनेयस्यं । यो वा बुभूषेत् । 51

TB 2.1.8.2

न सं मृशति । पापवस्यसस्य व्यावृत्त्यै ॥ वायव्यं वा एतदुपसृष्टम् । आश्विनं दुह्यमानम् । मैत्रं दुग्धम् । अर्यम्ण उद्वास्यमानम् । त्वाष्ट्र-मुन्नीयमानम् । बृहस्पते-रुन्नीतम् । सवितुः प्रक्रान्तम् । द्यावापृथिव्यं ह्रियमाणम् । 52

TB 2.1.8.3

ऐन्द्राग्रमुपं सादितम् । सर्वाभ्यो वा एष देवताभ्यो जुहोति । योऽग्निहोत्रं जुहोति ॥ यथा खलु वै धेनुं तीर्थे तर्पयति । एवमग्निहोत्री यजमानं तर्पयति । तृप्यति प्रजयां पशुभिः । प्रसुवर्गं लोकं जानाति । पश्यति पुत्रम् । पश्यति पौत्रम् । प्र प्रजयां पशुभिर्-मिथुनैर्-जायते () । यस्यैवं विदुषोऽग्निहोत्रं जुह्वति । य उ चैन देवं वेद । 53

(बभूषे- द्वियमाणं - जायते द्वे च) (A8)

2.1.9 अनुवाकं 9 - अग्निहोत्रस्यासंसृष्टहोममन्त्रौ

TB 2.1.9.1

त्रयो वै प्रैयमेधा आसन् । तेषां त्रिरेकोऽग्निहोत्र-मजुहोत् । द्विरेकः । सकृदेकः । तेषां यस्त्रिरजुहोत् । स ऋचाऽजुहोत् । यो द्विः । स यजुषा । यः सकृत् । स तूष्णीम् 54

TB 2.1.9.2

यश्च यजुषा ऽजुहोद्यश्च तूष्णीम् । तावुभावा॑र्द्धताम् । तस्मा॒द्-यजुषा ऽऽहु॑तिः पूर्वा॑ होत॒व्या ।
तूष्णीमुत्तरा॑ । उ॒भे ए॒वर्द्धी॑ अव॑रुन्धे । अ॒ग्निर्-ज्योति॑र् ज्योति॑र्-ग्निः स्वाहेति॑ सा॒यं जु॑होति । रेतं
ए॒व तद्-द॑धाति । सूर्यो॑ ज्योति॑र्-ज्योतिः॑ सूर्यः॑ स्वाहेति॑ प्रा॒तः । रेतं॑ ए॒व हितं॑ प्र ज॑नयति ॥ रेतो॑
वा ए॒तस्य॑ हितं॑ न प्र जा॑यते 55

TB 2.1.9.3

यस्या॑ग्निहोत्रमहु॑तः सूर्यो॑ऽभ्यु॑देति॑ । यद्-यन्ते॑ स्यात् । उ॒न्नीय॑ प्राडु॒दाद्र॑वेत् । स उ॑प॒साद्या॑तमि॒तो-
रासी॑त । स य॒दा ताम्ये॑त् । अथ॑ भूः स्वाहेति॑ जुहुयात् । प्र॒जाप॑तिर्वै भूतः । तमे॒वो-पा॑सरत् ।
स ए॒वैनं॑ तत् उ॒न्नय॑ति । ना॒र्तिमा॑च्छति॑ यज॑मानः () । 56

(तूष्णीं - जायते - यजमानः) (A9)

2.1.10 अनुवाकं 10 - वह्नेरवस्थाविशेषानुसारेण होमः

TB 2.1.10.1

यद॒ग्नि-मु॒द्धर॑ति । वस॑व॒स्तर्ह्य॑ग्निः । तस्मि॑न्, यस्य॑ तथा॑विधे जुह॑ति । वसु॑ष्वे॒वास्य॑ाग्निहोत्रः
हु॒तं भ॑वति ॥ निहि॑तो धूपा॒यञ्छे॑ते । रु॒द्रास्त॑र्ह्य॒ग्निः । तस्मि॑न्, यस्य॑ तथा॑विधे जुह॑ति ।
रु॒द्रेष्वे॒वास्य॑ाग्निहोत्रः हु॒तं भ॑वति ॥ प्र॒थम॑मि॒द्धम॑र्चि॒रा ल॑भते । आ॒दित्या॑स्तर्ह्य॒ग्निः 57

TB 2.1.10.2

तस्मि॑न्, यस्य॑ तथा॑विधे जुह॑ति । आ॒दित्ये॑ष्वे॒वास्य॑ाग्निहोत्रः हु॒तं भ॑वति ॥ सर्व॑ ए॒व सर्व॑श
इ॒द्धम॑ आदी॑प्तो भवति । विश्वे॑ दे॒वास्त॑र्ह्य॒ग्निः । तस्मि॑न्, यस्य॑ तथा॑विधे जुह॑ति । विश्वे॑ष्वे॒वास्य॑
दे॒वेष्व॑ग्निहोत्रः हु॒तं भ॑वति ॥ नि॒तरा॑म॒र्चिरु॑पावैति॑ लोहि॒नीके॑व भवति । इन्द्र॑स्तर्ह्य॒ग्निः । तस्मि॑न्,

यस्य तथाविधे जुहति । इन्द्र एवास्य॑ग्निहोत्रं हुतं भवति । 58

TB 2.1.10.3

अङ्गारा भवन्ति । तेभ्योऽङ्गारेभ्योऽर्चिरुदेति । प्रजापतिस्तर्ह्यग्निः । तस्मिन् यस्य तथाविधे जुहति । प्रजापतावेवास्य॑ग्निहोत्रं हुतं भवति ॥ शरोऽङ्गारा अद्ध्यहन्ते । ब्रह्म-तर्ह्यग्निः । तस्मिन् यस्य तथाविधे जुहति । ब्रह्मन्नेवास्य॑ग्निहोत्रं हुतं भवति ॥ वसुषु रुद्रेष्वदित्येषु विश्वेषु देवेषु () । इन्द्रे प्रजापतौ ब्रह्मन् । अपरिवर्गमेवास्यैतासु देवतासु हुतं भवति । यस्यैवं विदुषोऽग्निहोत्रं जुहति । य उ चैन देवं वेद । 59

special korvai

(यदग्निं निहितः प्रथमं सर्व एव नितरामङ्गाराः शरोऽङ्गारा ब्रह्मवसुष्वष्टौ)
(आदित्यास्तर्ह्यग्निर् - इन्द्र एवास्य॑ग्निहोत्रं हुतं भवति - देवेषु चत्वारि च) (A10)

2.1.11 अनुवाकं 11 - कालभेदेन समन्त्रकं परिषेचनम्

TB 2.1.11.1

ऋतं त्वा सत्येन परिषिञ्चामीति सायं परिषिञ्चति । सत्यं त्वर्तेन परिषिञ्चामीति प्रातः । अग्निर्वा ऋतम् । असावादित्यः सत्यम् । अग्निमेव तदादित्येन सायं परिषिञ्चति । अग्निनाऽऽदित्यं प्रातस्सः । यावदहोरात्रे भवतः । तावदस्य लोकस्य । नार्तिर्न रिष्टिः । नान्तो न पर्यन्तोऽस्ति () । यस्यैवं विदुषोऽग्निहोत्रं जुहति । य उ चैन देवं वेद । 60

(अस्ति द्वे च) (A11)

PrapAtaka Korvai with starting words of 1 to11 anuvAkams :-

(अङ्गिरसः - प्रजापतिरग्निः - रुद्र - उत्तरावती - ब्रह्मवादिनोऽग्निहोत्रप्रायणा युज्ञाः - प्रजापतिरकामयतात्मन्वद्

2.1 द्वितीयाष्टके प्रथमः प्रपाठकः - अग्निहोत्रब्राह्मणम् <https://www.vedavms.in> 17

- रौद्रं गविं -दक्षिणत - स्त्रयो वै - यदग्नि - मृतं त्वा सत्येनैकादश)

korvai with starting words of 1, 11, 21 series of daSinis :-

(अङ्गिरसुः - प्रैव तेन - पशूनेव - यन्निमार्ष्टि - यो वा अग्निहोत्रस्योपसदो - दक्षिणतः षष्टिः)

first and last word - 1st prapATakam, 2nd aShTakam, :-

(अङ्गिरसो - य उ चैन देवं वेद)

॥ हरिः ॐ ॥ ॥ कृष्ण यजुर्वेदीय तैत्तिरीय ब्राह्मणे द्वितीयाष्टके प्रथमः प्रपाठकः समाप्तः ॥

=====

2.2 द्वितीयाष्टके द्वितीयः प्रपाठकः - होतृब्राह्मणम्

2.2.1 अनुवाकं 1 - दशहोतृमन्त्रस्य ऋत्वर्थपुरुषार्थप्रयोगौ

TB 2.2.1.1

प्रजापतिरकामयत् प्रजाः सृजेयेति । स एतं दशहोतार-मपश्यत् । तं मनसा ऽनुद्रुत्य दर्भस्तम्बेऽजुहोत् । ततो वै स प्रजा असृजत् । ता अस्मात्सृष्टा अपाक्रामन् । ता ग्रहेणागृह्णात् । तद्ग्रहस्य ग्रहत्वम् । यः कामयेत् प्रजायेयेति । स दशहोतारं मनसा ऽनुद्रुत्य दर्भस्तम्बे जुहुयात् । प्रजापतिर्वै दशहोता 1

TB 2.2.1.2

प्रजापतिरेव भूत्वा प्र जायते ॥ मनसा जुहोति । मन इव हि प्रजापतिः । प्रजापतेरास्यै ॥ पूर्णया जुहोति । पूर्ण इव हि प्रजापतिः । प्रजापतेरास्यै ॥ न्यूनया जुहोति । न्यूनाद्धि प्रजापतिः प्रजा असृजत् । प्रजानां सृष्ट्यै । 2

TB 2.2.1.3

दर्भस्तम्बे जुहोति । एतस्माद्वै योनेः प्रजापतिः प्रजा असृजत् । यस्मादेव योनेः प्रजापतिः प्रजा असृजत् । तस्मादेव योनेः प्र जायते ॥ ब्राह्मणो दक्षिणतो उपोस्ते । ब्राह्मणो वै प्रजानां-मुपद्रष्टा । उपद्रष्टुमत्येव प्र जायते ॥ ग्रहो भवति । प्रजानां सृष्टानां धृत्यै ॥ यं ब्राह्मणं विद्यां विद्वांसं यशो नच्छेत् । 3

TB 2.2.1.4

सोऽरण्यं परेत्य । दर्भस्तम्ब-मुद्रुत्थ्य । ब्राह्मणं दक्षिणतो निषाद्य । चतुरहोतृन् व्याचक्षीत् । एतद्वै देवानां परमं गुह्यं ब्रह्म । यच्चतुरहोतारः । तदेव प्रकाशं गमयति । तदेनं प्रकाशं गतम् । प्रकाशं प्रजानां गमयति ॥ दर्भस्तम्ब-मुद्रुत्थ्य व्याचष्टे 4

TB 2.2.1.5

अ॒ग्नि॒वान् वै द॑र्भस्त॒म्बः । अ॒ग्नि॒वत्ये॒व व्याच॑ष्टे ॥ ब्रा॒ह्म॒णो दक्षि॑ण॒त उपा॑स्ते । ब्रा॒ह्म॒णो वै प्र॒जाना॑-
मु॒पद्र॑ष्टा । उ॒प॒द्रष्टु॑-म॒त्येवैनं॑ यशं ऋच्छति ॥ ई॒श्वरं॑ तं यशोऽर्तो॒रित्याहुः॑ । यस्यान्ते॑ व्याचष्ट इति
। वर॒स्तस्मै॑ देयः । यदे॒वैनं॑ तत्रो॒प नम॑ति । तदे॒वाव॑ रुन्धे । 5

TB 2.2.1.6

अ॒ग्नि॒मा॒दधा॑नो दश॑होत्रा ऽरणि॒मव॑दद्भ्यात् । प्रजा॑तमे॒वैन॒-माध॑त्ते । तेनै॒वोद्धु॑त्याग्नि॒होत्रं जु॑हुयात् ।
प्रजा॑तमे॒वैनं॑ जुहोति । ह॒विर्निर्व॑प्स्यन्-दश॑होतारं व्याचक्षीत । प्रजा॑तमे॒वैनं॑ निर्वपति । सा॒मि॒धेनी॑-
र॒नुव॑क्ष्यन्-दश॑होतारं व्याचक्षीत । सा॒मि॒धेनी॑रेव सृष्ट्वाऽऽर॒भ्य प्र त॑नुते । अथो॑ य॒ज्ञो वै दश॑होता
। य॒ज्ञमे॒व त॑नुते । 6

TB 2.2.1.7

अ॒भि॒चर॑न्-दश॑होतारं जुह्यात् । नव॑ वै पुरु॑षे प्रा॒णाः । नाभि॑र्दश॒मी । सप्रा॑णमे॒वैन॒-म॒भिच॑रति ।
ए॒ताव॑द्वै पुरु॑षस्य स्वम् । याव॑त् प्रा॒णाः । याव॑दे॒वास्या॑स्ति । तद॒भिच॑रति ॥ स्वकृ॑त् इरि॒णे
जुहो॑ति प्रद॒रे वा॑ । ए॒तद्वा अ॒स्यै निर॑ऋ॒तिगृ॑हीतम् () । निर॑ऋ॒ति गृ॑हीत ए॒वैनं॑ निर॑ऋ॒त्या
ग्रा॒हय॑ति ॥ यद् वा॒चः क्रू॒रम् । तेन॑ वष॑ट्करोति । वा॒च ए॒वैनं॑ क्रू॒रेण॑ प्र वृ॑श्चति । ता॒जगा॑र्ति॒माच्छ॑ति
। 7

(दश॑होता - सृष्ट्या - ऋच्छेद् - व्याचष्टे - रुन्ध - एव त॑नुते - निर॑ऋ॒तिगृ॑हीतं पञ्च च)
(A1)

2.2.2 अनुवाकं 2 - चतुर्होत्रादिमन्त्राणां ऋत्वर्थप्रयोगः

TB 2.2.2.1

प्रजापतिरकामयत द्रुशपूर्णमासौ सृजेयेति । स एतं चतुर्होतार-मपश्यत् । तं मनसाऽनुद्रुत्या हवनीयेऽजुहोत् । ततो वै स द्रुशपूर्णमासावसृजत । तावस्मात् सृष्टावपाक्रामताम् । तौ ग्रहेणा गृह्णात् । तद्गहस्य ग्रहत्वम् । द्रुशपूर्णमासा-वालभमानः । चतुर्होतारं मनसाऽनुद्रुत्या-हवनीये जुहुयात् । द्रुशपूर्णमासावेव सृष्ट्वाऽऽरभ्य प्र तनुते 8

TB 2.2.2.2

ग्रहो भवति । द्रुशपूर्णमासयोः सृष्टयोर्धृत्यै ॥ सोऽकामयत चातुर्मास्यानि सृजेयेति । स एतं पञ्चहोतार-मपश्यत् । तं मनसाऽनुद्रुत्या हवनीयेऽजुहोत् । ततो वै स चातुर्मास्यान्यसृजत । तान्यस्मात् सृष्टान्यपाक्रामन् । तानि ग्रहेणागृह्णात् । तद्गहस्य ग्रहत्वम् । चातुर्मास्यान्यालभमानः 9

TB 2.2.2.3

पञ्चहोतारं मनसाऽनुद्रुत्या हवनीये जुहुयात् । चातुर्मास्यान्येव सृष्ट्वाऽऽरभ्य प्र तनुते । ग्रहो भवति । चातुर्मास्यानां सृष्टानां धृत्यै ॥ सोऽकामयत पशुबन्धं सृजेयेति । स एतं षड्होतार-मपश्यत् । तं मनसाऽनुद्रुत्या हवनीयेऽजुहोत् । ततो वै स पशुबन्धमसृजत । सोऽस्मात् सृष्टो ऽपाक्रामत् । तं ग्रहेणागृह्णात् 10

TB 2.2.2.4

तद्गहस्य ग्रहत्वम् । पशुबन्धेन यक्ष्यमाणः । षड्होतारं मनसाऽनुद्रुत्या हवनीये जुहुयात् । पशुबन्धमेव सृष्ट्वाऽऽरभ्य प्र तनुते । ग्रहो भवति । पशुबन्धस्य सृष्टस्य धृत्यै ॥ सोऽकामयत सौम्य-मद्भरं सृजेयेति । स एतं सप्तहोतार-मपश्यत् । तं मनसाऽनुद्रुत्या हवनीयेऽजुहोत् । ततो वै स सौम्य-मद्भर-मसृजत 11

TB 2.2.2.5

सौऽस्मात् सृष्टोऽपौक्रामत् । तं ग्रहेणागृह्णात् । तद्ग्रहस्य ग्रहत्वम् । दीक्षिष्यमाणः । सप्तहोतारं मनसाऽनुद्भूत्या हवनीये जुहुयात् । सौम्यमेवाद्धरः सृष्ट्वाऽऽरभ्य प्र तनुते । ग्रहो भवति । सौम्यस्याद्धरस्य सृष्टस्य धृत्यै ॥ देवेभ्यो वै यज्ञो न प्राभवत् । तमेतावच्छः समंभरन् 12

TB 2.2.2.6

यथ् संभाराः । ततो वै तेभ्यो यज्ञः प्राभवत् । यथ् संभारा भवन्ति । यज्ञस्य प्रभूत्यै ॥ आतिथ्यमासाद्य व्याचष्टे । यज्ञमुखं वा आतिथ्यम् । मुखत एव यज्ञः संभृत्य प्र तनुते ॥ अयंज्ञो वा एषः । योऽपत्नीकः । न प्रजाः प्र जायेरन् () । पत्नीर्व्याचष्टे । यज्ञमेवाकः । प्रजानां प्रजननाय ॥ उपसथ्सु व्याचष्टे । एतद्वै पत्नीनामायतनम् । स्व एवैनां आयतनेऽव कल्पयति । 13

(तनुत - आलभमानो - ऽगृह्णा - दसृज - ताभर - ज्ञायेरन्थ षट्) (A2)

2.2.3 अनुवाकं 3 - चतुर्होतृपञ्चहोतृमन्त्रग्रहभागयोः पुरुषार्थ प्रयोगः

TB 2.2.3.1

प्रजापति-रकामयत् प्र जायेयेति । स तपोऽतप्यत । स त्रिवृतः स्तोमं-मसृजत । तं पञ्चदशस्तोमो मद्भ्यत उदतृणत् । तौ पूर्वपक्षश्चापरपक्षश्चाभवताम् । पूर्वपक्षं देवा अन्वसृज्यन्त । अपरपक्ष-मन्वसुराः । ततो देवा अभवन् । पराऽसुराः । यं कामयेत् वसीयान्थ स्यादिति 14

TB 2.2.3.2

तं पूर्वपक्षे याजयेत् । वसीयानेव भवति । यं कामयेत् पापीयान्थ-स्यादिति । तमपरपक्षे याजयेत् । पापीयानेव भवति । तस्मात् पूर्वपक्षो ऽपरपक्षात्-करुण्यतरः ॥ प्रजापतिर्वै दशहोता । चतुर्होता पञ्चहोता । षड्होता सप्तहोता । ऋतवः सम्वथ्सुरः 15

TB 2.2.3.3

प्रजाः पशव इमे लोकाः । य एवं प्रजापतिं बहोर्भूयांसं वेद । बहोरेव भूयान् भवति ॥
प्रजापतिरदेवासुरानसृजत । स इन्द्रमपि नासृजत । तं देवा अब्रुवन् । इन्द्रं नो जनयेति ।
सोऽब्रवीत् । यथाऽहं युष्मांस्तपसाऽसृक्षि । एवमिन्द्रं जनयद्धमिति 16

TB 2.2.3.4

ते तपोऽतप्यन्त । त आत्मन्निन्द्रमपश्यन् । तमब्रुवन् । जायस्वेति । सोऽब्रवीत् । किं भागधेय-
मभिजनिष्य इति । ऋतून्थ सम्वत्सरम् । प्रजाः पशून् । इमाल्लोकानित्यब्रुवन् । तं वै
माऽऽहुत्या प्रजनयतेत्यब्रवीत् 17

TB 2.2.3.5

तं चतुरहोत्रा प्राजनयन् ॥ यः कामयेत वीरो म आ जायेतेति । स चतुरहोतारं जुहुयात् ।
प्रजापतिर्वै चतुरहोता । प्रजापतिरेव भूत्वा प्रजायते । जजन्दिन्द्रमिन्द्रियाय स्वाहेति ग्रहेण जुहोति
। आऽस्य वीरो जायते । वीरं हि देवा एतयाऽऽहुत्या प्राजनयन् ॥ आदित्याश्चाङ्गिरसश्च सुवर्गे
लोकेऽस्पृद्धन्त । वयं पूर्वं सुवर्गं लोकमियाम वयं पूर्वं इति 18

TB 2.2.3.6

त आदित्या एतं पञ्चहोतारमपश्यन् । तं पुरा प्रातरनुवाकादाग्नीध्रेऽजुहवुः । ततो वै ते पूर्वं
सुवर्गं लोकमायन् । यः सुवर्गकामः स्यात् । स पञ्चहोतारं पुरा प्रातरनुवाकादाग्नीध्रे जुहुयात्
। सम्वत्सरो वै पञ्चहोता । सम्वत्सरः सुवर्गो लोकः । सम्वत्सर एवर्तुषु प्रतिष्ठाय । सुवर्गं
लोकमेति ॥ तैब्रुवन्-नङ्गिरस आदित्यान् 19

TB 2.2.3.7

क्व॑ स्थ । क्व॑ वः सु॒द्ध्यो ह॒व्यं व॑क्ष्याम॒ इति॑ । छन्दः॑ स्वित्य॑ब्रुवन् । गा॒य॒त्रि॒यां त्रि॑ष्टुभि॒-जग॑त्यामिति॑ । तस्मा॒च्छन्दः॑ सु सु॒द्ध्य आ॑दित्येभ्यः । आ॒ङ्गी॒र॒सीः प्र॒जा ह॒व्यं व॑हन्ति । वह॑न्त्यस्मै प्र॒जा ब॒लिम् । ऐ॒न॒मप्र॑तिख्यातं गच्छति । य ए॒वं वेद॑ ॥ द्वा॒द॒श॒ मा॒साः पञ्च॑तवः () । त्रय॑ इ॒मे लो॒काः । अ॒सावा॑दित्य॒ एक॑वि॒ंशः । ए॒तस्मिन् वा ए॒ष श्रि॑तः । ए॒तस्मिन्-प्रति॑ष्ठितः । य ए॒वमे॒तश्च॑ श्रि॒तं प्रति॑ष्ठितं वेद॑ । प्रत्ये॒व ति॑ष्ठति । 20

(स्यादिति - सम्वत्सरो - जनयद्धमिती - त्यब्रवीत् - पूर्व इत्या - दित्यान् - ऋतवः षट्)
(A3)

2.2.4 अनुवाकं 4 - जगत् सृष्टिकथनमुखेन होतृमन्त्रप्रशंसा

TB 2.2.4.1

प्र॒जाप॑ति-रकामयत् प्र॒जाये॑येति॑ । स ए॒तं द॑श॒हो॒तार॑-मपश्यत् । तेन॑ द॒श॒धा ऽऽत्मानं॑ वि॒धाय॑ । द॒श॒हो॒त्रा ऽत॑प्यत । तस्य॑ चि॒त्तिः सु॒गासी॑त् । चि॒त्तमा॑ज्यम् । तस्यै॒तावत्ये॒व वा॒गासी॑त् । ए॒तावा॑न्, य॒ज्ञ॒क्रतुः॑ ॥ स चतु॑र॒हो॒तार॑-मसृजत । सोऽन॑न्दत् 21

TB 2.2.4.2

असृ॑क्षि वा इ॒ममि॑ति॑ । तस्य॑ सोमो॑ ह॒विरासी॑त् । स चतु॑र॒हो॒त्रा ऽत॑प्यत । सोऽता॑म्यत् । स भू॒रिति॑ व्याह॑रत् । स भूमि॑मसृजत । अ॒ग्नि॒हो॒त्रं द॑र॒शपूर्ण॑मा॒सौ यजू॑ंषि । स द्वि॒तीयं॑ मतप्यत । सोऽता॑म्यत् । स भुव॑ इति॒ व्याह॑रत् 22

TB 2.2.4.3

सोऽन्त॑रि॒क्ष-म॑सृजत । चा॒तु॒र्मा॒स्यानि॑ सा॒मानि॑ । स तृ॒तीयं॑ मतप्यत । सोऽता॑म्यत् । स सु॒व॒रिति॑ व्याह॑रत् । स दि॒वं म॑सृजत । अ॒ग्नि॒ष्टो॒म-मु॒क्थ्यं-मति॑रात्रमृचः । ए॒ता वै व्याह॑तय इ॒मे लो॒काः । इ॒मान् खलु॑ वै लो॒काननु॑ प्र॒जाः प॒शव॑श्छन्दा॑ंसि प्राजा॑यन्त । य ए॒वमे॒ताः प्र॒जाप॑तेः प्रथ॑मा

व्याहृतीः प्रजाता वेद 23

TB 2.2.4.4

प्र प्रजायां पशुभिर्-मिथुनैर्-जायते ॥ स पञ्चहोतार-मसृजत । स हविर्ना-विन्दत । तस्मै सोम-
स्तनुवं प्रायच्छत् । एतत् ते हविरिति । स पञ्चहोत्रा ऽतप्यत । सोऽताम्यत् । स प्रत्यङ्मुखाधत् ।
। सोऽसुरा-नसृजत । तदस्या प्रियमासीत् 24

TB 2.2.4.5

तद्-दुर्वर्णः हिरण्यमभवत् । तद्-दुर्वर्णस्य हिरण्यस्य जन्म । स द्वितीयमतप्यत । सोऽताम्यत्
। स प्राङ्मुखाधत् । स देवानसृजत । तदस्य प्रियमासीत् । तथ सुवर्णः हिरण्यमभवत् । तथ
सुवर्णस्य हिरण्यस्य जन्म । य एव सुवर्णस्य हिरण्यस्य जन्म वेद 25

TB 2.2.4.6

सुवर्ण आत्मना भवति । दुर्वर्णोऽस्य भ्रातृव्यः । तस्मात् सुवर्णः हिरण्यं भार्यम् । सुवर्ण एव
भवति । ऐनं प्रियं गच्छति नाप्रियम् ॥ स सप्तहोतार-मसृजत । स सप्तहोत्रैव सुवर्गं लोकमेति ॥
त्रिणवेन स्तोमेनैभ्यो लोकेभ्योऽसुरान् प्राणुदत् । त्र्यस्त्रिंशेन प्रत्यतिष्ठत् । एकविंशेन रुचमधत्
26

TB 2.2.4.7

सप्तदशेन प्राजायत । य एवं विद्वान् सोमेन यजते । सप्तहोत्रैव सुवर्गं लोकमेति । त्रिणवेन
स्तोमेनैभ्यो लोकेभ्यो भ्रातृव्यान्-प्रणुदते । त्र्यस्त्रिंशेन प्रति तिष्ठति । एकविंशेन रुचं धत्ते ।
सप्तदशेन प्राजायते । तस्मात्-सप्तदशः स्तोमो न निरुह्यः । प्रजापतिं वै सप्तदशः । प्रजापतिमेव
मद्ध्यतो धत्ते प्रजात्यै () । 27

(अ॒न॒न्द॒द् - भुव॒ इति॒ व्याह॑र॒द् - वेदा॑ - सी॒द् - वेदा॑ - धत्तु॒ - प्रजा॑त्यै) (A4)

2.2.5 अनुवाकं 5 - दक्षिणाप्रतिग्रहमन्त्रव्याख्यानम्

TB 2.2.5.1

दे॒वा वै वरु॑णमयाजयन् । स यस्यै॑ यस्यै॑ दे॒वता॑यै॑ दक्षि॑णा॒मन॑यत् । ताम॑व्लीनात् । ते॒ऽब्रु॑वन् ।
व्यावृ॑त्य॒ प्रति॑ गृह्णाम । तथा॑ नो॒ दक्षि॑णा॒ न व्ले॑ष्यतीति॑ । ते व्यावृ॑त्य॒ प्रत्य॑गृह्णन् । ततो॒ वै तां॑
दक्षि॑णा॒ नाव्ली॑नात् । य ए॒वं वि॒द्वान् व्यावृ॑त्य॒ दक्षि॑णां प्रतिगृह्णाति॑ । नैनं॑ दक्षि॑णा व्लीनाति ।
28

TB 2.2.5.2

राजा॑ त्वा वरु॑णो नयतु दे॒वि दक्षि॑णेऽ॒ग्नये॑ हि॒र॒ण्य॒मित्या॑ह । आ॒ग्नेयं॑ वै हि॒र॒ण्यम् । स्वयै॑वैन॑द्-दे॒वता॑या॒
प्रति॑ गृह्णाति । सोमा॑य॒ वासु॑ इत्या॑ह । सौ॒म्यं वै वासः॑ । स्वयै॑वैन॑द्-दे॒वता॑या॒ प्रति॑ गृह्णाति ।
रु॒द्राय॑ गा॒मित्या॑ह । रौ॒द्री वै गौः॑ । स्वयै॑वैना॑ दे॒वता॑या॒ प्रति॑ गृह्णाति । वरु॑णा॒याश्च॑मित्या॑ह 29

TB 2.2.5.3

वा॒रु॒णो वा अ॒श्वः । स्वयै॑वैन॑ दे॒वता॑या॒ प्रति॑ गृह्णाति । प्रा॒जाप॑तये॒ पुरु॑ष॒मित्या॑ह । प्रा॒जाप॑त्यो वै
पुरु॑षः । स्वयै॑वैन॑ दे॒वता॑या॒ प्रति॑ गृह्णाति । मन॑वे॒ तल्प॑मित्या॑ह । मा॒न॒वो वै तल्पः॑ । स्वयै॑वैन॑
दे॒वता॑या॒ प्रति॑ गृह्णाति । उ॒त्ता॒नाया॑ङ्गीर॒सायान्॑ इत्या॑ह । इ॒यं वा उ॑त्ता॒न आ॑ङ्गीर॒सः 30

TB 2.2.5.4

अ॒न॒यै॒वैन॑त्-प्रति॑ गृह्णाति ॥ वै॒श्वान॑र्या॒र्चा रथं॑ प्रति॑ गृह्णाति । वै॒श्वान॑रो वै दे॒वता॑या॒ रथः॑ । स्वयै॑वैन॑
दे॒वता॑या॒ प्रति॑ गृह्णाति ॥ तेना॑मृ॒तत्व॑म॒श्या॒-मित्या॑ह । अ॒मृत॑मे॒वात्म॑न्-ध॒त्ते ॥ वयो॑ दा॒त्र इत्या॑ह ।
वयं॑ ए॒वैनं॑ कृ॒त्वा । सु॒व॒र्गं लो॑कं ग॒मय॑ति ॥ मयो॑ म॒ह्यम॑स्तु॒ प्रति॑ग्रही॒त्र इत्या॑ह 31

TB 2.2.5.5

यद्वै शिवम् । तन्मयः । आत्मन एवैषा परीतिः ॥ क इदं कस्मा अदादित्याह । प्रजापतिर्वै
कः । स प्रजापतये ददाति ॥ कामः कामयेत्याह । कामेन हि ददाति । कामेन प्रतिगृह्णाति
॥ कामो दाता कामः प्रति ग्रहीतेत्याह 32

TB 2.2.5.6

कामो हि दाता । कामः प्रति ग्रहीता ॥ कामश्च समुद्र-माविशेत्याह । समुद्र इव हि कामः । नेव
हि कामस्यान्तोऽस्ति । न समुद्रस्य ॥ कामेन त्वा प्रति गृह्णामीत्याह । येन कामेन प्रति गृह्णाति
। स एवैनमुष्मिन्लोके काम आगच्छति ॥ कामैतत्त एषा ते काम दक्षिणेत्याह () । काम
एव तद्-यजमानोऽमुष्मिन्लोके दक्षिणामिच्छति । न प्रतिग्रहीतरि ॥ य एवं विद्वान्-दक्षिणां
प्रतिगृह्णाति । अनृणामेवैनां प्रति गृह्णाति । 33

(व्लीनात्य - श्रुमित्याहा - झिरुसः - प्रतिग्रहीत्र इत्याह - प्रतिग्रहीतेत्याह - दक्षिणेत्याह चत्वारि
च) (A5)

2.2.6 अनुवाकं 6 - द्वादशाहदशमेऽहनि होतृमन्त्राः

TB 2.2.6.1

अन्तो वा एष यज्ञस्य । यद्-दशममहः । दशमेऽहन्थ-सर्पराज्ञियां ऋग्भिः स्तुवन्ति । यज्ञस्यैवान्तं
गृत्वा । अन्नाद्यमवरुन्धते ॥ तिसृभिः स्तुवन्ति । त्रयं इमे लोकाः । एभ्य एव लोकेभ्योऽन्नाद्यमवरुन्धते
। पृश्निवतीर्भवन्ति । अन्नं वै पृश्नि 34

TB 2.2.6.2

अन्नमेवावरुन्धते ॥ मनसा प्रस्तौति । मनसोद्गायति । मनसा प्रति हरति । मन इव हि प्रजापतिः
। प्रजापतेरास्यै ॥ देवा वै सर्पाः । तेषामियं राज्ञी । यथ-सर्पराज्ञियां ऋग्भिः स्तुवन्ति ।

अस्यामेव प्रति तिष्ठन्ति । 35

TB 2.2.6.3

चतुर॑ होतृन् होता॑ व्याचष्टे । स्तुतमनु॑शसति शान्त्यै॑ ॥ अन्तो॑ वा एष य॒ज्ञस्य॑ । यद्-द॑शममहः । एतत् खलु॑ वै देवानां॑ पर॒मं गुह्यं॑ ब्रह्म । यच्चतुर॑ होतारः । दश॑मेऽहश्चतुर॑ होतृन् व्याचष्टे । य॒ज्ञस्यै॒वान्तं॑ ग॒त्वा । पर॒मं देवानां॑ गुह्यं ब्रह्मा॑वरुन्धे । तदे॒व प्रका॑शं गमयति 36

TB 2.2.6.4

तदे॒नं प्रका॑शं ग॒तम् । प्रका॑शं प्र॒जानां॑ गमयति ॥ वाचं॑ यच्छति । य॒ज्ञस्य॑ धृत्यै॑ ॥ यज॑मानदे॒वत्यं॑ वा अहः॑ । भ्रातृ॑व्यदे॒वत्या॑ रात्रिः । अह्ना॑ रात्रिं ध्यायेत् । भ्रातृ॑व्यस्यै॒व तल्लो॑कं वृ॒द्धे । यदि॒वा वाचं॑ विसृ॒जेत् । अह॑र्भ्रातृ॑व्यायोच्छि॒षेत् () । यन्न॑क्तं विसृ॒जेत् । रात्रिं॑ भ्रातृ॑व्यायोच्छि॒षेत् । अधि॑वृक्षसूर्ये॒ वाचं॑ विसृ॒जति । एता॑वन्तमे॒वास्मै॑ लो॒कमुच्छि॑षति । याव॑दादित्यो॑ऽस्तमेति॑ । 37

(पृश्नि - तिष्ठन्ति - गमयति - शिषेत् पञ्च च) (A6)

2.2.7 अनुवाकं 7 - सप्तहोतृमन्त्रसाध्ययज्ञप्रशंसा

TB 2.2.7.1

प्र॒जाप॑तिः प्र॒जा अ॑सृजत । ताः सृ॒ष्टाः सम॑श्लिष्यन् । ता रू॒पेणा॑नु प्रावि॑शत् । तस्मा॑दाहुः । रू॒पं वै प्र॒जाप॑तिरिति॑ । ता नाम्ना॑ऽनु प्रावि॑शत् । तस्मा॑दाहुः । नाम॒ वै प्र॒जाप॑तिरिति॑ । तस्मा॑दप्या॑ऽमित्रौ स॒गंत्य॑ । नाम्ना॑ चेद्धयेते 38

TB 2.2.7.2

मि॒त्रमे॒व भ॑वतः ॥ प्र॒जाप॑तिर् दे॒वासुरा॑नसृजत । स इन्द्र॑मपि नासृ॑जत । तं दे॒वा अ॑ब्रुवन् । इन्द्रं॑ नो ज॒नये॑ति । स आ॒त्म-न्निन्द्र॑-मपश्यत् । तम॑सृजत । तं त्रि॒ष्टुग्-वी॒र्यं भू॒त्वाऽनु प्रावि॑शत् । तस्य॑

वज्रः पञ्चदशो हस्तु आपद्यत । तेनोदय्यासुरानभ्य भवत् । 39

TB 2.2.7.3

य एवं वेद । अ॒भि भ्रातृ॑व्यान् भवति ॥ ते दे॒वा असुरै॑र-विजित्य । सु॒वर्गं लो॒कमा॑यन् । तेऽमु॒ष्मिन् लो॒के व्य॑क्षु॒द्वय॑न् । तेऽब्रु॑वन् । अ॒मुतः प्र॑दानं वा उप॑जिजीविमेति । ते स॒प्तहो॑तारं य॒ज्ञं वि॒धाय॑यास्यम् । आ॒ङ्गीर॑सं प्राहि॑ण्वन् । एतेना॒मुत्र॑ कल्प॑येति 40

TB 2.2.7.4

तस्य॑ वा इ॒यं कृ॒षिः । यदि॑दं किं च । य एवं वेद । कल्प॑तेऽस्मै । स वा अ॒यं म॑नुष्येषु य॒ज्ञः स॒प्तहो॑ता । अ॒मुत्र॑ स॒द्भ्यो दे॒वेभ्यो॑ ह॒व्यं वह॑ति । य एवं वेद । उपै॑नं य॒ज्ञो न॑मति ॥ सोऽम॑न्यत । अ॒भि वा इ॒मेऽस्मा॑-ल्लो॒कादमु॑ल्लो॒कं क॑मिष्यन्त इति () । स वाच॑स्पते ह॒दिति॑ व्याह॑रत् । तस्मा॑त् पु॒त्रो ह॑दयम् । तस्मा॑दु॒स्मा-ल्लो॒कादमु॑ल्लो॒कं ना॑भिका॑मयन्ते । पु॒त्रो हि ह॑दयम् । 41

(ह्वयेत - अभवत् - कल्पये - तीति चत्वारि च) (A7)

2.2.8 अनुवाकं 8 - होतृमन्त्राणां सोमयागाङ्गत्वम्

TB 2.2.8.1

दे॒वा वै चतु॑र॒होतृ॑भिर्-य॒ज्ञम॑तन्वत । ते वि पा॒प्मना॑ भ्रातृ॑व्येणाज॑यन्त । अ॒भि सु॒वर्गं लो॒कम॑जयन् । य एवं वि॒द्वाश्च॑तु॒र॒होतृ॑भिर्य॒ज्ञं त॑नुते । वि पा॒प्मना॑ भ्रातृ॑व्येण ज॑यते । अ॒भि सु॒वर्गं लो॒कं ज॑यति ॥ ष॒ड्वो॒त्रा प्रा॑यणीय॒मासा॑दयति । अ॒मुष्मै॑ वै लो॒काय॑ ष॒ड्वो॒ता । घ्नन्ति॑ खलु॒ वा ए॒तथ॑ सोम॑म् । यद॑भिषु॒ण्वन्ति॑ 42

TB 2.2.8.2

ऋ॒जुधै॑वैन॑ममु॒ल्लो॒कं ग॑मयति । चतु॑र॒हो॒त्रा ऽऽति॑त्थ्यम् । यशो॑ वै चतु॒र॒हो॒ता । यश॑ ए॒वात्म॑न्-ध॑त्ते

। पञ्चहोत्रा पशुमुप सादयति । सुवर्ग्यो वै पञ्चहोता । यजमानः पशुः । यजमानमेव सुवर्गं
लोके गमयति । ग्रहान्-गृहीत्वा सप्तहोतारं जुहोति । इन्द्रियं वै सप्तहोता 43

TB 2.2.8.3

इन्द्रियमेवात्मन्-धत्ते ॥ यो वै चतुरहोतृ-ननुसवनं तर्पयति । तृप्यति प्रजयां पशुभिः । उपैनः
सोमपीथो नमति । बहिष्पवमाने दशहोतारं व्याचक्षीत । माद्वयन्दिने पवमाने चतुरहोतारम्
। आर्भवे पवमाने पञ्चहोतारम् । पितृयज्ञे षड्होतारम् । यज्ञायज्ञियस्य स्तोत्रे सप्तहोतारम् ।
अनुसवनमेवैनां स्तर्पयति 44

TB 2.2.8.4

तृप्यति प्रजयां पशुभिः । उपैनः सोमपीथो नमति ॥ देवा वै चतुरहोतृभिः सूत्रमांसत ।
ऋद्धिपरिमितं यशस्कामाः । तैऽब्रुवन् । यन्नः प्रथमं यशं ऋच्छात् । सर्वेषां नस्तथ-सहासुदिति
। सोमश्चतुरहोत्रा । अग्निः पञ्चहोत्रा । धाता षड्होत्रा 45

TB 2.2.8.5

इन्द्रः सप्तहोत्रा । प्रजापतिर्-दशहोत्रा । तेषां सोमः राजानं यशं आर्च्छत् ॥ तन्न्यकामयत्
। तेनापीक्रामत् । तेन प्रलायमचरत् । तं देवाः प्रैषैः प्रैषमैच्छन् । तत्-प्रैषाणां प्रैषत्वम् ।
निविद्भिर्न्यवेदयन् । तन्निविदां निवित्त्वम् 46

TB 2.2.8.6

आप्रीभिरामुवन् । तदाप्रीणामाप्रित्वम् । तमग्नन् । तस्य यशो व्यगृह्यत । ते ग्रहा अभवन् ।
तद्ग्राणां ग्रहत्वम् । यस्यैवं विदुषो ग्रहा गृह्यन्ते । तस्य त्वेव गृहीताः ॥ तैऽब्रुवन् । यो वै नः
श्रेष्ठोऽभूत् 47

TB 2.2.8.7

तमवधिष्म । पुनरिमः सुवामहा इति । तं छन्दोभि-रसुवन्त । तच्छन्दसां छन्दस्त्वम् । साम्ना समानयन् । तथ साम्नः सामत्वम् । उक्थै-रुदस्थापयन् । तदुक्थानां-मुक्थत्वम् । य एवं वेद । प्रत्येव तिष्ठति 48

TB 2.2.8.8

सर्वमायुरेति ॥ सोमो वै यशः । य एवं विद्वान्थ-सोममागच्छति । यश एवैनमृच्छति । तस्मादाहुः । यश्चैवं वेद यश्च न । तावुभौ सोम-मागच्छतः । सोमो हि यशः । तं त्वाऽव यश ऋच्छतीत्याहुः । यः सोमे सोमं प्राहेति () । तस्माथ-सोमे सोमः प्रोच्यः । यश एवैनमृच्छति । 49

(अभिषुण्वन्ति - सप्तहोता - तर्पयति - षड्विंश - निवित्त्व - मभूत् - तिष्ठति - प्राहेति द्वे च) (A8)

2.2.9 अनुवाकं 9 - होतृमन्त्रोत्पत्तिकथनप्रसङ्गेन जगत् सृष्टिः

TB 2.2.9.1

इदं वा अग्रे नैव किञ्चनासीत् । न द्यौरासीत् । न पृथिवी । नान्तरिक्षम् । तदसदेव सन्मनो ऽकुरुत् स्यामिति । तदतप्यत । तस्मात्-तेषां नाद्भूतोऽजायत । तद्-भूयोऽतप्यत । तस्मात्-तेषां नादग्नि-रजायत । तद्-भूयोऽतप्यत 50

TB 2.2.9.2

तस्मात्-तेषां नाज्योति-रजायत । तद्-भूयोऽतप्यत । तस्मात्-तेषां नादुर्चि-रजायत । तद्-भूयोऽतप्यत । तस्मात्-तेषां नान्मरीचयोऽजायन्त । तद्-भूयोऽतप्यत । तस्मात्-तेषां नादुदारा अजायन्त । तद्-भूयोऽतप्यत । तदुभ्रमिव समहन्यत ॥ तद्-वस्तिमभिनत् 51

TB 2.2.9.3

स संमुद्रोऽभवत् । तस्माँश्च-समुद्रस्य न पिबन्ति । प्रजननमिव हि मन्यन्ते । तस्माँत् पशोर-
जायमानादापः पुरस्ताद्-यन्ति ॥ तद्-दशहोताऽन्वसृज्यत । प्रजापतिर्वै दश होता ॥ य एवं
तपसो वीर्यं विद्वाश्स्तप्यते । भवत्येव ॥ तद्वा इदमापः सलिल-मासीत् । सोऽरोदीत्-प्रजापतिः
52

TB 2.2.9.4

स कस्माँ अग्नि । यद्-यस्या अप्रतिष्ठाया इति । यदुफस्व-वापद्यत । सा पृथिव्यभवत् । यद्वयमृष्ट
। तदुन्तरिक्ष-मभवत् । यदूर्ध्व-मुदमृष्ट । सा द्यौरभवत् । यदरोदीत् । तदुनयो रोदुस्त्वम् 53

TB 2.2.9.5

य एवं वेद । नास्य गृहे रुदन्ति । एतद्वा एषाँ लोकानां जन्म । य एवमेषाँ लोकानां जन्म
वेद । नैषु लोके-ष्वार्तिमाच्छति । स इमां प्रतिष्ठा-मविन्दत ॥ स इमां प्रतिष्ठां वित्त्वा ऽकामयत्
प्रजायेयेति । स तपोऽतप्यत । सोऽन्तर्वा-नभवत् । स जघनादसुरा-नसृजत 54

TB 2.2.9.6

तेभ्यो मृन्मये पात्रेऽन्नमदुहत् । याऽस्य सा तनूरासीत् । तामपाहत । सा तमिस्राऽभवत् ॥
सोऽकामयत् प्रजायेयेति । स तपोऽतप्यत । सोऽन्तर्वा-नभवत् । स प्रजननादेव प्रजा असृजत
। तस्मादिमा भूयिष्ठाः । प्रजननाद्वयेना असृजत 55

TB 2.2.9.7

ताभ्यो दारुमये पात्रे पयोऽदुहत् । याऽस्य सा तनूरासीत् । तामपाहत । सा जोश्र्वाऽभवत् ॥
सोऽकामयत् प्रजायेयेति । स तपोऽतप्यत । सोऽन्तर्वा-नभवत् । स उपपक्षाभ्या-मेवर्तूनसृजत ।

तेभ्यो॑ रज॒ते पात्रे॑ घृतम॑दुहत् । याऽस्य॑ सा त॒नूरासीत् ॥ 56

TB 2.2.9.8

तामपा॑हत । सोऽहोरा॒त्रयोः॑ स॒न्धि-र॑भवत् ॥ सोऽकाम॑यत् प्रजा॑येयेति॑ । स तपोऽत॑प्यत । सोऽन्त॑र्वा॒नभवत् । स मुखा॑द्-देवा॒नसृ॑जत । तेभ्यो॑ हरि॑ते पात्रे सोम॑मदुहत् । याऽस्य॑ सा त॒नूरासीत् । तामपा॑हत । तदह॑रभवत् । 57

TB 2.2.9.9

एते॑ वै प्रजाप॑तेर्दोहाः॑ । य एवं॑ वेद॑ । दुह॑ एव प्रजाः ॥ दिवा॒ वै नोऽभू॑दिति॑ । तद्-देवानां॑ देव॒त्वम् । य एवं॑ देवानां॑ देव॒त्वं वेद॑ । देवाने॑व भवति ॥ एतद्वा अ॑होरा॒त्राणां॑ जन्म॑ । य एवम॑होरा॒त्राणां॑ जन्म॑ वेद॑ । नाहोरा॒त्रेष्वार्ति॑माच्छति॑ । 58

TB 2.2.9.10

असृ॑तोऽधि॒ मनोऽसृ॑ज्यत । मनः॑ प्रजाप॑ति-मसृजत । प्रजाप॑तिः प्रजा अ॑सृजत । तद्वा इ॒दं मन॑स्येव पर॑मं प्रति॑ष्ठितम् । यद्वि॒दं किंच॑ । तदेतच्छ्रो॑वस्य॒ संनाम॑ ब्रह्म॑ ॥ व्युच्छ॑न्ती व्युच्छ॑न्त्यस्मै वस्य॑सी वस्य॑सी व्युच्छति॑ । प्रजा॑यते प्रजयां॑ प॒शुभिः॑ । प्र पर॑मेष्ठिनो॒ मात्रा॑-माप्नोति । य एवं॑ वेद॑ () । 59

special korvai

(इ॒दं धूमो॑ ऽग्निर् ज्योति॑ र॒र्चिर् मरी॑चय उ॒दारा॑ स्तद॒भ्रः / स ज॒घना॑थ सा तमि॑स्त्रा स प्र॒जन॑नाथ सा जो॒श्त्रा स उ॑प॒पक्षा॑भ्याः सोऽहोरा॒त्रयोः॑ स॒न्धिः समु॑खात् तदह॑र देव॒वांन् / मृ॒न्मये॑ दारु॒मये॑ रज॒ते हरि॑ते तेभ्य॒स्ताभ्यो॑ द्वे तेभ्योऽन्नं॑ पयो॑ घृतः॑ सोम॑म्)

(अ॒ग्निर॑जायत् तद्भूयोऽत॑प्यता - भिनद - रोदीत् प्रजाप॑ती - रोदु॑स्त्व - म॑सृज - तासृ॑जत - घृतम॑दुहद्वाऽस्य॑ सा त॒नूरासी॑ - दह॑रभवद् - ऋच्छति॑ - वेद॑) (A9)

2.2.10 अनुवाकं 10 - देवसृष्टिमध्येऽवस्थितस्येन्द्रस्य देवताधिपतित्वम्

TB 2.2.10.1

प्रजापति-रिन्द्रमसृज-तानुजावरं देवानांम् । तं प्राहिणोत् । परोहि । एतेषां देवाना-मधिपतिरेधीति । तं देवा अब्रुवन् । कस्त्वमसि । वयं वै त्वच्छ्रेयांसः स्म इति । सोऽब्रवीत् । कस्त्वमसि वयं वै त्वच्छ्रेयांसः स्म इति मा देवा अवोचन्निति ॥ अथ वा इदं तरहि प्रजापतौ हर आसीत् 60

TB 2.2.10.2

यदुस्मिन्नादित्ये । तदेनमब्रवीत् । एतन्मे प्रयच्छ । अथाहमेतेषां देवाना-मधिपतिर्भविष्यामीति । कोह-स्यामित्यब्रवीत् । एतत् प्रदायेति । एतथ-स्या इत्यब्रवीत् । यदेतद्वीषीति । को ह वै नाम प्रजापतिः । य एवं वेद 61

TB 2.2.10.3

विदुरेनं नाम्ना । तदस्मै रुक्मं कृत्वा प्रत्यमुञ्चत् । ततो वा इन्द्रो देवाना-मधिपति-रभवत् । य एवं वेद । अधिपतिरेव समानानां भवति ॥ सोऽमन्यत । किं किं वा अकर्मिति । स चन्द्रं म आहरेति प्रालपत् । तच्चन्द्रमस-श्चन्द्रमस्त्वम् । य एवं वेद 62

TB 2.2.10.4

चन्द्रवानेव भवति ॥ तं देवा अब्रुवन् । सुवीर्यो ऽमर्या यथा गोपायत् इति । तथ सूर्यस्य सूर्यत्वम् । य एवं वेद । नैनं दध्नोति ॥ कश्च नास्मिन्वा इदमिन्द्रियं प्रत्यस्थादिति । तदिन्द्र-स्येन्द्रत्वम् । य एवं वेद । इन्द्रियाव्येव भवति । 63

TB 2.2.10.5

अयं वा इदं परमोऽभूदिति । तत्-परमेष्ठिनः परमेष्ठित्वम् । य एवं वेद । परमामेव काष्ठां गच्छति ॥ तं देवाः समन्तं पर्यविशन् । वसंवः पुरस्तात् । रुद्रा दक्षिणतः । आदित्याः पश्चात् । विश्वे

देवा उत्तरतः । अङ्गिरसः प्रत्यञ्चम् 64

TB 2.2.10.6

साद्ध्याः पराञ्चम् । य एवं वेद । उपैतः समानाः सं विंशन्ति ॥ स प्रजापतिरेव भूत्वा प्रजा आवयत् । ता अस्मै नातिष्ठन्तान्नाद्याय । ता मुखं पुरस्तात्-पश्यन्तीः । दक्षिणतः पर्यायन् । स दक्षिणतः पर्यवर्तयत् । ता मुखं पुरस्तात्-पश्यन्तीः । मुखं दक्षिणतः 65

TB 2.2.10.7

पश्चात्-पर्यायन् । स पश्चात्-पर्यवर्तयत् । ता मुखं पुरस्तात्-पश्यन्तीः । मुखं दक्षिणतः । मुखं पश्चात् । उत्तरतः पर्यायन् । स उत्तरतः पर्यवर्तयत् । ता मुखं पुरस्तात्-पश्यन्तीः । मुखं दक्षिणतः । मुखं पश्चात् () 66

TB 2.2.10.8

मुखमुत्तरतः । ऊर्द्धा उदायन् । स उपरिष्ठान्यवर्तयत् । ताः सर्वतोमुखो भूत्वा ऽऽवयत् । ततो वै तस्मै प्रजा अतिष्ठन्तान्नाद्याय ॥ य एवं विद्वान् परि च वर्तयते नि च । प्रजापतिरेव भूत्वा प्रजा अंति । तिष्ठन्तेऽस्मै प्रजा अन्नाद्याय । अन्नाद एव भवति । 67

(आसीद् - वेद - चन्द्रमस्त्वं य एवं वेद - न्द्रियाव्येव भवति - प्रत्यञ्च - मुखं दक्षिणतो - मुखं पश्चान् - +नव च) (A10)

2.2.11 अनुवाकं 11 - होतृमन्त्राणां पुरुषार्थप्रयोगः

TB 2.2.11.1

प्रजापति-रकामयत् बृहोर्भूयान्-स्यामिति । स एतं दशहोतार-मपश्यत् । तं प्रायुङ्क्त । तस्य प्रयुक्तिं बृहोर्भूयानभवत् । यः कामयेत् बृहोर्भूयान्-स्यामिति । स दशहोतारं प्रायुञ्जीत । बृहोरेव भूयान्-

भवति ॥ सोऽकामयत वीरो म आजायेतेति । स दशहोतुश्चतुरहोतारं निरमिमीत । तं प्रायुङ्क्त 68

TB 2.2.11.2

तस्य प्रयुक्तीन्द्रोऽजायत । यः कामयेत वीरो म आजायेतेति । स चतुरहोतारं प्रयुञ्जीत । आऽस्य वीरो जायते ॥ सोऽकामयत पशुमान्ध्र-स्यामिति । स चतुरहोतुः पञ्चहोतारं निरमिमीत । तं प्रायुङ्क्त । तस्य प्रयुक्तिः पशुमानभवत् । यः कामयेत पशुमान्ध्र-स्यामिति । स पञ्चहोतारं प्रयुञ्जीत 69

TB 2.2.11.3

पशुमानेव भवति ॥ सोऽकामयतर्तवो मे कल्पेरन्निति । स पञ्चहोतुः षड्होतारं निरमिमीत । तं प्रायुङ्क्त । तस्य प्रयुक्त्यृतवोऽस्मा अकल्पन्त । यः कामयेतर्तवो मे कल्पेरन्निति । स षड्होतारं प्रयुञ्जीत । कल्पन्तेऽस्मा ऋतवः ॥ सोऽकामयत सोमपः सोमयाजी स्याम् । आ मे सोमपः सोमयाजी जायेतेति 70

TB 2.2.11.4

स षड्होतुः सप्तहोतारं निरमिमीत । तं प्रायुङ्क्त । तस्य प्रयुक्तिः सोमपः सोमयाज्यभवत् । आऽस्य सोमपः सोमयाज्यजायत । यः कामयेत सोमपः सोमयाजी स्याम् । आ मे सोमपः सोमयाजी जायेतेति । स सप्तहोतारं प्रयुञ्जीत । सोमप एव सोमयाजी भवति । आऽस्य सोमपः सोमयाजी जायते ॥ स वा एष पशुः पञ्चधा प्रति तिष्ठति 71

TB 2.2.11.5

पृद्धिर्मुखेन ॥ ते देवाः पशून् वित्त्वा । सुवर्गं लोकमायन् ॥ तेऽमुष्मिन्लोके व्यंक्षुद्वयन् । तेऽब्रुवन् । अमुतः प्रदानं वा उपजिजीविमेति । ते सप्तहोतारं यज्ञं विधाययास्यं । आङ्गीरसं प्राहिण्वन् । एतेनामुत्रं कल्पयेति । तस्य वा इयं कृषिः 72

TB 2.2.11.6

यदिदं किञ्च । य एवं वेद । कल्पतेऽस्मै । स वा अयं मनुष्येषु यज्ञः सप्तहोता । अमुत्र सद्भ्यो देवेभ्यो हव्यं वहति । य एवं वेद । उपैतं यज्ञो नमति ॥ यो वै चतुरहोतृणां निदानं वेद । निदानवान् भवति । अग्निहोत्रं वै दशहोतुर्निदानम् () । दशपूर्णमासौ चतुरहोतुः । चातुर्मास्यानि पञ्च होतुः । पशुबन्धः षड्होतुः । सौम्योऽद्धरः सप्तहोतुः । एतद्वै चतुरहोतृणां निदानम् । य एवं वेद । निदानवान् भवति । 73

(अग्निमीत तं प्रायुङ्क्त - पञ्चहोतारं प्रयुञ्जित - जायेतेति - तिष्ठति - कृषिर् - दशहोतुर् निदानं सप्त च) (A11)

PrapAtaka Korvai with starting words of 1 to11 anuvAkams :-

(प्रजापतिरकामयत प्रजाः सृजेयेति - प्रजापतिरकामयत दशपूर्णमासौ सृजेयेति - प्रजापतिरकामयत प्रजायेयेति स तपः स त्रिवृतं - प्रजापतिरकामयत दशहोतारं तेन दशधाऽऽत्मानं - देवा वै वरुण - मन्तो वै - प्रजापतिस्ताः सृष्टाः समंश्लिष्यन् - देवा वै चतुरहोतृभि - रिदं वा अग्रे - प्रजापतिरिन्द्रं - प्रजापतिरकामयत ब्रह्मर्भूयानेकादश)

korvai with starting words of 1, 11, 21 series of daSinis :-

(प्रजापति - स्तद्धहस्य - प्रजापतिरकामयता - नयैवैनत् - तस्य वा इयं कृषि - स्तस्मात् तेपानाज्योतिर् - यदस्मिन्नादित्ये - सषड्होतुः सप्तहोतारं त्रिसप्ततिः)

first and last word - 2nd aShTakam , 2nd prapATakam :-

(प्रजापतिरकामयत - निदानवान्भवति)

2.2 द्वितीयाष्टके द्वितीयः प्रपाठकः - होतृब्राह्मणम् <https://www.vedavms.in> 37

॥ हरिः ॐ ॥ ॥ कृष्ण यजुर्वेदीय तैत्तिरीय ब्राह्मणे द्वितीयाष्टके द्वितीयः प्रपाठकः समाप्तः ॥

=====

2.3 द्वितीयाष्टके तृतीयः प्रपाठकः - होतृब्राह्मणशेषः

2.3.1 अनुवाकं 1 - सर्वेषां होतृमन्त्राणां चतुर्होतृशब्देन व्यवहार

TB 2.3.1.1

ब्रह्मवादिनो वदन्ति । किं चतुरहोतृणां चतुरहोतृत्वमिति । यदेवैषु चतुर्द्धा होतारः । तेन चतुरहोतारः । तस्माच्चतुरहोतार उच्यन्ते । तच्चतुरहोतृणां चतुरहोतृत्वम् ॥ सोमो वै चतुरहोता । अग्निः पञ्चहोता । धाता षड्होता । इन्द्रः सप्तहोता 1

TB 2.3.1.2

प्रजापतिरदशहोता । य एवं चतुरहोतृणां मृद्धिं वेद । ऋध्नोत्येव ॥ य एषामेवं बन्धुतां वेद । बन्धुमान्भवति । य एषामेवं कृष्टिं वेद । कल्पतेऽस्मै । य एषामेव मायतनं वेद । आयतनवान्भवति । य एषामेवं प्रतिष्ठां वेद 2

TB 2.3.1.3

प्रत्येव तिष्ठति ॥ ब्रह्मवादिनो वदन्ति । दशहोता चतुरहोता । पञ्चहोता षड्होता सप्तहोता । अथ कस्माच्चतुरहोतार उच्यन्ते इति । इन्द्रो वै चतुरहोता । इन्द्रः खलु वै श्रेष्ठो देवतानां मुपदेशनात् । य एवमिन्द्रः श्रेष्ठो देवतानां मुपदेशनाद् वेद । वसिष्ठः समानानां भवति । तस्माच्छ्रेष्ठमायन्तं प्रथमेनैवानुबुद्ध्यन्ते () । अयमागन् । अयमवासादिति । कीर्तिरस्य पूर्वाऽऽगच्छति जनतामायतः । अथो एनं प्रथमेनैवानुबुद्ध्यन्ते । अयमागन् । अयमवासादिति । 3

(सप्तहोता - प्रतिष्ठां वेद - बुद्ध्यन्ते षट्) (A1)

2.3.2 अनुवाकं 2 - नैमित्तिको होतृमन्त्रहोमः

TB 2.3.2.1

दक्षिणां प्रतिग्रहीष्यन्थ-सप्तदश कृत्वोऽपान्यात् । आत्मानमेव समिन्धे । तेजसे वीर्याय । अथौ प्रजापतिरेवैनां भूत्वा प्रति गृह्णाति । आत्मनोऽनार्त्ये ॥ यद्येनमार्त-विज्याद्-वृतः सन्तं निरहरेरन् । आग्नीद्धे जुहुयाद्-दशहोतारम् । चतुर्गृहीतेनाज्येन । पुरस्तात्-प्रत्यङ्गिष्ठन् । प्रतिलोमं विग्राहम् 4

TB 2.3.2.2

प्राणानेवास्योपेदासयति ॥ यद्येनं पुनरुप शिष्येयुः । आग्नीद्ध एव जुहुयाद्-दशहोतारम् । चतुर्गृहीतेनाज्येन । पश्चात् प्राडासीनः । अनुलोम-मविग्राहम् । प्राणानेवास्मै कल्पयति ॥ प्रायश्चित्ती-वाग्धोते-त्यंतुमुख ऋतुमुखे जुहोति । ऋतूनेवास्मै कल्पयति । कल्पन्तेऽस्मा ऋतवः 5

TB 2.3.2.3

कृता अस्मा ऋतव आयन्ति ॥ षड्होता वै भूत्वा प्रजापतिरिदं सर्वमसृजत । स मनोऽसृजत । मनसोऽधि गायत्रीमसृजत । तद्गायत्रीं यश आच्छत् । तामाऽलभत । गायत्रिया अधि छन्दास्य सृजत । छन्दोभ्योऽधि सामं । तथ सामं यश आच्छत् । तदाऽलभत 6

TB 2.3.2.4

साम्नोऽधि यजूंष्यसृजत । यजुभ्योऽधि विष्णुम् । तद्-विष्णुं यश आच्छत् । तमाऽलभत । विष्णोरद्वयोषधीरसृजत । ओषधीभ्योऽधि सोमम् । तथ सोमं यश आच्छत् । तमाऽलभत । सोमादधि पशूनसृजत । पशुभ्योऽधीन्द्रम् 7

TB 2.3.2.5

तदिन्द्रं यश आच्छत् । तदेनं नाति प्राच्यवत । इन्द्र इव यशस्वी भवति । य एवं वेद । नैनं यशोऽति प्राच्यवते ॥ यद्वा इदं किं च । तथ सर्वमुत्तान एवाङ्गीरसः प्रत्यंगृह्णात् । तदेनं प्रतिगृहीतं नाहिनत् । यत् किंच प्रति गृह्णीयात् । तथ-सर्वमुत्तानस्त्वाङ्गीरसः प्रतिगृह्णात्वित्येव प्रतिगृह्णीयात् () । इयं वा उत्तान आङ्गीरसः । अनयैवैनत्-प्रति गृह्णाति । नैनं हिनस्ति ॥ बरहिषा प्रतीयाद्वा

वाऽश्वाँ वा । एतद्वै पशूनां प्रियं धाम । प्रियेणैवैनं धाम्ना प्रत्येति । 8

(विग्राहं - मृतव - स्तदाऽलम् - तेन्द्रं - गृहीयाथ षट्) (A2)

2.3.3 अनुवाकं 3 - केशवपनाङ्गं पुष्टिवेदनं

TB 2.3.3.1

यो वा अविद्वान्-निवर्तयते । विशीर्षा सपौष्मा ऽमुष्मिँल्लोके भवति । अथ यो विद्वान्-निवर्तयते । सशीर्षा विपौष्मा ऽमुष्मिँल्लोके भवति ॥ देवता वै सप्त पुष्टिकामा न्यवर्तयन्त । अग्निश्च पृथिवी च । वायुश्चान्तरिक्षं च । आदित्यश्च द्यौश्च चन्द्रमाः । अग्निर्यवर्तयत । स साहस्र-मपुष्यत् 9

TB 2.3.3.2

पृथिवी न्यवर्तयत । सौषधीभिर्वनस्पतिभि-रपुष्यत् । वायुर्यवर्तयत । स मरीचीभि-रपुष्यत् । अन्तरिक्षं न्यवर्तयत । तद्वयोभि-रपुष्यत् । आदित्यो न्यवर्तयत । स रश्मिभि-रपुष्यत् । द्यौर्यवर्तयत । सा नक्षत्रै-रपुष्यत् () । चन्द्रमा न्यवर्तयत । सोऽहोरात्रै-रर्द्धमासैर्-मासैर्-ऋतुभिः सम्वत्सरेणा-पुष्यत् । तान्पोषान्-पुष्यति । याऽस्तेऽपुष्यन् । य एवं विद्वान्नि च वर्तयते परि च । 10

(अपुष्यन् - नक्षत्रैरपुष्यत् पञ्च च) (A3)

2.3.4 अनुवाकं 4 - प्रतिग्रहमन्त्रमहिमज्ञानम्

TB 2.3.4.1

तस्य वा अग्नेर्-हिरण्यं प्रतिजग्रहुषः । अर्द्धमिन्द्रियस्या-पौक्रामत् । तदेतेनैव प्रत्यंगृह्णात् । तेन वै सोऽर्द्धमिन्द्रिय-स्यात्मन्-नुपाधत्ते । अर्द्धमिन्द्रियस्यात्मन्-नुपाधत्ते । य एवं विद्वान्-हिरण्यं प्रति

गृह्णाति । अथ यो ऽविद्वान् प्रति गृह्णाति । अर्द्धमस्येन्द्रियस्यापं क्रामति ॥ तस्य वै सोमस्य वासः प्रतिजग्रहुषः । तृतीयमिन्द्रियस्या-पाँक्रामत् 11

TB 2.3.4.2

तदेतेनैव प्रत्यंगृह्णात् । तेन वै स तृतीयमिन्द्रियस्यात्मन्-नुपाधत्त । तृतीयमिन्द्रियस्यात्मन्-नुपाधत्ते । य एवं विद्वान् वासः प्रति गृह्णाति । अथ योऽविद्वान् प्रति गृह्णाति । तृतीयमस्येन्द्रियस्यापं क्रामति ॥ तस्य वै रुद्रस्य गां प्रतिजग्रहुषः । चतुर्थमिन्द्रियस्या-पाँक्रामत् । तामेतेनैव प्रत्यंगृह्णात् । तेन वै स चतुर्थमिन्द्रियस्यात्मन्-नुपाधत्त 12

TB 2.3.4.3

चतुर्थमिन्द्रियस्यात्मन्-नुपाधत्ते । य एवं विद्वान् गां प्रति गृह्णाति । अथ योऽविद्वान् प्रति गृह्णाति । चतुर्थमस्येन्द्रियस्यापं क्रामति ॥ तस्य वै वरुणस्याश्वम् प्रतिजग्रहुषः । पञ्चममिन्द्रियस्या-पाँक्रामत् । तमेतेनैव प्रत्यंगृह्णात् । तेन वै स पञ्चममिन्द्रियस्यात्मन्-नुपाधत्त । पञ्चममिन्द्रियस्यात्मन्-नुपाधत्ते । य एवं विद्वानश्वं प्रति गृह्णाति 13

TB 2.3.4.4

अथ योऽविद्वान् प्रतिगृह्णाति । पञ्चममस्येन्द्रियस्यापं क्रामति ॥ तस्य वै प्रजापतेः पुरुषं प्रतिजग्रहुषः । षष्ठमिन्द्रियस्या-पाँक्रामत् । तमेतेनैव प्रत्यंगृह्णात् । तेन वै स षष्ठमिन्द्रियस्यात्मन्-नुपाधत्त । षष्ठमिन्द्रियस्यात्मन्-नुपाधत्ते । य एवं विद्वान् पुरुषं प्रति गृह्णाति । अथ योऽविद्वान् प्रति गृह्णाति । षष्ठमस्येन्द्रियस्यापं-क्रामति । 14

TB 2.3.4.5

तस्य वै मनोस्तल्पं प्रतिजग्रहुषः । सप्तममिन्द्रियस्या-पाँक्रामत् । तमेतेनैव प्रत्यंगृह्णात् । तेन वै स सप्तममिन्द्रिय-स्यात्मन्-नुपाधत्त । सप्तममिन्द्रियस्यात्मन्-नुपाधत्ते । य एवं विद्वान्स्तल्पं प्रतिगृह्णाति

। अथ योऽविद्वान् प्रति गृह्णाति । सप्तमस्येन्द्रियस्याप-क्रामति ॥ तस्य वा उत्तानस्याङ्गीरसस्या प्राणत् प्रतिजग्रुषः । अष्टममिन्द्रियस्या-पाक्रामत् 15

TB 2.3.4.6

तदेतेनैव प्रत्यगृह्णात् । तेन वै सौष्टममिन्द्रियस्यात्मन्-नुपाधत्ते । अष्टममिन्द्रियस्यात्मन्-नुपाधत्ते । य एवं विद्वान् प्राणत् प्रति गृह्णाति । अथ योऽविद्वान् प्रतिगृह्णाति । अष्टममस्येन्द्रियस्याप-क्रामति ॥ यद्वा इदं किं च । तथ सर्व-मुत्तान एवाङ्गीरसः प्रत्यगृह्णात् । तदेनं प्रतिगृहीतं नाहिनत् । यत् किं च प्रति गृह्णीयात् () । तथ सर्व-मुत्तान-स्त्वाङ्गीरसः प्रतिगृह्णात्वित्येव प्रति गृह्णीयात् । इयं वा उत्तान आङ्गीरसः । अनयैवैनत्-प्रतिगृह्णाति । नैनं हिनस्ति । 16

special korvai

(तस्य वा अग्रे हिरण्यं सोमस्य वासस्तदेतेन रुद्रस्य गां तामेतेन वरुणस्याश्वं प्रजापतेः पुरुषं मनोस्तल्पं तमेतेनोत्तानस्य तदेतेनाप्राणघद् वै) (अर्द्धं तृतीयमष्टमं तच्चतुर्थं तां पञ्चमं षष्ठं सप्तमन्तम् । तदेतेन द्वे तामेतेनैकं तमेतेन त्रीणि तदेतेनैकं)
(तृतीयमिन्द्रियस्यापाक्रामत् - चतुर्थमिन्द्रियस्यात्मन्नुपाध - तत्तत् प्रतिगृह्णाति - षष्ठमस्येन्द्रियस्यापक्राम -त्यष्टममिन्द्रियस्यापाक्रामत् - प्रति गृह्णीयात् चत्वारि च) (A4)

2.3.5 अनुवाकं 5 - प्रश्नोत्तररूपो ब्रह्मविषयस्संवादः

TB 2.3.5.1

ब्रह्मवादिनो वदन्ति ॥ यद्-दशहोतारः सत्रमासंत । केन ते गृहपतिना ऽऽर्द्धवन् । केन प्रजा असृजन्तेति । प्रजापतिना वै ते गृहपतिना ऽऽर्द्धवन् । तेन प्रजा असृजन्त ॥ यच्चतुरहोतारः सत्रमासंत । केन ते गृहपतिना ऽऽर्द्धवन् । केनौषधी-रसृजन्तेति । सोमेन वै ते गृहपतिना ऽऽर्द्धवन् 17

TB 2.3.5.2

तेनौषधी-रसृजन्त ॥ यत् पञ्चहोतारः सत्रमासंत । केन ते गृहपतिना ऽऽर्द्धवन् । केनैभ्यो लोकेभ्योऽसुरान् प्राणुदन्त । केनैषां पशूनवृञ्जतेति । अग्निना वै ते गृहपतिना ऽऽर्द्धवन् । तेनैभ्यो लोकेभ्योऽसुरान्-प्राणुदन्त । तेनैषां पशूनवृञ्जत ॥ यत् षड्होतारः सत्रमासंत । केन ते गृहपतिना ऽऽर्द्धवन् 18

TB 2.3.5.3

केनतून-कल्पयन्तेति । धात्रा वै ते गृहपतिना ऽऽर्द्धवन् । तेनतूनकल्पयन्त ॥ यत् सप्तहोतारः सत्रमासंत । केन ते गृहपतिना ऽऽर्द्धवन् । केन सुवरायन् । केनेमाल्लोकान्ध-समतन्वन्निति । अर्यम्णा वै ते गृहपतिना ऽऽर्द्धवन् । तेन सुवरायन् । तेनेमाल्लोकान्ध-समतन्वन्निति । 19

TB 2.3.5.4

एते वै देवा गृहपतयः । तान् य एवं विद्वान् । अप्यन्यस्य गार्हपते दीक्षते । अवान्तरमेव सत्रिणां-मृद्धोति ॥ यो वा अर्यमणं वेद । दानंकामा अस्मै प्रजा भवन्ति । यज्ञो वा अर्यमा । आर्यावसतिरिति वै तमांहुयं प्रशंसन्ति ॥ आर्या वसतिर्भवति । य एवं वेद । 20

TB 2.3.5.5

यद्वा इदं किं च । तत् सर्वं चतुरहोतारः । चतुरहोतृभ्योऽधि यज्ञो निर्मितः । स य एवं विद्वान् विवदेत । अहमेव भूयो वेद । यश्चतुरहोतृन् वेदेति । स ह्येव भूयो वेद । यश्चतुरहोतृन् वेद ॥ यो वै चतुरहोतृणां होतृन् वेद । सर्वासु प्रजास्वन्नमति 21

TB 2.3.5.6

सर्वा दिशोऽभिजयति । प्रजापतिर्वै दशहोतृणां होता । सोमश्चतुरहोतृणां होता । अग्निः पञ्चहोतृणां होता । धाता षड्होतृणां होता । अर्यमा सप्तहोतृणां होता । एते वै चतुरहोतृणां

होतारः । तान् य एवं वेद । सर्वासु प्रजास्वन्नमति । सर्वा दिशोऽभि जयति () । 22

(आर्द्ध्व - चाध्व - न्नित्ये - वं वेदा - त्ति - सर्वा दिशोभि जयति वै तेन सत्रं केन) (A5)

2.3.6 अनुवाकं 6 - होतृप्रशंसाप्रसङ्गेन ऋतूनामृत्विग् विशेषव्यवस्थापनं, अग्निहोत्रस्य प्राशस्त्यं च

TB 2.3.6.1

प्रजापतिः प्रजाः सृष्ट्वा व्यस्रंसत । स हृदयं भूतोऽशयत् । आत्मन् हा(3) इत्यह्वयत् । आपः प्रत्यंशृण्वन् । ता अग्निहोत्रेणैव यं ऋतुनोपं पर्यावर्तन्त । ताः कुसिन्धुमुपौहन् । तस्मादग्निहोत्रस्य यं ऋतोः । एकं ऋत्विक् ॥ चतुष्कृत्वोऽह्वयत् । अग्निर्वायु-रादित्य-श्चन्द्रमाः 23

TB 2.3.6.2

ते प्रत्यंशृण्वन् । ते द्रुशपूर्णमासाभ्यामेव यं ऋतुनोपं पर्यावर्तन्त । त उपौहंश्चत्वार्यङ्गानि । तस्माद्द्रुशपूर्णमासयोर्यं ऋतोः । चत्वारं ऋत्विजः ॥ पञ्च कृत्वोऽह्वयत् । पशवः प्रत्यंशृण्वन् । ते चातुर्मास्यैरेव यं ऋतुनोपं पर्यावर्तन्त । त उपौहं लोमं छवीं मांसमस्थिं मज्जानम् । तस्माच्चातुर्मास्यानां यं ऋतोः 24

TB 2.3.6.3

पञ्चर्त्विजः ॥ षट्कृत्वोऽह्वयत् । ऋतवः प्रत्यंशृण्वन् । ते पशुबन्धेनैव यं ऋतुनोपं पर्यावर्तन्त । त उपौहन्थ-स्तनावाण्डौ शिश्रमवाञ्चं प्राणम् । तस्मात्पशुबन्धस्य यं ऋतोः । षट्त्विजः ॥ सप्तकृत्वोऽह्वयत् । होत्राः प्रत्यंशृण्वन् । ताः सौम्येनैवाद्धरेण यं ऋतुनोपं पर्यावर्तन्त 25

TB 2.3.6.4

ता उपौहन्थ-सप्तशीर्षण्यान्-प्राणान् । तस्मात्सौम्यस्याद्धरस्य यं ऋतोः । सप्त होत्राः प्राचीर्वषट्कुर्वन्ति

॥ द॒श॒कृ॒त्वोऽह्व॑यत् । तपुः॑ प्र॒त्य॑शृणोत् । तत्-क॑र्मणै॒व सं॑म्व॒थ्सुरे॑ण स॒र्वैर्य॑ङ्क॒तुभि॑रुप॑ प॒र्याव॑र्तत । तथ् सर्व॑मा॒त्मान्-म॑परि॒वर्ग॑-मु॒पौह॑त् । तस्मा॑न्-स॒म्व॒थ्सुरे॑ स॒र्वे य॑ङ्क॒तवोऽव॑रुद्ध॒यन्ते ॥ तस्मा॑द्-द॒श॒होता॑ चतु॒र॒होता॑ । पञ्च॑होता॒ षड्दो॑ता स॒प्तहो॑ता () । ए॒क॒हो॒त्रे ब॒लिः॑ ह॒रन्ति॑ । ह॒रन्त्य॑स्मै प्र॒जा ब॒लिम् । ऐ॒न॒मप्र॑ति॒ख्यातं॑ गच्छति । य ए॒वं वे॑द । 26

(च॒न्द्रमा॑ - श्वा॒तुर्मा॒स्यानां॑ य॒ङ्क॒तो - र॒द्धरे॑ण॒ य॒ङ्क॒तुनो॑प॑ प॒र्याव॑र्तन्त - स॒प्तहो॑ता च॒त्वारि॑ च)
(A6)

2.3.7 अनुवाकं 7 - अग्निहोत्रस्य सर्वक्रतुरुद्धावसाधनेन प्रशंसा

TB 2.3.7.1

प्र॒जाप॑तिः पुरु॑ष-मसृजत । सोऽग्नि॑र॒ब्रवी॑त् । ममा॒य-म॒न्नम॑स्त्विति॑ । सोऽबि॑भेत् । स॒र्व॒वै मा॒ऽयं प्र॑धक्ष॒यती॑ति । स ए॒ताश्च॑तु॒र॒होत॑ना॒त्म-स्पर्॑णानपश्यत् । तान॑जुहोत् । तै॒र्वै स आ॒त्मान॑-मस्पृणोत् । यद॑ग्निहो॒त्रं जु॑होति । ए॒क॒हो॒तार॑मे॒व तद्-य॑ङ्क॒तु-मा॑प्नोत्यग्निहो॒त्रम् 27

TB 2.3.7.2

कु॒सि॒न्धं चा॒त्मनः॑ स्पृणोति॑ । आ॒दि॒त्यस्य॑ च॒ सायु॑ज्यं गच्छति ॥ च॒तु॒रु॒न्नय॑ति । चतु॒र॒हो॒तार॑मे॒व तद्-य॑ङ्क॒तु-मा॑प्नोति द॒र्शपूर्ण॑मा॒सौ । च॒त्वारि॑ चा॒त्मनोऽङ्गा॑नि स्पृणोति॑ । आ॒दि॒त्यस्य॑ च॒ सायु॑ज्यं गच्छति ॥ च॒तु॒रु॒न्नय॑ति । सु॒मित्प॑ञ्चमी । पञ्च॑हो॒तार॑मे॒व तद्-य॑ङ्क॒तु-मा॑प्नोति चा॒तुर्मा॒स्यानि॑ । लो॒मं छु॒र्वी मा॒स॒सम॑स्थि॑ म॒ज्जान॑म् 28

TB 2.3.7.3

तानि॑ चा॒त्मनः॑ स्पृणोति॑ । आ॒दि॒त्यस्य॑ च॒ सायु॑ज्यं गच्छति ॥ च॒तु॒रु॒न्नय॑ति । द्वि॒र्जुहो॑ति । षड्दो॑तारमे॒व तद्-य॑ङ्क॒तु-मा॑प्नोति पशु॒बन्ध॑म् । स्तना॑वा॒ण्डौ शि॒श्रम॑वा॒ञ्च प्रा॑णम् । तानि॑ चा॒त्मनः॑ स्पृणोति॑ । आ॒दि॒त्यस्य॑ च॒ सायु॑ज्यं गच्छति । च॒तु॒रु॒न्नय॑ति । द्वि॒र्जुहो॑ति 29

TB 2.3.7.4

स॒मि॒थ् स॑प्त॒मी । स॒प्त॒हो॑तारमे॒व तद्-य॑ञ्क॒तु-मा॑प्नोति सौ॒म्य-म॑द्ध॒रम् । स॒प्त चा॒त्मनः॑ शी॒र्ष॒ण्य॑न्-
प्रा॒णान्ध्र॑-स्पृ॒णोति॑ । आ॒दित्य॑स्य॒ च सायु॑ज्यं गच्छति ॥ च॒तु॒रु॒न्न॑यति । द्वि॒र्जु॒होति॑ । द्वि॒र्नि॒मा॑ष्टि ।
द्विः प्रा॒श्नाति॑ । द॒श॒हो॑तारमे॒व तद्-य॑ञ्क॒तु-मा॑प्नोति स॒म्व॑थ्स॒रम् । सर्व॑ चा॒त्मान॑-म॒परि॑वर्गः स्पृ॒णोति॑
() । आ॒दित्य॑स्य॒ च सायु॑ज्यं गच्छति । 30

(अ॒ग्नि॒हो॒त्रं - म॒ज्जानं॑ - द्वि॒र्जु॒हो - त्य॑परि॒वर्गः॑ स्पृ॒णोत्ये॑कं च) (A7)

2.3.8 अनुवाकं 8 - सृष्टिसाधनत्वेन होतृमन्त्रासामर्थ्यं प्रशंसा

TB 2.3.8.1

[(अ॒प॒क्राम॑त गर्भि॒ण्यः) इ॒स् ओ॒न्य इ॒न्ध्रु॒च्छि॒ओन् , नो॒त् अ॒ मन्त्र॑]प्र॒जाप॑ति-र॒काम॑यत् प्र॒जाये॑येति॒
। स तपो॑ऽतप्यत । सो॑ऽन्त॒र्वा॒नभ॑वत् । स ह॒रि॒तः श्या॒वोऽभ॑वत् । तस्मा॑ध्रु॒ख्यन्त॑र्व॒त्नी । ह॒रि॒णी
स॒ती श्या॒वा भ॑वति । स वि॒जाय॑मानो गर्भे॑णा॒ताम्य॑त् । स ता॒न्तः कृ॒ष्णः श्या॒वोऽभ॑वत् । तस्मा॑त्
ता॒न्तः कृ॒ष्णः श्या॒वो भ॑वति । तस्यासु॑रे॒वाजी॑वत् 31

TB 2.3.8.2

तेनासु॑नाऽसु॑रानसृजत । तदसु॑राणा-मसु॑रत्वम् । य ए॒वमसु॑राणा-मसु॑रत्वं वे॒द । असु॑माने॒व भ॑वति
। नैन॑मसु॑र्जहाति ॥ सोऽसु॑रान्ध्रु॒ सृष्ट्वा पि॑तेवा॒मन्य॑त । तदनु॑ पि॒तृन॑सृजत । तत्-पि॑तृणां पि॒तृत्व॑म्
। य ए॒वं पि॑तृणां पि॒तृत्वं वे॒द । पि॑तेवै॒व स्वा॒ना भ॑वति 32

TB 2.3.8.3

यन्त्य॑स्य पि॒तरो॒ हव॑म् ॥ स पि॑तृन्ध्रु॒ सृष्ट्वा ऽम॑नस्यत् । तदनु॑ मनु॒ष्या॑-नसृजत । तन्म॑नु॒ष्याणां॑
मनु॒ष्य॑त्वम् । य ए॒वं म॑नु॒ष्याणां॑ मनु॒ष्य॑त्वं वे॒द । म॒नु॒स्व्ये॑व भ॑वति । नैन॑ मनु॑र्जहाति ॥ तस्मै॑

मनुष्यान्थ ससृजानायं । दिवा देवत्रा ऽभवत् । तदनु देवानसृजत () । तद्-देवानां देवत्वम् ।
य एवं देवानां देवत्वं वेदं । दिवा हैवास्यं देवत्रा भवति ॥ तानि वा एतानि चत्वार्यम्भांसि ।
देवा मनुष्याः पितरोऽसुराः ॥ तेषु सर्वेष्वम्भो नभ इव भवति । य एवं वेदं । 33

(अजीवथ - स्वानां भवति - देवानसृजत सप्त च) (A8)

2.3.9 अनुवाकं 9 - वायुरूपत्वज्ञानेन होतृमन्त्राणां प्रशंसा

TB 2.3.9.1

[(यथास्थानं गर्भिण्यः) इस् ओन्ल्य इन्श्चुत्तिओन् , नोत् अ मन्त्र]ब्रह्मवादिनो वदन्ति । यो वा
इमं विद्यात् । यतोऽयं पवते । यदभि पवते । यदभि संपवते । सर्वमायुरियात् । न पुरा ऽऽयुषः
प्रमीयेत । पशुमान्थ स्यात् । विन्देत प्रजाम् ॥ यो वा इमं वेदं 34

TB 2.3.9.2

यतोऽयं पवते । यदभि पवते । यदभि संपवते । सर्वमायुरेति । न पुराऽऽयुषः प्रमीयते ।
पशुमान् भवति । विन्देत प्रजाम् ॥ अद्भ्यः पवते । अपोऽभि पवते । अपोऽभि संपवते । 35

TB 2.3.9.3

अस्याः पवते । इमामभि पवते । इमामभि संपवते । अग्नेः पवते । अग्निमभि पवते । अग्निमभि
सं पवते । अन्तरिक्षात् पवते । अन्तरिक्षमभि पवते । अन्तरिक्षमभि सं पवते । आदित्यात्
पवते 36

TB 2.3.9.4

आदित्यमभि पवते । आदित्यमभि सं पवते । द्योः पवते । दिवमभि पवते ॥ दिवमभि सं पवते
। दिग्भ्यः पवते । दिशोऽभि पवते । दिशोऽभि सं पवते । स यत्-पुरस्ताद्वाति । प्राण एव

भूत्वा पुरस्ताद्वाति 37

TB 2.3.9.5

तस्मात्-पुरस्ताद्वान्तम् । सर्वाः प्रजाः प्रति नन्दन्ति । प्राणो हि प्रियः प्रजानाम् । प्राण इव प्रियः प्रजानां भवति । य एवं वेद । स वा एष प्राण एव ॥ अथ यद्-दक्षिणतो वाति । मातरिश्चैव भूत्वा दक्षिणतो वाति । तस्माद्-दक्षिणतो वान्तं विद्यात् । सर्वा दिश आवाति 38

TB 2.3.9.6

सर्वा दिशोऽनु विवाति । सर्वा दिशोऽनु सम्वातीति । स वा एष मातरिश्चैव ॥ अथ यत्-पश्चाद्वाति । पर्वमान एव भूत्वा पश्चाद्वाति । पूतमस्मा आहरन्ति । पूतमुपहरन्ति । पूतमश्नाति । य एवं वेद । स वा एष पर्वमान एव । 39

TB 2.3.9.7

अथ यदुत्तरतो वाति । सवितैव भूत्वोत्तरतो वाति । सवितेव स्वानां भवति । य एवं वेद । स वा एष सवितैव ॥ ते य एनं पुरस्तादायन्त-मुपवदन्ति । य एवास्य पुरस्तात्-पाप्मानः । तास्ते ऽपघ्नन्ति । पुरस्तादितरान्-पाप्मानः सचन्ते ॥ अथ य एनं दक्षिणत आयन्त-मुपवदन्ति 40

TB 2.3.9.8

य एवास्य दक्षिणतः पाप्मानः । तास्ते ऽपघ्नन्ति । दक्षिणत इतरान् पाप्मानः सचन्ते ॥ अथ य एनं पश्चादायन्त-मुपवदन्ति । य एवास्य पश्चात्-पाप्मानः । तास्ते ऽपघ्नन्ति । पश्चादितरान्-पाप्मानः सचन्ते ॥ अथ य एनमुत्तरत आयन्तमुप वदन्ति । य एवास्योत्तरतः पाप्मानः । तास्ते ऽपघ्नन्ति 41

TB 2.3.9.9

उत्तरत इतरान् पाप्मनः सचन्ते ॥ तस्मां देवं विद्वान् । वीवं नृत्येत् । प्रेवं चलेत् । व्यस्येवाक्ष्यौ भाषेत । मण्टयेदिव । क्राथयेदिव । शृङ्गायेतेव ॥ उत मोपवदेयुः । उत मे पाप्मान-मपहन्युरिति () ॥ स यां दिशः सुनिमेष्यन्थ-स्यात् । यदा तां दिशं वातो वायात् । अथ प्रवेयात् । प्र वा धापयेत् (धावयेत्) । सातमेव रदितं व्यूढं गन्धमभि प्रच्यवते । आऽस्य तं जनपदं पूर्वा कीर्तिर्गच्छति ॥ दानकामा अस्मै प्रजा भवन्ति । य एवं वेद । 42

(वेदु - संपवत - आदित्यात् पवते - वात्या - वात्ये - ष पवमान एव - दक्षिणत आयन्तमुप वदन् - त्युत्तरतः पाप्मानस्तास्ते ऽपघ्न - न्तीत्यष्टौ च) (A9)

2.3.10 अनुवाकं 10 - दशहोतृमन्त्राणां काम्यप्रयोगः

TB 2.3.10.1

प्रजापतिः सोमः राजानमसृजत । तं त्रयो वेदा अन्वसृज्यन्त । तान् हस्तेऽकुरुत । अथ ह सीतां सावित्री । सोमः राजानं चकमे । श्रद्धामु स चकमे । सा ह पितरं प्रजापति-मुपससार । तः होवाच । नमस्ते अस्तु भगवः । उप त्वाऽयानि 43

TB 2.3.10.2

प्र त्वा पद्ये ॥ सोमं वै राजानं कामये । श्रद्धामु स कामयत इति । तस्या उ ह स्थागुरमलङ्कारं कल्पयित्वा । दशहोतारं पुरस्ताद् व्याख्याय । चतुरहोतारं दक्षिणतः । पञ्च होतारं पश्चात् । षडहोतार-मुत्तरतः । सप्तहोतार-मुपरिष्ठात् । सम्भारैश्च पत्निभिश्च मुखेऽलङ्कृत्य 44

TB 2.3.10.3

आऽस्यार्द्धं वव्राज । ताः होदीक्ष्योवाच । उप माऽऽवर्तस्वेति । तः होवाच । भोगं तु म आचक्ष्व । एतन् म आचक्ष्व । यत्ते पाणाविति । तस्या उ ह त्रीन् वेदान् प्रददौ । तस्मादु ह स्त्रियो भोगमैव हारयन्ते ॥ स यः कामयेत प्रियः स्यामिति 45

TB 2.3.10.4

यं वा कामयेत प्रियः स्यादिति । तस्मा एतः स्थागुर-मलङ्कारं कल्पयित्वा । दशहोतारं पुरस्ताद्-
व्याख्याय । चतुरहोतारं दक्षिणतः । पञ्चहोतारं पश्चात् । षड्होतार-मुत्तरतः । सप्तहोता-रमुपरिष्ठात्
। सम्भारैश्च पत्निभिश्च मुखेऽलङ्कृत्य । आऽस्यार्द्धं व्रजेत् । प्रियो हैव भवति () । 46

(अया - न्यलङ्कृत्य - स्यामिति - भवति) (A10)

2.3.11 अनुवाकं 11 - दशहोत्रादिमन्त्रनाम्नां प्रवृत्तिनिमित्तम्

TB 2.3.11.1

ब्रह्मात्मन्-वदसृजत । तदकामयत । समात्मना पद्येयेति । आत्मन्-नात्मन्-नित्यामन्त्रयत ।
तस्मै दशमः हूतः प्रत्यशृणोत् । स दशहूतोऽभवत् । दशहूतो ह वै नामैषः । तं वा एतं
दशहूतः सन्तम् । दशहोतेत्याचक्षते पुरोक्षेण । पुरोक्षप्रिया इव हि देवाः । 47

TB 2.3.11.2

आत्मन्-नात्मन्-नित्यामन्त्रयत । तस्मै सप्तमः हूतः प्रत्यशृणोत् । स सप्तहूतोऽभवत् । सप्तहूतो
ह वै नामैषः । तं वा एतः सप्तहूतः सन्तम् । सप्तहोतेत्याचक्षते पुरोक्षेण । पुरोक्षप्रिया इव
हि देवाः ॥ आत्मन्-नात्मन्-नित्यामन्त्रयत । तस्मै षष्ठः हूतः प्रत्यशृणोत् । स षड्हूतोऽभवत् 48

TB 2.3.11.3

षड्हूतो ह वै नामैषः । तं वा एतः षड्हूतः सन्तम् । षड्होतेत्याचक्षते पुरोक्षेण । पुरोक्षप्रिया
इव हि देवाः ॥ आत्मन्-नात्मन्-नित्यामन्त्रयत । तस्मै पञ्चमः हूतः प्रत्यशृणोत् । स पञ्च
हूतोऽभवत् । पञ्चहूतो ह वै नामैषः । तं वा एतं पञ्चहूतः सन्तम् । पञ्चहोतेत्याचक्षते पुरोक्षेण 49

TB 2.3.11.4

प॒रोक्ष॑प्रि॒या इ॒व हि दे॒वाः ॥ आ॒त्म॒न्-ना॒त्म॒न्-नि॒त्याम॑न्त्रयत् । तस्मै॑ चतु॒र्थः॑ हू॒तः प्र॒त्य॑शृ॒णोत् । स
चतु॑र॒हूतोऽभ॑वत् । चतु॑र॒हूतो ह॒ वै ना॒मैषः॑ । तं॒ वा ए॒तं चतु॑र॒हूतः॑ सन्त॑म् । चतु॑र॒होते॒त्याच॑क्षते
प॒रोक्षे॑ण । प॒रोक्ष॑प्रि॒या इ॒व हि दे॒वाः ॥ तम॑ब्रवीत् । त्वं॒ वै मे॒ नेदि॑ष्ठः॑ हू॒तः प्र॒त्य॑श्रौषीः ()
। त्वयै॑-ना॒नाख्या॒तार॒ इति॑ । तस्मा॑न्नु॒ हैनाः॑-श्चतु॑र॒होता॒ इत्या॑चक्षते । तस्मा॑-च्छु॒श्रूषुः॑ पु॒त्राणाः॑
हृद्य॑तमः । नेदि॑ष्ठो हृद्य॑तमः । नेदि॑ष्ठो ब्रह्म॑णो भवति । य ए॒वं वेद॑ । 50

(दे॒वाः - षड्भू॑तोऽभ॒वत् - पञ्च॑हो॒तेत्या॑चक्षते प॒रोक्षे॑णा - श्रौषीः षट्) (A11)

PrapAtaka Korvai with starting words of 1 to11 anuvAkams :-

(ब्र॒ह्म॒वादि॒न् किं॑ - दक्षि॑णां - ॒यो वा अ॒वि॒द्वान् - तस्य॑ वै - ब्र॒ह्म॒वादि॒नो यद् दश॑हो॒तारः॑ - प्र॒जाप॑ति
व्य॒स्रं - प्र॒जाप॑तिः पु॒रुषं॑ - प्र॒जाप॑तिर॒काम॑यत् स तपः॑ सोऽन्त॑र्वा॒न् - ब्र॒ह्म॒वादि॒नो यो वा इ॒मं वि॒द्यात्
- प्र॒जाप॑तिः सोमः॑ रा॒जा॒नं - ब्र॒ह्मा॑त् म॒न्वदे॑का॒दश)

korvai with starting words of 1, 11, 21 series of daSinis :-

(ब्र॒ह्म॒वादि॒न् - स्तस्य॑ वा अ॒ग्नेर् - यद्वा॑ इ॒दं किंच॑ - प्र॒जाप॑तिर॒काम॑यत् -य ए॒वास्य॑ दक्षि॒णतः॑ पञ्चा॒शत्)

first and last word - 2nd aShTakam 3rd prapATakam :-

(ब्र॒ह्म॒वादि॒नो - य ए॒वं वेद॑)

॥ हरिः॑ ॐ ॥ ॥ कृष्ण॑ यजुर्वेदीय तैत्तिरीय ब्राह्मणे द्वितीयाष्टके तृतीयः प्रपाठकः समाप्तः ॥

=====

2.4 द्वितीयाष्टके चतुर्थः प्रपाठकः - उपहोमाः

2.4.1 अनुवाकं 1 - उपहोमाः

TB 2.4.1.1

जुष्टो दमूना अतिथिर्दुरोणे । इमं नो यस्मुप याहि विद्वान् । विश्वा अग्नेऽभि युजो विहत्य
। शत्रूयतामभरा भोजनानि ॥ अग्ने शर्द्ध महते सौभगाय । तव द्युमन्युत्तमानि सन्तु । सं
जोस्पत्यः सुयममा कृणुष्व । शत्रूयतामभितिष्ठा महासि ॥ अग्ने यो नोऽभितो जनः । वृको
वारो जिघासति 1

TB 2.4.1.2

तास्त्वं वृत्रहञ्जहि । वस्वस्मभ्य-माभर ॥ अग्ने यो नोऽभिदासति । समानो यश्च निष्ट्यः ।
इद्धमस्येव प्रक्षायतः । मा तस्योच्छेषि किञ्चन ॥ त्वमिन्द्राभिभूरसि । देवो विज्ञातवीर्यः ।
वृत्रहा पुरुचेतनः ॥ अप प्राच इन्द्र विश्वाः अमित्रान् 2

TB 2.4.1.3

अपापांचो अभिभूते नुदस्व । अपोदीचो अपं शूरधराचं ऊरौ । यथा तव शर्मन्मदेम ॥ तमिन्द्रं
वाजयामसि । महे वृत्राय हन्तवे । स वृषा वृषभो भुवत् ॥ युजे रथं गुवेषणः हरिभ्याम् । उप
ब्रह्माणि जुजुषाण-मस्थुः । विबाधिष्टास्य रोदंसी महित्वा । इन्द्रो वृत्राण्यप्रती जघन्वान् । 3

TB 2.4.1.4

हव्यवाहं-मभिमातिषाऽहम् । रक्षोहणं पृतनासु जिष्णुम् । ज्योतिष्मन्तं दीद्यंतं पुरन्धिम् । अग्निः
स्विष्टकृतमा हुवेम ॥ स्विष्टमग्ने अभि तत् पृणाहि । विश्वा देव पृतना अभिष्य । उरुं नः पन्थां
प्रदिशन्वि भाहि । ज्योतिष्मद्वेह्यजरं न आयुः ॥ त्वामग्ने हविष्मन्तः । देवं मर्तास ईडते 4

TB 2.4.1.5

मन्ये॑ त्वा जा॒तवे॑दसम् । स ह॒व्या व॑क्ष्याऽनु॒षक् ॥ विश्वा॑नि नो दु॒र्गहा॑ जा॒तवे॑दः । सिन्धुं॑
न ना॒वा दु॑रि॒ताऽति॑पर॒षि । अग्ने॑ अ॒त्रिव॑न् मन॑सा गृणा॒नः । अ॒स्माकं॑ बो॒द्धय॑वि॒ता त॒नूना॑म् ॥
पू॒षा गा अ॒न्वेतु॑ नः । पू॒षा र॑क्ष॒त्वर्व॑तः । पू॒षा वाज॑स॒ नोतु॑ नः ॥ पू॒षेमा॑ आ॒शा अनु॑वेद॒ सर्वाः॑ 5

TB 2.4.1.6

सो अ॒स्माश्च॑ अ॒भय॑तमेन नेषत् । स्व॒स्ति॒दा अ॒घृणिः॑ स॒र्ववी॑रः । अ॒प्रयु॑च्छन् पु॒र ए॑तु प्रजा॒नन् ॥
त्वम॑ग्ने स॒प्रथा॑ असि । जु॒ष्टो होता॑ व॒रेण्यः॑ । त्वया॑ य॒ज्ञं वि॑त॒न्वते ॥ अ॒ग्नी र॑क्षा॒सि से॑धति ।
शु॒क्रशो॑चि॒रम॑र्त्यः । शु॒चिः पा॒वक॑ ई॒ड्यः॑ ॥ अग्ने॑ रक्षा॒णो अ॑श्ह॒सः 6

TB 2.4.1.7

प्रति॑ष्म दे॒व री॑षतः । त॒र्पि॑ष्ठैर॒जरो॑ दह ॥ अग्ने॑ ह॒सि न्य॑त्रि॒णम् । दी॒द्यन् म॑र्त्ये॒ष्वा । स्वे क्ष॑ये
शु॒चि॒व्रत॑ ॥ आ वा॑त वा॒हि भे॑ष॒जम् । वि वा॑त वा॒हि य॒द्रपः॑ । त्व॒हि वि॒श्व भे॑ष॒जः । दे॒वाना॑
दू॒त ई॒यसे ॥ द्वा॒वि॒मौ वा॑ता॒ वातः॑ 7

TB 2.4.1.8

आ सि॒न्धो॒रा प॑रा॒वतः॑ । दक्षं॑ मे अ॒न्य आ॒वातु॑ । प॒राऽन्यो॑ वा॒तु य॒द्रपः॑ ॥ यदु॑दो वा॑त ते गृ॒हे ।
अ॒मृत॑स्य नि॒धिर्ह॑तः । ततो॑ नो दे॒हि जी॒वसे॑ । ततो॑ नो धे॒हि भे॑ष॒जम् । ततो॑ नो म॒ह आ॑व॒ह
॥ वा॒त आ॑वा॒तु भे॑ष॒जम् । श॒म्भूर॑ म॒यो भू॒नो ह॒दे 8

TB 2.4.1.9

प्र॒ण आ॒यू॒षि ता॑रिषत् ॥ त्वम॑ग्ने अ॒याऽसि॑ । अ॒या स॒न्मन॑सा ह॒तः । अ॒या स॒न् ह॒व्यमू॑हिषे ।
अ॒या नो॑ धे॒हि भे॑ष॒जम् ॥ इ॒ष्टो अ॒ग्निराहु॑तः । स्वा॒हाकृ॑तः पि॒प॒र्तु नः॑ । स्व॒गा दे॒वेभ्य॑ इ॒दं नमः॑
॥ का॒मो भू॑तस्य॒ भव्य॑स्य । स॒म्रा॒डेको॑ वि॒राज॑ति 9

TB 2.4.1.10

स इ॒दं प्र॒ति प॒प्रथे । ऋ॒तूनु॒थ सृ॒जते व॒शी ॥ का॒म॒स्तद॒ग्रे स॒म॒व॒र्त॒ताधि॑ । म॒न॒सो रे॒तः प्र॒थ॒मं
य॒दासी॑त् । स॒तो ब॒न्धु॒मसं॑ति॒ निर॑वि॒न्दन् । हृ॒दि प्र॒ती॒ष्या क॒वयो॑ म॒नीषा ॥ त्वया॑ म॒न्यो स॒रथ॑-
मा॒रु॒जन्तः । ह॒र॒ष॒माणा॑सो धृ॒ष॒ता म॑रु॒त्वः । ति॒ग्मे॒ष्व आ॒यु॒धा स॒शिश॑ानाः । उ॒प॒प्रय॑न्ति॒ नरो॑
अ॒ग्निरू॑पाः । 10

TB 2.4.1.11

म॒न्यु॒र्भगो॑ म॒न्युरे॒वासं दे॒वः । म॒न्युर॒ होता॑ वरु॒णो वि॒श्ववे॑दाः । म॒न्युं वि॒शं ई॒डते॑ दे॒व॒यन्ती॑ ।
पा॒हि नो॑ म॒न्यो तप॑सा॒ श्रमे॑ण ॥ त्वम॑ग्रे व्र॒त॒भृच्छु॑चिः । दे॒वाः आ॒सा॒दया॑ इ॒ह । अ॒ग्रे ह॒व्याय॑
वोढ॑वे ॥ व्र॒ता नु॑ बिभ्र॑द्व्र॒त॒पा अ॒दो॒भ्यः । यजा॑ नो दे॒वाः अ॒जरः॑ सु॒वीरः॑ । दध॑द्-र॒त्नानि॑ सु॒विदा॑नो
अ॒ग्रे () । गो॒पा॒य नो॑ जी॒वसे॑ जा॒तवे॑दः । 11

(जिघांस - त्यमित्रा - अघन्वा - नीडते - सर्वा - अश्वसो - वातो - हृदे - राज - त्यग्निरूपाः -
सुविदानो अग्रे एकं च) (A1)

2.4.2 अनुवाकं 2 - उपहोमाः**TB 2.4.2.1**

चक्षु॑षो हे॒ते म॒न॒सो हे॒ते । वाचो॑ हे॒ते ब्र॒ह्म॑णो हे॒ते । यो मा॑ऽघा॒यु-र॑भि॒दासं॑ति । तम॑ग्रे मे॒न्याऽमे॑निं
कृ॑णु ॥ यो मा॑ चक्षु॑षा॒ यो म॒न॒सा । यो वा॒चा ब्र॒ह्म॑णा ऽघा॒यु-र॑भि॒दासं॑ति । तया॑ऽग्रे त्वं मे॒न्या ।
अ॒मुम॑मे॒निं कृ॑णु ॥ यत् किं॑चा॒सौ म॒न॒सा यच्च॑ वा॒चा । य॒ज्ञिर् जु॒होति॑ यजु॑षा ह॒विर्भिः॑ 12

TB 2.4.2.2

तन् मृ॒त्युर् नि॒र॒ऋ॒त्या स॒म॒वि॒दानः॑ । पु॒राऽऽदि॒ष्टादा॑हुंतीर॒स्य ह॑न्तु ॥ या॒तु॒धाना॑ नि॒र॒ऋ॒तिरा॑दु रक्षः॑

। ते अस्य॑घ्नं त्वनृ॑तेन स॒त्यम् । इन्द्रे॑षिता॒ आज्य॑मस्य म॒ध्नन्तु । मात॑थ-समृ॑द्धिं यदु॒सौ क॑रोति ॥
हन्मि॑ तेऽहं कृतः॑ ह॒विः । यो मे॑ घोर॒मची॑ कृतः । अपा॑ञ्चौ त उ॒भौ बा॒हू । अप॑न॒ह्याम्या॒स्यम् । 13

TB 2.4.2.3

अप॑न॒ह्यामि॑ ते बा॒हू । अप॑न॒ह्याम्या॒स्यम् । अ॒ग्नेर् दे॒वस्य॑ ब्रह्म॑णा । सर्वं॑ तेऽवधि॑षं कृतम् ॥ पु॒रा
ऽमुष्य॑ वष॒ट्कारात् । य॒ज्ञं दे॒वेषु॑ नस्कृ॒धि । स्वि॑ष्ट॒मस्माकं॑ भूयात् । माऽस्मा॑न् प्राप॒न्-नरा॑तयः ॥
अन्ति॑ दूरे स॒तो अ॒ग्ने । भ्रातृ॑व्यस्या ऽभि॒दास॑तः 14

TB 2.4.2.4

व॒षट्कारेण॑ वज्रेण॑ । कृ॒त्याः ह॑न्मि कृ॒ताम॒हम् ॥ यो मा॒ नक्तुं॑ दि॒वा सा॒यम् । प्रा॒तश्चाहो॑ नि॒पीय॑ति
। अ॒द्या तमि॑न्द्र वज्रेण॑ । भ्रातृ॑व्यं पा॒दयाम॑सि ॥ इन्द्र॑स्य गृ॒होऽसि॑ तं त्वा॑ । प्रप॑द्ये स॒गुः साश्वः॑
। स॒ह यन्मे॑ अ॒स्ति तेन॑ ॥ ई॒डे अ॒ग्निं वि॒पश्चित॑म् 15

TB 2.4.2.5

गि॒रा य॒ज्ञस्य॑ साध॑नम् । श्रु॒ष्टी॒वानं॑ धि॒तावा॑नम् ॥ अ॒ग्ने श॒केम॑ ते व॒यम् । यमं॑ दे॒वस्य॑ वा॒जिनः॑
। अति॑ द्वे॒षाःसि॑ तरेम ॥ अ॒वतं॑ मा॒ सम॑नसौ॒ समो॑कसौ । स॒चेत॑सौ स॒रेत॑सौ । उ॒भौ मा॑म॒वतं॑
जा॒तवे॑दसौ । शि॒वौ भ॑वतम॒द्य नः॑ ॥ स्व॒यं कृ॑ण्वानः सु॒गम॑प्रा॒यावम् 16

TB 2.4.2.6

ति॒ग्मशृ॑ङ्गो वृ॒षभः॑ शोशु॑चानः । प्र॒त्नः सु॒धस्थ॑-मनु॒पश्य॑मानः । आ तन्तु॑म॒ग्निर्-द्वि॒व्यं त॑तान
॥ त्वं न॒स्तन्तु॑रु॒त सेतु॑र॒ग्ने । त्वं प॒न्था भ॑वसि दे॒व्यानः॑ । त्वया॑ ऽग्ने पृ॒ष्ठं व॒यमारु॑हेम । अथा॑
दे॒वैः संध॑मादं मदेम ॥ उदु॑त्त॒मं मु॑मु॒ग्धि नः॑ । वि पा॑शं म॒द्भ्यमं॑ चृ॒त । अवा॑ध॒मानि॑ जी॒वसै॑ । 17

TB 2.4.2.7

वृ॒यः सोम॑ व्र॒ते तव॑ । मन॑स्त॒नूषु॑ बिभ्र॑तः । प्र॒जा व॑न्तो अशीमहि ॥ इन्द्रा॑णी दे॒वी सु॒भगा॑ सु॒पत्नी॑
 । उद॑शेन पति॒विद्ये॑ जिगाय । त्रि॒शद॑स्या ज॒घनं॑ योज॑नानि । उ॒पस्थ॑ इन्द्रः॒ स्थवि॑रं बिभर्ति
 ॥ सेना॑ ह॒ नाम॑ पृथि॒वी ध॑नञ्जया । विश्व॑व्य॒चा अ॑दि॒तिः सूर्य॑त्वक् । इन्द्रा॑णी दे॒वी प्रा॒सहा॑ ददा॑ना
 18

TB 2.4.2.8

सा नो॑ दे॒वी सु॒हवा॑ शर्म॑ यच्छतु ॥ आ त्वा॑ ऽहार॒ षम॑न्तर॒भूः । ध्रुव॑स्ति॒ष्ठावि॑चाचलिः । विश॑स्त्वा
 सर्वा॑ वाञ्छन्तु । मा त्वद्-रा॒ष्ट्र-मधि॑भ्रशत् ॥ ध्रुवा॑ द्यौर॒ द्रुवा॑ पृथि॒वी । ध्रुवं॑ विश्व॑मिदं जगत् ।
 ध्रुवा॑ ह॒ पर्व॑ता इ॒मे । ध्रुवो॑ राजा॑ विशा॒मय॑म् ॥ इ॒हैवैधि॑ मा व्य॑थिष्ठाः 19

TB 2.4.2.9

पर्व॑त इ॒वा वि॑चाचलिः । इन्द्र॑ इवे॒ह ध्रुव॑स्ति॒ष्ठ । इ॒ह रा॒ष्ट्र-मु॑धारय ॥ अ॒भि॒ति॒ष्ठ पृ॒तन्य॑तः । अधे॑रे
 सन्तु॑ शत्र॑वः । इन्द्र॑ इव वृ॒त्रहा॑तिष्ठ । अ॒पः क्षे॒त्राणि॑ सृज॑यन् ॥ इन्द्र॑ एण॒मदी॑धरत् । ध्रुवं॑ ध्रुवे॒ण
 ह॒विषा॑ । तस्मै॑ दे॒वा अधि॑ब्रवन् () । अ॒यं च॒ ब्रह्म॑ण॒स्पतिः॑ । 20

(ह॒विर्भि॑ - रा॒स्यं - मभि॑ दास॑तो - वि॒पश्चित् - मप्र॑यावं - जी॒वसे॑ - ददा॑ना - व्यथिष्ठा - ब्रव॑न्नेकं
 च) (A2)

2.4.3 अनुवाकं 3 - उपहोमाः**TB 2.4.3.1**

जुष्टी॑ नरो ब्रह्म॑णा वः पि॒तृणा॑म् । अक्ष॑मव्ययं न किला॑ रिषाथ । यच्छ॑क्रेरीषु बृ॒हता॑ रवेण । इन्द्रे॑
 शुष्म॑मद॒धाथा॑ वसिष्ठाः ॥ पा॒वका॑ नः सर॑स्वती । वाजे॑भिर्-वा॒जिनी॑वती । यु॒ज्ञं वेष्टु॑ धिया॒ वसुः॑ ॥
 सर॑स्वत्य॒भि नो॑ नेषि॒ वस्यः॑ । मा प॑स्फरीः पय॑सा॒ मा न॒ आ ध॑क् । जुष॑स्व नः सु॒ख्या वे॒श्या च॑ 21

TB 2.4.3.2

मा त्वत्क्षेत्रा-ण्यरणानि गन्म ॥ वृञ्जे हविर्नमसा ब्रूहिर्गौ । अयामि सुग् घृतवती सुवृक्तिः ।
अम्यक्षि सन्न सदने पृथिव्याः । अश्रायि यज्ञः सूर्ये न चक्षुः ॥ इहार्वाञ्चमतिह्वये । इन्द्रं जैत्राय
जेतवे । अस्माकमस्तु केवलः ॥ अर्वाञ्चमिन्द्रमुतो हवामहे । यो गोजिद्धन्जि-दश्चजिद्यः 22

TB 2.4.3.3

इमं नो यज्ञं विह्वे जुषस्व । अस्य कुर्मो हरिवो मेदिनं त्वा ॥ असंमृष्टो जायसे मातृवोः शुचिः ।
मन्द्रः कविरुदतिष्ठो विवस्वतः । घृतेन त्वा ऽवर्द्धयन्नग्र आहुत । धूमस्ते केतुरभवद्दिवि श्रितः
॥ अग्निरग्रे प्रथमो देवतानाम् । सम्योताना-मुत्तमो विष्णुरासीत् । यजमानाय परिगृह्य देवान् ।
दीक्षयेदः हविरागच्छतं नः । 23

TB 2.4.3.4

अग्निश्च विष्णो तप उत्तमं महः । दीक्षापालेभ्यो वनतः हि शंक्रा । विश्वैर्देवैर् यज्ञियैः सम्विदानौ
। दीक्षामस्मै यजमानाय धत्तम् ॥ प्रतद्-विष्णुः स्तवते वीर्याय । मृगो न भीमः कुचरो गिरिष्ठाः
। यस्योरुषु त्रिषु विक्रमणेषु । अधिक्षियन्ति भुवनानि विश्वा ॥ नू मर्तो दयते सनिष्यन् यः ।
विष्णाव उरुगायाय दाशत् 24

TB 2.4.3.5

प्र यः सुत्राचा मनसा यजां तै । एतावन्तं नर्यमाविवासात् ॥ विचक्रमे पृथिवीमेष एताम् ।
क्षेत्राय विष्णुर् मनुषे दशस्यन्न । ध्रुवासो अस्य कीरयो जनांसः । उरुक्षितिः सुजनिमा चकार
॥ त्रिदेवः पृथिवीमेष एताम् । विचक्रमे शतर्चसं महित्वा । प्र विष्णु-रस्तु तवसस्त वीयान् ।
त्वेषः ह्यस्य स्थविरस्य नाम । 25

TB 2.4.3.6

होतारं चित्ररथ-मद्धरस्य । यज्ञस्य यज्ञस्य केतुः रुशन्तम् । प्रत्यर्द्धिं देवस्य देवस्य मद्वा । श्रिया
 त्वंऽग्निमतिथिं जनानाम् ॥ आ नो विश्वाभिरूतिभिः सजोषाः । ब्रह्म जुषाणो हर्यश्च याहि ।
 वरीवृजथ स्थविरेभिः सुशिप्र । अस्मे दधद्-वृषणः शुष्ममिन्द्र ॥ इन्द्रः सुवरूपा जनयन्नहानि ।
 जिगायोशिग्भिः पृतना अभिश्रीः 26

TB 2.4.3.7

प्रारोचयन्मनवे केतुमहाम् । अविन्दज्योतिर-बृहते रणाय ॥ अश्विनाववसे निह्वये वाम् । आ
 नूनं यातः सुकृताय विप्रा । प्रातुर्युक्तेन सुवृता रथेन । उपागच्छतमवसा ऽऽगतं नः ॥ अविष्टं
 धीष्वश्विना न आसु । प्रजावद्-रेतो अहयं नो अस्तु । आवां तोके तनये तूतुजानाः । सुरत्नांसो
 देववीतिं गमेम । 27

TB 2.4.3.8

त्वः सोम क्रतुभिः सुक्रतुर्भूः । त्वं दक्षैः सुदक्षो विश्ववेदाः । त्वं वृषां वृषत्वेभिर् महित्वा ।
 द्युम्नेभिर्-द्युम्यभवो नृचक्षाः ॥ अषाढं युध्सु पृतनासु परिमम् । सुवरूपा मफ्स्वां वृजनस्य गोपाम् ।
 भरेषुजाः सुक्षितिः सुश्रवसम् । जयन्तं त्वामनु मदेम सोम ॥ भवा मित्रो न शेव्यो घृतासुतिः
 । विभूतद्युम्न एवया उ सप्रथाः 28

TB 2.4.3.9

अधा ते विष्णो विदुषांचिद्वध्यः । स्तोमो यज्ञस्य राद्व्यो हविष्मन्तः ॥ यः पूर्व्याय वेधसे नवीयसे
 । सुमज्जानये विष्णवे ददाशति । यो जातमस्य महतो महि ब्रवात् । सेदुः श्रवोभिर्-युज्यं
 चिद्व्यसत् ॥ तमु स्तोतारः पूर्व्यं यथा विद ऋतस्य । गर्भः हविषा पिपर्तन । आऽस्य जानन्तो
 नाम चिद्विवक्तन । बृहत्ते विष्णो सुमतिं भजामहे । 29

TB 2.4.3.10

इ॒मा धा॑ना घृ॒तस्त्रु॑वः । ह॒री इ॒होप॑वक्षतः । इन्द्रः॑ सु॒खत॑मे रथे ॥ “ए॒ष ब्र॑ह्मा॑”, प्र ते॑ म॒हे ।
वि॒दथे॑ श॒सिषः॑ ह॒री । य ऋ॑त्वियुः प्र ते॑ वन्वे । व॒नुषो॑ हर्य॒तं म॑दम् । इन्द्रो॑ नाम॑ घृतं न यः
। हरि॑भिश्चार्॒ सेच॑ते । श्रु॒तो गु॑ण आ त्वा॑ विशन्तु 30

TB 2.4.3.11

हरि॑वर्षसं गि॒रः ॥ आच॑रू॒षणि॑प्रा वृष॑भो जना॑नाम् । राजा॑ कृ॒ष्टीनां॑ पु॒रुहू॑त इन्द्रः । स्तु॒तः
श्र॑व॒स्यन्न॑व॒सोप॑म॒द्रिक् । यु॒त्त्वा ह॒री वृ॑षणा ऽऽया॑ह्य॒र्वाङ् ॥ प्र य॑थ॒ सिन्ध॑वः प्रस॒वं य॑दायन्न ।
आपः॑ समु॒द्रः र॒त्थ्येव॑ जग्मुः । अत॑श्चिदिन्द्रः स॒दसो॑ वरी॒यान् । यदी॑ः सोमः॑ पृ॒णाति॑ दु॒ग्धो
अ॒शुः ॥ ह्या॑मसि॒ त्वेन्द्र॑ या॒ह्यर्वाङ् 31

TB 2.4.3.12

अ॒रं ते॑ सोम॑स्तु॒नुवे॑ भवाति । शत॑क्रतो मा॒दय॑स्वा सु॒तेषु॑ । प्रा॒स्माः अ॒व पृ॑त॒नासु॑ प्र यु॒थ्सु ॥
इन्द्रा॑य सोमाः॑ प्र॒दि॒वो वि॑दा॒नाः । ऋ॒भुर॒येभि॑र॒वृष॑पर्वा॒विहा॑याः । प्र॒य॒म्यमा॑णान् प्रति॒ षू॒गृभा॑य ।
इन्द्र॑ पिब॒ वृष॑धू॒तस्य॑ वृ॒ष्णः ॥ अ॒हेड॑मान॒ उप॑याहि य॒ज्ञम् । तुभ्य॑ पवन्त॒ इन्द्र॑वः सु॒तासः॑ । गा॒वो
न व॑ज्रिन्थ॒ स्व॒मोको॑ अच्छ॑ 32

TB 2.4.3.13

इन्द्रा॑ग॒हि प्र॑थ॒मो य॒ज्ञिया॑नाम् ॥ या ते॑ का॒कुथ॑ सु॒कृता॑ या वरि॑ष्ठा । यया॑ श॒श्वत्पि॑ब॒सि म॑द्धं ऊ॒र्मिम्
। तया॑ पाहि॒ प्र ते॑ अ॒द्भ्युर्य॑स्थात् । सं ते॑ वज्रो॑ वर्ततामिन्द्र॒ ग॒व्युः ॥ प्रा॒तर्यु॑जा वि॒बोध॑य ।
अ॒श्विना॒वेह॑ गच्छ॒तम् । अ॒स्य सोम॑स्य पी॒तये॑ ॥ प्रा॒तर्या॑वा॒णा प्र॑थ॒मा य॑जद्धम् । पु॒रा गृ॒द्धाद॑र॒रुषः॑
पि॒बाथः () । प्रा॒तर॒हि य॒ज्ञम॒श्विना॑ दधा॒ते । प्र॒शः स॑न्ति क॒वयः॑ पूर्॒वभा॑जः ॥ प्रा॒तर्य॑जद्धम॒श्विना॑
हि॒नोत॑ । न सा॒यम॑स्ति दे॒वया॑ अ॒जुष्ट॑म् । उ॒तान्यो॑ अ॒स्मद् य॑जते॒ विचा॑यः । पूर्॒वः पूर्॒वो य॑ज॒मानो॑
वनी॑यान् । 33

(चा - श्रुजिघो-गच्छतं नो - दाशन् - नामा - भिश्रीर् - गमेम - सुप्रथा - भजामहे - विशन्तु - याह्यर्वाङ् - च्छ - पिबाथः षट्) (A3)

2.4.4 अनुवाकं 4 - उपहोमाः

TB 2.4.4.1

नक्तं जा॒ताऽस्यो॑षधे । रामे॑ कृ॒ष्णे अ॒सि॒क्रि च॑ । इ॒दं रं॑जनि रजय । कि॒लासं॑ प॒लितं॑ च॒ यत्
॥ कि॒लासं॑ च॒ प॒लितं॑ च॑ । नि॒रि॒तो ना॑शया॒ पृष॑त् । आ नः॑ स्वो अंश्रुतां॑ व॒र्णः । परा॑ श्वेतानि॑
पातय ॥ अ॒सि॒तं ते नि॒लय॑नम् । अ॒स्थान॑म॒सितं॑ तव॑ 34

TB 2.4.4.2

अ॒सि॒क्रिय॑स्योषधे । नि॒रि॒तो ना॑शया॒ पृष॑त् ॥ अ॒स्थि॒जस्य॑ कि॒लास॑स्य । त॒नूज॑स्य च॒ यत्त्व॑चि ।
कृ॒त्यया॑ कृतस्य॒ ब्रह्म॑णा । लक्ष्मं॑ श्वेतम॒नीन॑शम् ॥ स॒रूपा॑ नाम॑ ते मा॒ता । स॒रूपो॑ नाम॑ ते पि॒ता
। स॒रूपाऽस्यो॑षधे सा । स॒रूपमि॑दं कृ॒धि । 35

TB 2.4.4.3

शुन॑ ह॒वेम॑ म॒घवा॑न॒मिन्द्र॑म् । अ॒स्मिन्भ॑रे नृ॒तमं॑ वाज॑सातौ । शृ॒ण्वन्त॑-मु॒ग्रमू॑तये॒ सम॑थ्सु । घ्नन्त॑
वृ॒त्राणि॑ स॒जितं॑ धना॑नाम् ॥ धू॒नुथ॑ द्यां पर्व॑तान्दा॒शुषे॑ वसु॑ । नि वो॑ वना॑ जिह॑ते॒ याम॑नो भि॒या ।
को॒पय॑थ पृ॒थि॒वीं पृ॑श्निमा॒तरः । यु॒धे यदु॑ग्राः पृष॑ती-र॒युग्ध॑म् ॥ प्रवे॑पयन्ति॒ पर्व॑तान् । वि॒र्विञ्च॑न्ति॒
व॒न॒स्पती॑न् 36

TB 2.4.4.4

प्रोवा॑रत मरु॒तो दु॑र्मदा॒ इव॑ । दे॒वा॒सः स॑र्वया वि॒शा ॥ पु॒रु॒त्रा हि॑ स॒दृङ्गु॑सि॒ । वि॒शो वि॒श्वा अनु॑
प्र॒भु । स॒म॒थ्सु॑ त्वा हवामहे ॥ स॒म॒थ्स॒व॒ग्नि॒-म॒व॑से । वा॒ज॒य॒न्तो ह॑वामहे । वा॒जे॒षु चि॒त्ररा॑धसम् ॥
सं॒गच्छ॑द्भु॒ सम॑व॒दद्भु॑म् । सं॒वो म॑ना॒सि जा॑नताम् 37

TB 2.4.4.5

दे॒वा भा॒गं यथा॑ पू॒र्वे । स॒ज्ञा॒ना॒ना उ॒पास॑न्त ॥ स॒मा॒नो मन्त्रः॑ स॒मि॒तिः स॒मा॒नी । स॒मा॒नं मनः॑
स॒ह चि॒त्तमे॑षाम् । स॒मा॒नं के॒तो अ॒भि-स॒श्र॑भद्धम् । स॒ज्ञा॒नेन॑ वो ह॒विषा॑ य॒जामः॑ ॥ स॒मा॒नी व
आकू॑तिः । स॒मा॒ना हृद॑यानि वः । स॒मा॒नम॑स्तु वो॒ मनः॑ । यथा॑ वः सु॒हाऽस॑ति । 38

TB 2.4.4.6

स॒ज्ञा॒नं नः॑ स्वैः । स॒ज्ञा॒नम॑रणैः । स॒ज्ञा॒नम॑श्विना यु॒वम् । इ॒हास्मा॑सु निय॑च्छतम् ॥ स॒ज्ञा॒नं
मे बृ॒हस्प॑तिः । स॒ज्ञा॒नं स॒विता क॑रत् । स॒ज्ञा॒नम॑श्विना यु॒वम् । इ॒ह म॒ह्यं निय॑च्छतम् ॥
उप॑च्छा॒यामि॑व घृ॒णेः । अ॒गन्म॑ शर्म ते व॒यम् 39

TB 2.4.4.7

अ॒ग्ने हिर॑ण्यसं॒दृशः॑ ॥ अ॒द॒ब्धेभिः॑ स॒वितः॑ पा॒युभि॑ष्ट्वम् । शि॒वेभि॑र॒द्य परि॑पाहि नो॒ गय॑म् ।
हिर॑ण्यजिह्वः सु॒वि॒ताय॑ नव्य॑से । रक्षा॒माकि॑र्नो अ॒घश॑स ई॒शत॑ ॥ म॒देम॑दे हि नो॒ द्रु॒दुः ।
यू॒था ग॒वांमृ॑जु॒क्रतुः॑ । सं॒गृ॒भाय॑ पु॒रू श॒ता । उ॒भ॒या ह॒स्त्या व॑सु । शि॒शी॒हि रा॒य आ॑भर । 40

TB 2.4.4.8

शि॒प्रिन् वा॒जा॒नां प॑ते । श॒ची॒व॒स्तव॑ द॒स॒ना । आ तू न॑ इन्द्र भाजय । गो॒ष्वश्वेषु॑ शु॒भ्रुषु॑ ।
स॒हस्रेषु॑ तु॒वीम॑घ ॥ यद्-दे॒वा दे॒व हे॒डन॑म् । दे॒वांसश्च॑कृ॒मा व॒यम् । आदि॑त्या॒स्तस्मा॑न्मा यू॒यम् ।
ऋ॒तस्य॑र्तेन॑ मुञ्चत ॥ ऋ॒तस्य॑र्ते-नादि॑त्याः 41

TB 2.4.4.9

यज॑त्रा मुञ्चते॒ह मा॑ । य॒ज्ञि॒र्वो य॒ज्ञ्वाह॑सः । आ॒शि॒क्षन्तो॑ न शो॒किम॑ ॥ मे॒द॒स्वता॑ यज॑मानाः ।
सु॒चाऽऽज्ये॑न॒ जुह॑तः । अ॒का॒मा वो॑ वि॒श्वे दे॒वाः । शि॒क्षन्तो॑ नोप॑ शो॒किम॑ ॥ यदि॑ दि॒वा यदि॑

नक्तम् । एनं एनस्योऽकरत् । भूतं मा तस्मान्द्रव्यं च () 42

TB 2.4.4.10

द्रुपदादिव मुञ्चतु ॥ द्रुपदादिवेन-मुमुचानः । स्विन्नः स्नात्वी मलादिव । पूतं पवित्रेणे वाज्यम् । विश्वे मुञ्चन्तु मैनसः ॥ उद्वयं तमसस्परि । पश्यन्तो ज्योतिरुत्तरम् । देवं देवत्रा सूर्यम् । अगन्म ज्योतिरुत्तमम् । 43

(तव - कृधि - वनस्पती - ज्ञानता - मसति - वयं - भरा - दित्या - श्व - +नव च)
(A4)

2.4.5 अनुवाकं 5 - उपहोमाः

TB 2.4.5.1

वृषा सो अशुः पवते हविष्मान्-सोमः । इन्द्रस्य भाग ऋतयुः शतायुः । स मा वृषाणं वृषभं कृणोतु । प्रियं विशाः सर्ववीरः सुवीरम् ॥ कस्य वृषा सुते सचा । नियुत्वान् वृषभो रणत् । वृत्रहा सोमपीतये ॥ यस्ते शृङ्ग वृषो नपात् । प्रणपात् कुण्डुपाय्यः । न्यस्मिन्दद् आ मनः । 44

TB 2.4.5.2

तः सद्गीचीरूतयो वृष्णिंयानि । पौश्यानि नियुतः सश्चुरिन्द्रम् । समुद्रं न सिन्धव उक्थशुष्माः । उरुव्यचंसं गिर आविशन्ति ॥ इन्द्राय गिरो अनिशितसर्गाः । अपः प्रैरयन्थ सगरस्य बुद्धधात् । यो अक्षेणेव चक्रिया शचीभिः । विष्वक्तस्तम्भं पृथिवीमुत द्याम् ॥ अक्षोदयच्छवसा क्षामं बुद्धम् । वार्णवातस्तविषीभिरिन्द्रः 45

TB 2.4.5.3

द्वान्यौघादुशमान् ओजः । अवाभिनत्कुभः पर्वतानाम् ॥ आ नो अग्रे सुकेतुना । रयिं

वि॒श्वायु॑पोष॒सम् । मा॒र्डीकं॑ धेहि जी॒वसै॑ ॥ त्व॑ सोम॒ म॒हे भग॑म् । त्वं॑ यू॒नं ऋ॑तायु॒ते । दक्षं॑
दधा॑सि जी॒वसै॑ ॥ रथं॑ यु॒ञ्जते म॒रुतः॑ शु॒भे स॒गम् । सूर॑ो न मि॒त्रावरु॑णा ग॒र्विष्टि॑षु 46

TB 2.4.5.4

रजा॑ंसि चि॒त्रा वि च॑रन्ति त॒न्यवः॑ । दि॒वः सं॒म्राजा॒ पय॑सा न उक्ष॒तम् ॥ वाच॑ सु मि॒त्रावरु॑णा वि॒राव॑तीम्
। प॒र्जन्य॑श्चि॒त्रा व॑दति त्वि॒षीम॑तीम् । अ॒भ्रा व॑सत म॒रुतः॑ सु मा॒यया॑ । द्यां॑ व॒र॒षय॑त-म॒रुणाम॑रे॒पस॑म्
॥ अयु॑क्त स॒प्त शु॒न्ध्यवः॑ । सूर॑ो रथ॑स्य न॒प्त्रियः॑ । ताभि॑र्याति स्वयु॑क्तिभिः ॥ वहि॑ष्ठेभिर्वि॒हर॑न्
यासि॑ तन्तु॑म् 47

TB 2.4.5.5

अ॒व॒व्यय॑न्नसि॒तं दे॒व व॑स्वः । द॒विद्ध॑तो र॒श्मयः॑ सूर्य॑स्य । च॒मे॒वावा॑धुस्त॒मो अ॒फ॒स्वन्तः॑ ॥ प॒र्जन्या॑य
प्र॒गाय॑त । दि॒वस्पु॑त्राय मी॒ढुषै॑ । स नो॑ य॒वस॑मिच्छतु ॥ अ॒च्छा व॑द त॒वसं॑ गी॒र्भिरा॑भिः । स्तु॒हि
प॒र्जन्यं॑ नम॒सा वि॑वास । क॒नि॒क्रद॑द्-वृ॒षभो॑ जी॒रदा॑नुः । रे॒तो द॑धा॒त्वोष॑धीषु ग॒र्भम् । 48

TB 2.4.5.6

यो ग॒र्भमो॑ष॒धीना॑म् । ग॒वां कृ॑णोत्य॒र्वता॑म् । प॒र्जन्यः॑ पु॒रुषी॑णाम् ॥ तस्मा॑ इ॒दास्ये॑ ह॒विः । जु॒होता॑
मधु॑म॒त्तम॑म् । इ॒डां नः॑ स॒म्यत॑ करत् ॥ तिस्रो॑ यद॒ग्रे श॑रदु॒स्त्वामि॑त् । शुचिं॑ घृ॒तेन॑ शुच॑यः
सप॑र्यन् । ना॒मा॒नि चि॒दधि॑रे य॒ज्ञिया॑नि । अ॒सूद॑यन्त त॒नुवः॑ सुजा॑ताः । 49

TB 2.4.5.7

इन्द्र॑श्च नः शु॒नासी॑रौ । इ॒मं य॒ज्ञं मि॑मिक्ष॒तम् । ग॒र्भं ध॑त्त॒स्वस्त्यै॑ ॥ ययो॑रि॒दं वि॒श्वं भु॑वं-
मावि॑वेश । ययो॑रा॒नन्दो॑ नि॒हितो॑ मह॑श्च । शु॒नासी॑रावृ॒तुभिः॑ स॒म्विदा॑नौ । इन्द्र॑वन्तौ ह॒विरि॑दं
जु॒षेथा॑म् ॥ आ घा॑ ये अ॒ग्निमि॑न्ध॒ते । स्तृ॑णन्ति ब॒र॒हिरा॑नुषक् । येषा॑मिन्द्रो॒ युवा॑ स॒खा () ॥
अ॒ग्न इन्द्र॑श्च मे॒दिना॑ । ह॒थो वृ॑त्राण्य॒प्रति॑ । यु॒व॑ हि वृ॒त्रह॑न्त॒मा ॥ याभ्या॑ सु॒व॒रज॑य॒न्नग्रं॑ ए॒व

। यावा॑तस्थ॒तुर्-भुव॑नस्य॒ मद्ध॑ये । प्रच॑र॒षणी॑ वृ॒षणा॑ वज्र॑बाहू । अ॒ग्नी इन्द्रा॑ वृत्र॒हणा॑ हुवे वाम् । 50

(मन् - इन्द्रो - गाविंष्टिषु - तन्तुं - गर्भः - सुजाताः - सखा सप्त च) (A5)

2.4.6 अनुवाकं 6 - उपहोमाः

TB 2.4.6.1

उ॒त नः॑ प्रि॒या प्रि॒यासु॑ । स॒प्तस्व॑सा सुजु॑ष्टा । सर॑स्वती॒ स्तोम्या॑ ऽभूत् ॥ इ॒मा जु॒ह्वा॒ना यु॒ष्मदा॑
नमो॑भिः । प्र॒ति स्तोम॑ः सर॒स्वति॑ जुष॒स्व । तव॑ शर्मन् प्रि॒यत॑मे दधा॒नाः । उप॑स्थेयाम शरु॑णं न
वृक्ष॑म् ॥ त्रीणि॑ प॒दा विच॑क्रमे । विष्णु॑र्गोपा अदा॑भ्यः । ततो॑ धर्मा॑णि धा॒रय॑न् । 51

TB 2.4.6.2

तद॑स्य प्रि॒यम॑भि पाथो॑ अश्याम् । नरो॑ यत्र॑ देव॒यवो॑ मद॑न्ति । उ॒रु॒क्रम॑स्य॒ स हि॑ बन्धु॑रि॒त्था ।
विष्णोः॑ प॒दे पर॑मे मद्ध॒ उथ्सः॑ ॥ कृ॒त्वा दा॑ अ॒स्थु श्रेष्ठः॑ । अ॒द्य त्वा॑ व॒न्वन्थ॑ सुरे॒क्षणाः॑ । मर्त॑
आनाश॑ सुवृ॒क्तिम् ॥ इ॒मा ब्र॑ह्म ब्रह्म॒वाह॑ । प्रि॒या त॒ आ ब॒र॒हिः सी॑द । वी॒हि सू॑र पुरो॒डाश॑म् । 52

TB 2.4.6.3

उप॑ नः सू॒नवो॑ गिरः । शृ॒ण्वन्त्व॑मृत॒स्य ये॑ । सु॒मृ॒डीका॑ भव॑न्तु नः ॥ अ॒द्या नो॑ देव स॒वितः॑ ।
प्र॒जाव॑न्थ सा॒वीः सौ॒भंग॑म् । परा॑ दुःष्व॒प्ति॒यः सु॒व ॥ वि॒श्वानि॑ देव स॒वितः॑ । दु॒रि॒तानि॑ परा॑सुव ।
यद्-भ॒द्रं तन्म॑ आसु॑व ॥ शु॒चि॑म॒कैर॑-बृ॒हस्प॑तिम् 53

TB 2.4.6.4

अ॒द्धरे॑षु नमस्यत । अ॒ना॒म्यो॒ज आच॑के ॥ या धा॒रय॑न्त दे॒वा सु॒दक्षा॑ दक्ष॑पिता॒रा । अ॒सुर्या॑य प्रम॑हसा
॥ स इ॒त्क्षेति॑ सु॒धित॑ ओ॒कसि॑ स्वे । तस्मा॑ इडा॑ पि॒न्वते॑ वि॒श्वदा॑नी । तस्मै॑ वि॒शः स्व॒यमे॒वान॑मन्ति
। यस्मि॑न् ब्र॒ह्मा रा॒जनि॑ पूर्वं एति॑ ॥ सकृ॑तिमिन्द्र॒ सच्यु॑तिम् । सच्यु॑तिं ज॒घन॑च्युतिम् 54

TB 2.4.6.5

क॒नात्का॒भां न॒ आभ॑र । प्र॒य॒प्स्यन्नि॑व स॒क्थ्यौ ॥ वि॒नं इन्द्र॑ मृ॒धो ज॑हि । क॒नी॒खुन॑दिव सा॒पय॑न् ।
अ॒भि नः॑ सु॒ष्टुतिं॑ नय ॥ प्र॒जाप॑तिः स्त्रियां॑ यशः । मु॒ष्कयो॑रद॒धाथ॑ स॒पम् । का॒मस्य॑ तृ॒प्तिमा॑नन्दम्
। तस्या॑ग्रे भाजये॒ह माँ ॥ मोदः॑ प्रमो॒द आ॑नन्दः 55

TB 2.4.6.6

मु॒ष्कयो॑र्निहि॒तः स॑पः । सृ॒त्वेव॑ का॒मस्य॑ तृ॒प्याणि॑ । दक्षि॑णानां प्र॒तिग्र॑हे ॥ म॒न॑सश्चि॒त्त-मा॑कू॒तिम्
। वा॒चः स॒त्य-म॑शीमहि । प॒शूना॑ रूप॒मन्न॑स्य । यशः॑ श्रीः श्र॑यतां मयि ॥ यथा॑ ऽह॒मस्या॑
अ॒तृप॑ः स्त्रियै पु॒मान् । यथा॑ स्त्री तृ॒प्यति॑ पु॒ंसि प्रि॒ये प्रि॒या । ए॒वं भग॑स्य तृ॒प्याणि॑ 56

TB 2.4.6.7

य॒ज्ञस्य॑ का॒म्यः प्रि॒यः ॥ ददा॑मीत्य॒ग्निर्व॑दति । तथेति॑ वा॒युरा॑ह॒ तत् । ह॒न्तेति॑ स॒त्यं च॑न्द्रमाः ।
आ॒दित्यः॑ स॒त्यमो॑मिति ॥ आप॒स्तथ॑-स॒त्यमा॑भरन् । यशो॑ य॒ज्ञस्य॑ दक्षि॑णाम् । अ॒सौ मे॒ कामः॑
समृ॑द्ध्यताम् ॥ न हि स्पर्श॑मवि॒दन्-न॒न्यम॑स्मात् । वैश्वान॑रात् पु॒र ए॒तार॑म॒ग्रेः 57

TB 2.4.6.8

अथे॑ममन्थन्नमृ॒तम॑मू॒राः । वैश्वान॑रं क्षे॒त्रजि॑त्याय दे॒वाः ॥ येषा॑मि॒मे पूर्वे॑ अ॒र्मासु॑ आसन् । अ॒यूपाः
स॒द्म वि॑भृ॒ता पु॒रूणि॑ । वैश्वान॑र॒ त्वया॑ ते नृ॒त्ताः । पृथि॑वी-म॒न्याम॑भि॒तस्थु॑र्-जना॑सः ॥ पृथि॑वीं
मा॒तरं॑ म॒हीम् । अ॒न्तरि॑क्ष-मु॒पब्रु॑वे । बृ॒हती॑मू॒तये॑ दि॒वम् ॥ विश्वं॑ बिभर्ति पृथि॑वी 58

TB 2.4.6.9

अ॒न्तरि॑क्षं वि॒प॒प्रथे॑ । दु॒हे द्यौर् बृ॑हती प॒यः ॥ न ता॑ न॒शन्ति॑ न द॒भाति॑ तस्करः । नैना॑ अ॒मित्रो॑
व्यथि॑राद॒धर॑षति । दे॒वाश्च॑ याभि॒र् यज॑ते ददा॑ति च । ज्यो॒गित्ताभिः॑ स॒चते॑ गो॒पतिः॑ सह ॥ न

ता अर्वा रेणुकंकाटो अश्रुते । न सः स्कृतत्र-मुपयन्ति ता अभि । उरुगायमभयं तस्य ता अनु । गावो मर्त्यस्य विचरन्ति यज्वनः । 59

TB 2.4.6.10

रात्री व्यख्यदायती । पुरुत्रा देव्यक्षभिः । विश्वा अधि श्रियोऽधित ॥ उपं ते गा इवाकरम् । वृणीष्व दुहितर दिवः । रात्री स्तोमं न जिग्युषी ॥ देवीं वाचमजनयन्त देवाः । तां विश्वरूपाः पशवो वदन्ति । सा नो मन्त्रेषुमूर्जं दुहाना । धेनुर्वागस्मानुप सुष्टुतैतु । 60

TB 2.4.6.11

यद् वाग्वदन्त्य-विचेतनानि । राष्ट्री देवानां निषसाद मन्द्रा । चतस्र ऊर्जं दुदुहे पयांसि । कं स्वि दस्याः परमं जंगाम ॥ गौरी मिमाय सलिलानि तक्षती । एकपदी द्विपदी सा चतुष्पदी । अष्टापदी नवपदी बभूवुषी । सहस्राक्षरा परमे व्योमन् ॥ तस्याः समुद्रा अधि वि क्षरन्ति । तेन जीवन्ति प्रदिशश्चतस्रः 61

TB 2.4.6.12

ततः क्षरत्यक्षरम् । तद्-विश्व-मुपजीवति ॥ इन्द्रा सूरान् जनयन्-विश्वकर्मा । मरुत्वाः अस्तु गणवान्-सजातवान् । अस्य स्नुषा-श्वशुरस्य प्रशिष्टिम् । सपत्ना वाचं मनसा उपासताम् ॥ इन्द्रः सूरौ अतरद्-रजांसि । स्नुषा सपत्नाः श्वशुरोऽयमस्तु । अयः शत्रूञ्जयतु जरह्मणः । अयं वाजं जयतु वाजसातौ () ॥ अग्निः क्षत्रभृदनिभृष्टमोजः । सहस्रियो दीप्यता-मप्रयुच्छन् । विभ्राजमानः समिधान उग्रः । आऽन्तरिक्षमरुहद-गन्धाम् । 62

(धारयन् - पुरोडाशं - बृहस्पतिं - जघनच्युति - मानन्दो - भगस्य तृप्या - ण्यग्नेः - पृथिवी - यज्वन - एतु - प्रदिशश्चतस्रो - वाजसातौ चत्वारि च) (A6)

2.4.7 अनुवाकं 7 - उपहोमाः**TB 2.4.7.1**

वृषाँ ऽस्य॑श्शुर॒वृष॑भाय॑ गृह्य॑से । वृषा॑ऽयमु॒ग्रो नृ॒चक्ष॑से । दि॒व्यः क॑र्म॒ण्यो हि॒तो बृ॒हन्ना॑म । वृ॒षभ॑स्य॒
या क॒कुत् ॥ वि॒षूवा॑न्, वि॒ष्णो भ॑वतु । अ॒यं यो मा॑म॒को वृषाँ । अथो॒ इन्द्र॑ इव॒ देवे॑भ्यः ।
वि॒ब्रवी॑तु जने॑भ्यः ॥ आयु॑ष्मन्तुं॒ वर्च॑स्वन्तम् । अथो॒ अधि॑पतिं॒ विशा॑म् 63

TB 2.4.7.2

अ॒स्याः पृ॑थि॒व्या अ॒द्ध्यक्ष॑म् । इ॒ममि॑न्द्र वृ॒षभं॑ कृ॒णु ॥ यः सु॒शृङ्गः॑ सुवृ॒षभः । क॒ल्याणो॒ द्रोण॑
आ॒र्हितः । का॒रूषी॑वल॒प्रगा॑णेन । वृ॒षभे॑ण॒ यजा॑महे ॥ वृ॒षभे॑ण॒ यज॑मानाः । अ॒क्रूरे॑णेव॒ सर्पि॑षाँ ।
मृ॒धेश्च॑ सर्वा॒ इन्द्रे॑ण । पृ॒तना॑श्च॒ जया॑मसि । 64

TB 2.4.7.3

यस्या॒यमृ॑षभो ह॒विः । इन्द्रा॑य॒ परि॑णी॒यते॑ । जया॑ति॒ शत्रु॑मा॒यन्त॑म् । अथो॒ हन्ति॑ पृ॒तन्य॑तः
॥ नृ॒णाम॑हं प्र॒णीर॑सत् । अ॒ग्रं उ॒द्भिन्दु॑ताम॑सत् ॥ इन्द्र॑ शु॒ष्मं त॑नुवा॒ मेर॑यस्व । नी॒चा वि॒श्वा
अ॒भिति॑ष्ठा॒भिमा॑तीः । नि शृ॒णीह्या॑बा॒धं यो नो॒ अस्ति॑ । उ॒रुं नो॑ लो॒कं कृ॑णुहि जी॒रदा॑नो । 65

TB 2.4.7.4

प्रेह्य॑भिप्रेहि॒ प्रभ॑रा॒ सह॑स्व । मा वि॒वेनो॒ वि शृ॑णुष्व॒ जने॑षु । उदी॑डितो वृ॒षभ॑ तिष्ठ॒ शुष्मैः॑ । इन्द्र॑
शत्रू॑न् पु॒रो अ॒स्माकं॑ यु॒द्धय॑ ॥ अ॒ग्रे जे॑ता॒ त्वं ज॑य । शत्रू॑न्थ॒ सह॑स्र॒ ओज॑सा । वि शत्रू॑न्, विमृ॒धो नुद॑
॥ ए॒तं ते स्तो॑मं तुविजा॒त वि॑प्रः । रथं॑ न धी॒रः स्व॑पा॒ अत॑क्षम् । यदी॑द॒ग्रे प्र॑ति॒ त्वं दे॒व ह॑र्याः 66

TB 2.4.7.5

सु॒वर्व॑तीरुप॒ एना॑ जयेम ॥ यो घृ॒तेना॑भिमा॒नितः॑ । इन्द्र॑ जैत्रा॑य॒ जज्ञि॑षे । स नः॒ संका॑सु पा॒रय॑ ।
पृ॒तना॑सा॒ह्येषु॑ च ॥ इन्द्रो॑ जिगा॒य पृ॑थि॒वीम् । अ॒न्तरि॑क्ष॒ सुव॑र्म॒हत् । वृ॒त्रहा॑ पु॒रुचे॑तनः ॥ इन्द्रो॑

जिगाय॑ सह॑सा॒ सहा॑सि । इन्द्रो॑ जिगाय॑ पृत॑नानि॒ विश्वा॑ 67

TB 2.4.7.6

इन्द्रो॑ जा॒तो वि॒ पुरो॑ रुरोज । स नः॑ प॒र॒स्पा वरि॑वः कृ॒णोतु ॥ अ॒यं कृ॒त्तुरगृ॑भीतः । वि॒श्वजि॒
दु॒द्भिदि॒थ-सोमः॑ । ऋषि॑र॒ विप्रः॑ का॒व्येन॑ ॥ वा॒युर॑ग्रेगा य॒ज्ञप्रीः॑ । सा॒कं गु॒न्मन॑सा य॒ज्ञम् । शि॒वो
नि॒युद्धिः॑ शि॒वाभिः॑ ॥ वा॒यो शु॒क्रो अ॑यामि ते । म॒द्धो अ॒ग्रं दि॒विष्टि॑षु 68

TB 2.4.7.7

आया॑ हि सोम॑पीतये । स्वा॒रु॒हो दे॒व नि॒युत्वंता ॥ इ॒ममिन्द्र॑ वर्द्धय॑ क्ष॒त्रिया॑णाम् । अ॒यं वि॒शां
वि॒श॒पति॑रस्तु॒ राजा॑ । अ॒स्मा इन्द्र॑ म॒हि वर्चा॑सि धेहि । अ॒व॒र्चसं॑ कृ॒णुहि॑ शत्रु॑मस्य ॥ इ॒ममा॑भ॒ज
ग्रा॒मे अ॒श्वेषु॑ गो॒षु । नि॒रु॒मुं भ॒ज योऽमि॑त्रो॒ अस्य॑ । व॒रू॒ष्मन् क्ष॒त्रस्य॑ क॒कुभि॑ श्रयस्व । ततो॑
न उ॒ग्रो वि॒भ॒जा व॑सूनि ॥ 69(10)ट.भ.2.4.7.8 अ॒स्मे द्या॑वापृथि॒वी भूरि॑ वा॒मम् । सं दु॑हाथां
घ॒र्मदु॑घेव धेनुः । अ॒यं राजा॑ प्रि॒य इन्द्र॑स्य भूयात् । प्रि॒यो गवा॑मोष॒धीना॑-मु॒तापाम् ॥ यु॒नज्मि॑
त उ॒त्तरा॑व॒न्त-मिन्द्र॑म् । येन॑ जया॑सि न प॒राजया॑सै । स त्वा॑ ऽक॒रेक॑वृष॒भं स्वाना॑म् । अथो॑
राज॑न्नु॒त्तमं॑ मा॒न॒वाना॑म् ॥ उ॒त्तर॑स्त्वम॒धरे॑ ते स॒पत्नाः॑ । ए॒कं वृ॒षा इन्द्र॑स॒खा जिगी॑वान् 70

TB

0

TB 2.4.7.9

वि॒श्वा आ॑शाः पृत॑नाः स॒जय॑ञ्जय॒न् । अ॒भि॒तिष्ठ॑ शत्रू॒यतः॑ स॒हस्व ॥ तु॒भ्यं भ॑रन्ति क्षि॒तयो॑ यविष्ठ
। ब॒लिम॑ग्रे अ॒न्ति त॒ ओत॑ दू॒रात् । आ भ॑न्दिष्ठस्य सु॒मतिं॑ चि॒किद्धि॑ । बृ॒हत्ते॑ अ॒ग्रे म॒हि शर्म॑
भ॒द्रम् ॥ यो दे॒हो अ॑न॒मय॑द्वध॒स्त्रैः । यो अ॑र्य॒पत्नी॑-रुष॒सश्च॑का॒र । स नि॒रुद्ध॑या नहु॑षो य॒हो अ॒ग्निः
। वि॒शश्च॑क्रे ब॒लि॒ह॒तुः स॒होभिः॑ । 71

TB 2.4.7.10

प्र सु॒द्यो अ॒ग्ने अत्य॑ष्य॒न्यान् । आ॒विर्य॑स्मै चारु॑तरो ब॒भूथ॑ । ई॒डेन्यो॑ वपु॒ष्यो वि॒भावो॑ । प्रि॒यो
वि॒शाम॑ति॒थिर्-मा॒नुषी॑णाम् ॥ ब्रह्म॑ ज्ये॒ष्ठा वी॒र्या संभृ॑तानि । ब्रह्मा॒ग्ने ज्येष्ठं॑ दि॒वमा॑त॒तान । ऋ॒तस्य॑
ब्रह्म॑ प्रथ॒मोत ज॑ज्ञे । तेना॒र॒हति॑ ब्रह्म॑णा॒ स्प॒र्द्धितुं॑ कः ॥ ब्रह्म॑ सु॒चो घृ॒तव॑तीः । ब्रह्म॑णा॒ स्वर॑वो
मि॒ताः 72

TB 2.4.7.11

ब्रह्म॑ य॒ज्ञस्य॑ तन्त॑वः । ऋ॒त्विजो॑ ये ह॑विष्कृतः ॥ शृ॒ङ्गाणी॑वेच्छृ॒ङ्गिणाः॑ संद॑द्य॒श्रिरे । च॒षाल॑वन्तः
स्वर॑वः पृथि॒व्याम् । ते दे॒वासः॑ स्वर॑वस्त॒स्थिवा॑सः । नमः॑ सखि॑भ्यः सु॒न्नान्मा ऽव॑गात ॥
अ॒भिभूर॑ग्निर॑तर॒द्-रजा॑सि । स्पृ॒धो वि॒हत्य॑ पृ॒तना॑ अभि॒श्रीः । जुषा॑णो म॒ आहु॑तिं मा महि॒ष्ट ।
ह॒त्वा स॒पत्ना॑न्, वरि॑वस्कर॒न्नः () ॥ ई॒शानं॑ त्वा॒ भुव॑नाना-मभि॒श्रिय॑म् । स्तौ॒म्यग्र॑ उरु॒कृतः॑
सु॒वीर॑म् । ह॒विर॑ जुषा॑णः स॒पत्नाः॑ अभि॒भूर॑सि । ज॒हि शत्रू॑रप॒ मृधो॑ नुदस्व । 73

(वि॒शां - ज॑यामसि - जी॒रदानो॑ - ह॒र्या - वि॒श्वा - दि॒विष्टि॑षु - वसू॒नि - जिगी॑वान्थ - सहो॑भिर् -
मि॒ता - न॑ श्रु॒त्वार्नि॑ च) (A7)

2.4.8 अनुवाकं 8 - उपहोमाः**TB 2.4.8.1**

स प्र॑त्न॒वन्न॑वी॒यसा॑ । अ॒ग्ने द्यु॒म्नेन॑ स॒म्यता॑ । बृ॒हत् तत॑न्थ भा॒नुना॑ ॥ न॒वं नु॑ स्तोमं॑म॒ग्र्यै । दि॒वः
श्ये॑नाय॒ जीजन॑म् । वसोः॑ कु॒विद्व॑नातिं नः ॥ स्वा॒रु॒हा यस्य॑ श्रि॒यो दृ॒शे । र॒यिर्वी॑र॒वतो॑ यथा ।
अ॒ग्ने य॒ज्ञस्य॑ चे॒ततः॑ ॥ अ॒दी॒भ्यः पुर॑ ए॒ता 74

TB 2.4.8.2

अ॒ग्निर्वि॒शां मानु॑षीणाम् । तूर्णी॑ रथः सदा॑ नवः ॥ नवः॑ सोमा॑य वा॒जिनै॑ । आज्यं॑ पय॑सोऽजनि
। जुष्टः॑ शुचि॑तमं वसु॑ ॥ नवः॑ सोम जुषस्व नः । पी॒यूष॑स्येह तृ॒ष्णुहि॑ । यस्ते॑ भा॒ग ऋ॑ताव॒यम्
॥ नव॑स्य सोम ते व॒यम् । आ सु॑म॒तिं वृ॑णीमहे 75

TB 2.4.8.3

स नो॑ रास्व सह॒स्त्रिणः॑ ॥ नवः॑ ह॒विर्जुष॑स्व नः । ऋ॒तुभिः॑ सोम॒ भूत॑मम् । तद॒ङ्ग प्र॑ति॒हर्य॑ नः ।
राज॑न॒थ सोम॑ स्व॒स्तये॑ ॥ नवः॑ स्तोमं॒ नवः॑ ह॒विः । इन्द्रा॑ग्निभ्यां॒ निवे॑दय । तज्जु॑षेताः स॒चेत॑सा
॥ शुचिं॑ नु स्तोमं॒ नव॑जातम॒द्य । इन्द्रा॑ग्नी वृ॒त्रह॑णा जुषे॒थाम् 76

TB 2.4.8.4

उ॒भा हि वाः॑ सु॒हवा॒ जोह॑वीमि । ता वाजः॑ स॒द्य उ॑शते धेष्ठा॑ ॥ अ॒ग्निरिन्द्रो॑ नव॑स्य नः । अस्य॑
ह॒व्यस्य॑ तृप्यताम् । इ॒ह दे॒वौ सह॑स्त्रिणौ ॥ यज्ञं॑ न आ हि गच्छे॑ताम् । वसु॑मन्तः सुव॒र्विद॑म् ।
अ॒स्य ह॒व्यस्य॑ तृप्यताम् । अ॒ग्निरिन्द्रो॑ नव॑स्य नः ॥ विश्वा॑न् दे॒वाः स्त॑र्पयत 77

TB 2.4.8.5

ह॒विषो॑ऽस्य नव॑स्य नः । सुव॒र्विदो॑ हि जंज्ञिरे ॥ ए॒दं ब॒रुहिः॑ सुष्ट॒रीमा॒ नवे॑न । अ॒यं य॒ज्ञो यज॑मानस्य
भा॒गः । अ॒यं ब॑भूव भुव॑नस्य॒ गर्भः॑ । विश्वे॑ दे॒वा इ॒दम॒द्याग॑मिष्ठाः ॥ इ॒मे नु॑ द्यावा॑पृथि॒वी स॒मीची॑
। त॒न्वा॒ने य॒ज्ञं पु॑रु॒पेश॑सं धिया । आऽस्मै॑ पृणीतां॒ भुव॑नानि॒ विश्वा॑ । प्र॒जां पु॑ष्टि॒ममृ॑तं नवे॑न । 78

TB 2.4.8.6

इ॒मे धे॒नू अ॒मृतं॑ ये दुहा॑ते । पय॑स्व॒त्युत्तरा॑मेतु पु॒ष्टिः । इ॒मं य॒ज्ञं जुष॑माणे नवे॑न । स॒मीची॑
द्यावा॑पृथि॒वी घृ॒ताची॑ ॥ यवि॑ष्ठो ह॒व्यवा॑हनः । चि॒त्रभा॑नुर॒घृता॑सु॒तिः । नव॑जातो॒ विरो॑चसे । अ॒ग्ने
तत्ते॑ महि॒त्वन्म॑ ॥ त्वम॑ग्ने दे॒वता॑भ्यः । भा॒गे दे॒व न मी॑यसे 79

TB 2.4.8.7

स ए॒ना वि॒द्वान् यक्ष्य॑सि । नव॑ स्तोमं जुष॑स्व नः ॥ अ॒ग्निः प्रथ॑मः प्राश्ना॑तु । स हि वेद॑ यथा॑
ह॒विः । शि॒वा अ॒स्मभ्य॑-मोष॑धीः । कृ॒णोतु॑ वि॒श्वच॑र॒षणिः ॥ भ॒द्रान्नः॑ श्रेयः॒ सम॑नैष्ट दे॒वाः ।
त्वया॑ऽव॒सेन॒ सम॑शीमहि त्वा । स नो॑ मयो॒भूः पि॑तो आ॒विश॑स्व । शं तो॒काय॑ त॒नुवै॑ स्यो॒नः ()
॥ ए॒तमु॒ त्यं मधु॑ना॒ सम॑यु॒तं यव॑म् । सर॑स्वत्या॒ अधि॑म॒नाव॑च॒र्कषुः॑ । इन्द्र॑ आसी॒थ सीर॑पतिः
श॒तक्र॑तुः । की॒नाशा॑ आसन् म॒रुतः॑ सु॒दान॑वः । 80

(पुर॒ ए॒ता - वृ॒णीम॑हे - जु॒षेथा॑-त॒र्पय॑-ता॒मृतं॑ नवे॒न-मी॑यसे-स्यो॒नश्च॑त्वारि॑ च) (A8)

PrapAtaka Korvai with starting words of 1 to 8 anuvAkams :-

(जुष्ट॑ - श्वक्षु॑षो - जुष्टी॑ नरो - नक्तं॑ जा॒ता - वृषा॑ स - उ॒त नो॑ - वृषा॑ऽस्य॒शुः - स प्र॑त्न॒वदु॑ष्टौ)

korvai with starting words of 1, 11, 21 series of :-

(जुष्टो॑ - म॒न्युर् भ॒गो - जुष्टी॑ नरो - हरि॑वर्पसं गि॒रः - शि॒प्रिन् वा॒जाना॑ - मु॒त नो॑ - यद् वा॒ग्वद॑न्ती
- वि॒श्वा आ॒शा अ॒शीतिः॑)

first and last word - 2nd aShTakam 3rd prapATakam :-

(जुष्टः॑ - सु॒दान॑वः)

॥ हरिः॑ ॐ ॥ ॥ कृष्ण॑ यजुर्वेदीय तैत्तिरीय ब्राह्मणे द्वितीयाष्टके चतुर्थः प्रपाठकः समाप्तः ॥

=====

Appendix ट्.भ.2.4.3.10 "एष ब्रह्मा॑" एष ब्रह्मा॑ य ऋ॒त्वि॒यः । इन्द्रो॑ नाम॑ श्रुतो॒ ग॒णे ॥

(Appearing in TB 3-7-9-5)

=====

2.5 द्वितीयाष्टके पञ्चमः प्रपाठकः - उपहोमशेषः

2.5.1 अनुवाकं 1 - उपहोमाः

TB 2.5.1.1

प्रा॒णो र॑क्षति॒ विश्व॑मेज॒त् । इ॒र्यो भू॑त्वा बहु॒धा ब॑हूनि॒ । स इ॒त्सर्वं॑ व्य॒ानशे॑ ॥ यो दे॒वो दे॒वेषु॑
वि॒भूरन्तः॑ । आ॒वृ॒द्धात् क्षे॒त्रियं॑द्गृ॒हृषा॑ । तमि॒त् प्रा॒णं म॒नसो॑ प॒शिक्ष॑त् । अ॒ग्रं दे॒वानां॑-मि॒दम॑त्तु
नो ह॒विः ॥ म॒नस॑श्चित्ते॒दम् । भू॒तं भ॒व्यं च॑ गु॒प्यते॑ । तद्वि॒ दे॒वेष्व॑ग्रि॒यम् । 1

TB 2.5.1.2

आ न॑ ए॒तु पुर॑श्चर॒म् । स॒ह दे॒वैरि॒मं ह॒वम् । म॒नः श्रे॒यसि॑ श्रे॒यसि॑ । क॒र्मन् य॒ज्ञप॑तिं दध॒त् ॥
जुष॑तां मे॒ वागि॒दं ह॒विः । वि॒राड्दे॒वी पु॒रोहि॑ता । ह॒व्यवा॑डनं पा॒यिनी॑ ॥ यया॑ रू॒पाणि॑ बहु॒धा
वद॑न्ति । पेशा॑सि दे॒वाः प॒रमे॑ ज॒नित्रे॑ । सानो॑ वि॒राडन॑पस्फुरन्ती 2

TB 2.5.1.3

वाग्दे॒वी जुष॑तामि॒दं ह॒विः ॥ चक्षु॑र् दे॒वानां॑ ज्योति॑र॒मृते॑ न्य॒क्तम् । अ॒स्य वि॒ज्ञाना॑य बहु॒धा नि॒धीय॑ते
। तस्य॑ सु॒म्न-म॑शीमहि । मा नो॑ हासीद्-वि॒चक्ष॑णम् ॥ आ॒युरि॒न्नः प्रती॑र्यताम् । अ॒न॒न्धा-श्चक्षु॑षा
व॒यम् । जी॒वा ज्योति॑रशीमहि । सु॒व॒ज्योति॑रु॒तामृ॑तम् ॥ श्रोत्रे॑ण भ॒द्र मु॒त शृ॑ण्वन्ति स॒त्यम् ()
। श्रोत्रे॑ण वाचं बहु॒धोद्य॑ मा॒नाम् । श्रोत्रे॑ण मोद॑श्च मह॑श्च श्रूयते । श्रोत्रे॑ण सर्वा॒ दिश॑ आशृ॒णोमि॑ ॥
येन॑ प्रा॒च्या उ॒त दक्षि॑णा । प्र॒तीच्यै॑ दि॒शः शृ॑ण्वन्त्यु॒त्तरा॑त् । तदि॒च्छ्रोत्रं॑ बहु॒धोद्य॑मा॒नम् । अ॒रात्र॑
नेमिः परि॑ सर्वं बभूव । 3

(अ॒ग्नि - यम॑न॒पस्फुर॑न्ती - स॒त्यं स॒प्त च॑) (A1)

2.5.2 अनुवाकं 2 - उपहोमाः**TB 2.5.2.1**

उदेहि वाजिन्यो अस्यप्स्वन्तः । इदं राष्ट्रमाविश सूनृतावत् । यो रोहितो विश्वमिदं जजान । स नो राष्ट्रेषु सुधितान्दधातु ॥ रोहं रोहं रोहित आरुरोह । प्रजाभिर्वृद्धिं जनुषामुपस्थम् । ताभिः सश्रब्धो अविदुष्यदुर्वीः । गातुं प्रपश्यन्निह राष्ट्रमाहा ॥ आहार्षीद्-राष्ट्रमिह रोहितः । मृधो व्योस्थदभयं नो अस्तु 4

TB 2.5.2.2

अस्मभ्यं द्यावापृथिवी शक्ररीभिः । राष्ट्रं दुहाथामिह रेवतीभिः ॥ विमंमरुश रोहितो विश्वरूपः । समाचक्राणः प्ररुहो रुहश्च । दिवंगन्त्वाय महता महिम्ना । वि नो राष्ट्रमुनत्तु पयसा स्वेन ॥ यास्ते विशस्तपसा संबभूवुः । गायत्रं वृथ्समनु तास्त आगुः । तास्त्वा विशन्तु महसा स्वेन । सं माता पुत्रो अभ्येतु रोहितः । 5

TB 2.5.2.3

यूयमुग्रा मरुतः पृथिमातरः । इन्द्रेण सुयुजा प्रमृणीथ शत्रून् । आ वो रोहितो अशृणोदभिद्यवः । त्रिसंतासो मरुतः स्वादुसंमुदः ॥ रोहितो द्यावापृथिवी जजान । तस्मिंस्तन्तुं परमेष्ठी तंतान । तस्मिञ्छिश्रिये अज एकपात् । अदृश हृद्यावापृथिवी बलेन ॥ रोहितो द्यावापृथिवी अदृशत् । तेन सुवं स्तभितं तेन नाकः 6

TB 2.5.2.4

सो अन्तरिक्षे रजसो विमानः । तेन देवाः सुवर्न्वविन्दन् ॥ सुशेवं त्वा भानवो दीदिवांसम् । समंतासो जुहो जातवेदः । उक्षन्ति त्वा वाजिनमा घृतेन । ससंमग्रे युवसे भोजनानि ॥ अग्रे शर्द्ध महते सौभगाय । तव द्युम्ना-न्युत्तमानि सन्तु । सं जास्पत्यश्च सुयममाकृणुष्व । शत्रूयतामभितिष्ठा महासि () । 7

(अ- स्त्वेतु रोहितो - नाको - महाशंसि) (A2)

2.5.3 अनुवाकं 3 - उपहोमाः

TB 2.5.3.1

पुनर्न॑ इन्द्रो॑ म॒घवा॑ ददातु । धना॑नि श॒क्रो घन्यः॑ सु॒राधाः॑ । अ॒र्वाचीनं॑ कृणुतां॒ याचितो॑ मनः ।
श्रु॒ष्टी नो॑ अ॒स्य ह॒विषो॑ जुषा॒णः ॥ यानि॑ नो जिनन् धना॑नि । ज॒हर्थ॑ शूर म॒न्युना॑ । इन्द्रा॑नुविन्द
न॒स्तानि॑ । अ॒नेन॑ ह॒विषा॑ पुनः ॥ इन्द्र॑ आशा॑भ्यः परि॑ । सर्वा॑भ्योऽभयं॑ करत् ८

TB 2.5.3.2

जेता॑ शत्रून्, विच॑र॒षणिः॑ ॥ आकू॑त्यै त्वा॒ कामा॑य त्वा समृ॑धे त्वा । पुरो॑ द॒धे अमृत॑त्वाय जी॒वसे॑
॥ आकू॑तिम॒स्याव॑से । काम॑मस्य॒ समृ॑द्ध्यै । इन्द्र॑स्य यु॒ञ्जते॑ धियः ॥ आकू॑तिं दे॒वीं मनः॑ सः पुरो॑
द॒धे । य॒ज्ञस्य॑ मा॒ता सु॒हवा॑ मे अस्तु । यदि॑च्छामि॒ मनसा॑ सका॑मः । वि॒देय॑मेन॒द्रुद॑ये निवि॑ष्टम् । 9

TB 2.5.3.3

सेद॑ग्निर॒ग्नीः रत्यै॑त्य॒न्यान् । यत्र॑ वा॒जी तन॑यो वी॒डुपा॑णिः । स॒हस्र॑पाथा अ॒क्षरा॑ सु॒मेति॑ ॥ आशा॑नां
त्वा ऽऽशा॑पा॒लेभ्यः॑ । च॒तुर्भ्यो॑ अ॒मृतै॑भ्यः । इ॒दं भू॒तस्या॑द्वय॒क्षेभ्यः॑ । वि॒धेम॑ ह॒विषा॑ व॒यम् ॥ विश्वा॑
आशा॑ मधु॑ना स॒सृजामि॑ । अ॒नमी॑वा आप॒ ओष॑धयो भवन्तु । अ॒यं यज॑मानो मृ॒धो व्य॑स्यताम् () 10

TB 2.5.3.4

अ॒गृभी॑ताः प॒शवः॑ सन्तु स॒र्वे ॥ अ॒ग्निः सोमो॑ वरु॑णो मि॒त्र इन्द्रः॑ । बृ॒हस्प॑तिः स॒विता॑ यः स॒हस्री॑
। पू॒षा नो॑ गोभि॒रव॑सा॒ सर॑स्वती । त्वष्टा॑ रू॒पाणि॑ सम॑नक्तु य॒ज्ञिः ॥ त्वष्टा॑ रू॒पाणि॑ दध॑ती सर॑स्वती
। पू॒षा भग॑ः स॒विता॑ नो॑ ददातु । बृ॒हस्प॑तिर॒ददु॑दिन्द्रः स॒हस्रै॑म् । मि॒त्रो दा॑ता वरु॑णः सोमो॑

अग्निः । 11

(करन् - निर्विष्ट - मस्यतां - + नव च) (A3)

2.5.4 अनुवाकं 4 - उपहोमाः

TB 2.5.4.1

आ नो भरु भगमिन्द्र द्युमन्तम् । नि ते देष्णस्य धीमहि प्ररेके । उर्व इव पप्रथे कामो अस्मे ।
तमापृणा वसुपते वसूनाम् ॥ इमं कामं मन्दया गोभिरश्वैः । चन्द्रवता राधसा पप्रथश्च । सुव्यवो
मतिभिस्तुभ्यं विप्राः । इन्द्राय वाहः कुशिकासो अक्रन् ॥ इन्द्रस्य नु वीर्याणि प्रवोचम् । यानि
चकारं प्रथमानि वृज्जी 12

TB 2.5.4.2

अहन्नहिमन्वपस्ततर्द । प्र वक्षणा अभिनुत् पर्वतानाम् ॥ अहन्नहिं पर्वते शिश्रियाणम् ।
त्वष्टाऽस्मै वज्रं स्वयं ततक्ष । वाश्रा इव धेनवः स्यन्दमानाः । अञ्जः समुद्र-मवजग्मुरापः
॥ वृषायमाणोऽवृणीत् सोमम् । त्रिकद्रुकेष्वपिबथ सुतस्य । आ सायकं मघवा दत्त वज्रम् ।
अहन्नेनं प्रथमजा महीनाम् । 13

TB 2.5.4.3

यदिन्द्राहन्-प्रथमजा महीनाम् । आन्मायिनाममिनाः प्रोत मायाः । आथ सूर्यं जनयन् द्यामुषासम्
। तादीक्षा शत्रून् किलाविविथसे ॥ अहन् वृत्रं वृत्रतरं व्यसम् । इन्द्रो वज्रेण महता वधेन ।
स्कन्धासीव कुलिशेना विवृक्णा । अहिः शयत उपपृक्-पृथिव्याम् ॥ अयोद्धयेव दुर्मद आ हि
जुह्वे । महावीरं तु विबाध-मृजीषम् 14

TB 2.5.4.4

नाता॑रीरस्य॒ समृ॑तिं॒ व॒धाना॑म् । स॒ रु॒जानाः॑ पिपिषु॒ इन्द्र॑शत्रुः ॥ विश्वो॒ विहा॑या अ॒रतिः॑ । वसु॑र्दधे
हस्ते॒ दक्षि॑णे । त॒रणि॑र्न शि॒श्रथत् । श्रव॑स्य॒या न शि॑श्रथत् । विश्व॑स्मा॒ इदि॑षु॒द्वय॑से । दे॒वत्रा॑
ह॒व्यमू॑र्हिषे । विश्व॑स्मा॒ इथ्सु॑कृते॒ वार॑मृण्वति । अ॒ग्निर् द्वा॒रा व्य॑ण्वति । 15

TB 2.5.4.5

उदु॑ज्जिहा॑नो अ॒भि काम॑मी॒रय॑न् । प्र॒पृञ्च॑न् विश्वा॒ भुव॑नानि॒ पूर्व॑था । आ के॒तुना॒ सुष॑मिद्धो॒ यजि॑ष्ठः
। काम॑ नो अ॒ग्रे अ॒भिर्ह॑र्य दि॒ग्भ्यः ॥ जुषा॑णो ह॒व्यम॑मृतेषु॒ दूढ्यः॑ । आ नो॒ रयि॑ं बहु॒लाङ्
गोम॑तीमिष॑म् । नि॒धेहि॑ यक्ष॑दमृतेषु॒ भूष॑न् ॥ अ॒श्विना॒ य॒ज्ञमा॑गतम् । द॒शुषः॒ पुरु॑द॒ससा॑ । पू॒षा
र॑क्षतु नो॒ रयि॑म् । 16

TB 2.5.4.6

इमं॑ य॒ज्ञम॒श्विना॑ व॒र्द्धय॑न्ता । इ॒मौ र॒यिं य॑ज॒माना॑य ध॒त्तम् । इ॒मौ प॒शून् र॑क्षतां॒ विश्व॑तो॒ नः । पू॒षा
नः पा॑तु स॒दम॑-प्र॒युच्छ॑न् ॥ प्र ते॑ म॒हे स॑रस्वति । सु॒भगे॒ वाजि॑नीवति । स॒त्यवा॑चे॒ भरे॑ म॒तिम्
॥ इ॒दं ते॑ ह॒व्यं घृ॑तव॒त्स-स॑रस्वति । स॒त्यवा॑चे॒ प्रभ॑रेमा ह॒वीःषि॑ । इ॒मानि॑ ते दुरि॒ता सौ॑भ॒गानि॑ ()
। तेभि॑र्व॒यः सु॑भगा॑सः स्याम । 17

(व॒ज् - ग्रही॑ना - मृ॒जीषं॑ - व्य॑ण्वति - र॒क्षतु॑ नो॒ रयि॑ - सौ॒भ॒गान्येकं॑ च) (A4)

2.5.5 अनुवाकं 5 - उपहोमाः**TB 2.5.5.1**

य॒ज्ञो रा॒यो य॒ज्ञ ई॒शो वसू॑नाम् । य॒ज्ञः स॒स्याना॑मु॒त सु॑क्षिती॒नाम् । य॒ज्ञ इ॒ष्टः पू॒र्वचि॑त्तिं दधातु ।
य॒ज्ञो ब्र॑ह्म॒ण्वाः अप्ये॑तु दे॒वान् ॥ अ॒यं य॒ज्ञो व॑र्द्धतां॒ गोभि॑र॒श्वैः । इ॒यं वेदिः॑ स्व॒पत्या॑ सु॒वीरा॑ ।
इ॒दं ब॒रु॒हिर॑तिं ब॒रु॒हीःष्य॑न्या । इ॒मं य॒ज्ञं वि॒श्वे अव॑न्तु दे॒वाः ॥ भ॒ग ए॒व भ॑ग॒वाः अस्तु॑ दे॒वाः ।
तेन॑ व॒यं भ॑ग॒वन्तः स्याम॑ 18

TB 2.5.5.2

तं त्वा॑ भग॒ सर्व॒ इज्जो॑हवीमि । स॒ नो॑ भग॒ पुर॒ एता॑ भवे॒ह ॥ भग॒ प्रणे॑त॒र् भग॒ सत्ये॑राधः ।
भगे॑मां धिय॒मुद॑व दद॒न्नः । भग॒ प्रणो॑ जनय॒ गोभि॑रश्वैः । भग॒ प्र नृभि॑र् नृव॒न्तः स्याम॑ ॥ शश्व॑तीः
समा॒ उप॑यन्ति लो॒काः । शश्व॑तीः समा॒ उप॑यन्त्यापः । इष्टं॑ पू॒र्तः शश्व॑तीनाः॒ समा॑नाः॒ शाश्व॑तेन
। ह॒विषे॑ष्ठा ऽनु॒न्तं लो॒कं पर॑मारु॒रोह॑ । 19

TB 2.5.5.3

इ॒यमे॒व सा॒ या प्र॑थ॒मा व्यौ॑च्छत् । सा रू॒पाणि॑ कुरु॒ते पञ्च॑ दे॒वी ॥ द्वे स्व॑सारौ वय॒तस्त॒न्त्रमे॑तत् ।
स॒नात॑नं॒ वित॑तः॒ षण्म॑यू॒खम् । अवा॒न्याः स्त॑न्तून् किर॒तो धृ॑त्तो अ॒न्यान् । नाव॑पृ॒ज्याते॑ न ग॒माते॑
अ॒न्तम् ॥ आ वो॑ यन्तू॒दवा॑हासो अ॒द्य । वृष्टि॑ये वि॒श्वे म॒रुतो॑ जु॒नन्ति॑ । अ॒यं यो अ॒ग्निर् म॑रु॒तः
समि॑द्धः । ए॒तं जु॑ष॒द्धं क॒वयो॑ यु॒वानः॑ । 20

TB 2.5.5.4

धा॒राव॑रा म॒रुतो॑ धृ॒ष्णुवो॑जसः । मृ॒गा न भी॑मास्त॒विषे॑भि॒रू॒र्मिभिः॑ । अ॒ग्नयो॑ न शु॒शुचा॑ना ऋ॒जीषि॑णः
। भ्रु॒मिं ध॑म॒न्त॒ उप॒ गा अ॑वृण्वत ॥ "विच॑क्रमे॒1", "त्रि॑दे॒वः2" ॥ आवे॑धसं नील॑पृष्ठं बृ॒हन्त॑म् ।
बृ॒हस्प॑तिः॒ स॒दने॑ सा॒दय॑द्धम् । सा॒दद्यो॑निं द॒म आ॑दी॒दिवा॑सम् । हि॒रण्य॑वर्णम॒रुषः॑ स॒पेम॑ ॥ स
हि शु॒चिः श॒तप॑त्रः स शु॒न्ध्यूः 21

TB 2.5.5.5

हि॒रण्य॑वाशीरि॒षिरः॑ सु॒व॒र॒षाः । बृ॒हस्प॑तिः स स्वा॒वेश॑ ऋ॒ष्वाः । पू॒रू स॒खिभ्य॑ आ सु॒तिं के॑रिष्ठः
॥ पू॒षः स्त॒व॑ व्र॒ते व॒यम् । न रि॑ष्येम क॒दा च॑न । स्तो॒तार॑स्त इ॒ह स्म॑सि ॥ यास्ते॑ पू॒षन्ना॑वो
अ॒न्तः संमु॑द्रे । हि॒रण्य॑यी॒न्तरि॑क्षे च॒रन्ति॑ । याभि॑र्यासि दू॒त्याः सूर्य॑स्य । का॒मेन॑ कृतः श्र॒व
इ॒च्छ॒मानः॑ । 22

TB 2.5.5.6

अ॒र॒ण्य॒न्य॒र॒ण्य॒न्य॒सौ । या प्रे॒व न॒श॒य॒सि । क॒था ग्रा॒मं न पृ॑च्छ॒सि । न त्वा॒ भी॒रि॒व वि॒न्द॒ती(३)
॥ वृ॒षा॒र॒वा॒य॒ वद॑ते । यदु॒पाव॑ति चि॒च्छि॒कः । आ॒घ्रा॒टीभि॑रिव धा॒वय॑न्न । अ॒र॒ण्य॒नि॒र॒म॑हीयते ॥
उ॒त गा॒वं इ॒वा॒द॒न् । उ॒तो वे॒श॒मे॒व दृ॒श्य॒ते २३

TB 2.5.5.7

उ॒तो अ॒र॒ण्य॒निः सा॒य॒म् । श॒क॒टी॒रि॒व सर्ज॑ति ॥ गा॒म॒ङ्गै॒ष आ॒ह्व॑यति । दा॒र्व॒ङ्गै॒ष उ॒पा॒व॒धी॒त् ।
वस॑न्न॒र॒ण्य॒न्या॒ः सा॒य॒म् । अ॒क्रु॑क्ष॒दि॒तिं म॒न्य॒ते ॥ न वा अ॒र॒ण्य॒नि॒र॒ह॑न्ति । अ॒न्य॒श्चे॒न्नाभि॑गच्छति ।
स्वा॒दोः फ॒ल॑स्य ज॒ग्ध्वा । यत्र॑ का॒मं नि॒प॑द्यते () ॥ आ॒ञ्ज॑नगन्धी॒ः सु॒र॒भी॒म् । ब॒ह्व॒न्नाम॑कृ॒षी॒व॒लाम्
। प्रा॒हं मृ॒गाणां॑ मा॒तर॑म् । अ॒र॒ण्य॒नी॒म॑श॒ः-सि॒ष॒म् । २४

(स्या॒म - रु॒रो॒ह - यु॒वा॒नः - शु॒न्ध - यू॒रि॒च्छ॒मा॒नो - दृ॒श्य॒ते - नि॒प॑द्यते च॒त्वारि॑ च) (A5)

2.5.6 अनुवाकं 6 - उपहोमाः**TB 2.5.6.1**

वा॒त्र॒ह॒त्या॒य॒ श॒वं॒से । पृ॒त॒ना॒-सा॒ह्या॒य॒ च । इ॒न्द्र॒त्वा॒ऽऽव॑र्तयामसि ॥ सु॒ब्र॒ह्मा॒णं॑ वी॒र॒व॑न्तं बृ॒हन्त॑म्
। उ॒रुं ग॑भी॒रं पृ॒थु॒बु॒द्ध॒मि॒न्द्र । श्रु॒त॒र्षि॑-मु॒ग्र॒म॑भि॒मा॒ति॒षा॒हम् । अ॒स्मभ्य॑ चि॒त्रं वृ॑ष॒णः॒ र॒यिं दा॑ः
॥ क्षे॒त्रि॒यै त्वा॒ नि॒र॒ऋ॑त्यै त्वा । द्रु॒हो मु॑ञ्चामि वरु॒णस्य॑ पाशा॑त् । अ॒ना॒ग॒सं ब्र॒ह्म॑णे त्वा करोमि २५

TB 2.5.6.2

शि॒वे ते॒ द्या॒वा॒पृ॒थि॒वी उ॒भे इ॒मे ॥ शं ते॑ अ॒ग्निः स॒हा॒द्भि॒र॑स्तु । शं द्या॒वा॒पृ॒थि॒वी स॒हो॒ष॑धीभिः ।
श॒म॒न्त॒रि॑क्षः स॒ह वा॒तेन॑ ते । शं ते॑ च॒त॒स्रः प्र॒दि॒शो॑ भवन्तु ॥ या दै॒वी॒श्च॒त॒स्रः प्र॒दि॒शः ।
वा॒त॒प॒त्नी॒र॒भि॒ सूर्यो॑ वि॒च॒ष्टे । ता॒सां त्वा ज॒र॒स॒ आ॒द॑धामि । प्र यक्ष॑म॒ एतु॑ नि॒र॒ऋ॑तिं प॒रा॒चैः ॥

अमोचि॑ यक्ष्मा॑द्-दुरि॒ता-दव॑त्यै 26

TB 2.5.6.3

द्रुहः॑ पाशा॒न्निर॒ऋत्यै॑ चोद॑मोचि । अहा॑ अव॑र्तिमवि॑दथ॒ स्योन॑म् । अप्य॑भूद्-भु॒द्रे सु॑कृतस्य॒ लोके॑
॥ सूर्य॑मृतं॒ तम॑सो॒ ग्राह्या॑ यत् । दे॒वा अमु॑ञ्च-न्नसृ॑जन्व्येनसः । ए॒वम॒हमि॑मं॒ क्षेत्रि॑याज्जामि॒शः॒ सात्
। द्रुहो॑ मुञ्चामि॒ वरु॑णस्य॒ पाशा॑त् ॥ बृह॑स्पते॒ युवमि॑न्द्रश्च॒ वस्वः॑ । दि॒व्यस्ये॑शाथे॒ उत॑ पा॒र्थिव॑स्य
। ध॒त्तः॒ रु॒यिः॒ स्तु॒वते॑ की॒रये॑ चित् 27

TB 2.5.6.4

यूयं॑ पा॒त स्व॑स्तिभिः॒ सदा॑ नः ॥ दे॒वायु॑ध॒मिन्द्र॑माजोहु॑वानाः । वि॒श्वावृ॑ध॒मभि॑ ये रक्ष॑माणाः । येन॑
हृ॒ता दी॑र्घम॒द्धान॑मायन् । अ॒न॒न्तम॑र्ध॒मनि॑वर्ध॒-स्यमा॑नाः ॥ यत्ते॑ सु॒जाते॑ हि॒मव॑न्थ्सु भेष॒जम् । म॒योभूः॑
श॒न्त॑मा॒ यद्दृ॑दोऽसि॑ । ततो॑ नो दे॒हि सी॑बले ॥ अ॒दो गि॒रिभ्यो॑ अधि॒ यत्प्र॑धाव॑सि । सः॒शोभ॑माना
क॒न्ये॒व शु॒भ्रे 28

TB 2.5.6.5

तां त्वा॑ मु॒द्गला॑ ह॒विषा॑ वर्द्धय॑न्ति । सा नः॑ सी॒बले॑ रु॒यिमा॑भाजये॒ह ॥ पूर्वं॑ दे॒वा अप॑रेणा-
नु॒पश्य॑ञ्जन्म॑भिः । जन्मा॒न्यवरैः॑ परा॑णि । वेदा॑नि दे॒वा अ॒यम॑स्मीति॒ माम् । अ॒हः॒ हित्वा॑ शरी॑रं
ज॒रसः॑ प॒रस्ता॑त् ॥ प्रा॒णापा॒नौ चक्षुः॑ श्रोत्र॑म् । वाचं॑ मन॑सि संभृ॑ताम् । हि॒त्वा शरी॑रं ज॒रसः॑
प॒रस्ता॑त् । आ भू॑तिं भूतिं॒ वयम॑श्च॒वामहै॑ () ॥ इ॒मा ए॒व ता उ॒षसो॑ याः प्र॑थ॒मा व्यौच्छ॑न् । ता
दे॒व्यः कु॑र्वते पञ्च॑ रू॒पा । शश्व॑तीर्ना॒वपृ॑ज्यन्ति । न ग॑म॒न्त्यन्त॑म् । 29

(करो - म्यव॑त्यै - चि - च्छु॑भ्रे - ऽश्व॑वामहै च॒त्वारि॑ च) (A6)

2.5.7 अनुवाकं 7 - उपहोमाः**TB 2.5.7.1**

वसू॑नां त्वाऽऽधी॑तेन । रु॒द्राणा॑मूर्म्या । आ॒दि॒त्यानां॑ तेज॑सा । वि॒श्वेषां॑ दे॒वानां॑ ऋतु॑ना । म॒रुता॑मे॒घ्ना जु॒होमि॑ स्वाहा॑ ॥ अ॒भिभू॑ति-र॒हमा॑गमम् । इन्द्र॑सखा स्वा॒युधः॑ । आस्वा॑शासु दु॒ष्पहः॑ ॥ इ॒दं व॑र्चो अ॒ग्निना॑ द॒त्तमा॑गात् । यशो॑ भर्गुः॒ सह॒ ओजो॑ बलं॑ च 30

TB 2.5.7.2

दी॒र्घायु॑त्वाय॑ श॒तशार॑दाय । प्र॒तिगृ॑भ्णामि म॒हते॑ वी॒र्याय॑ ॥ आयु॑रसि वि॒श्वायु॑रसि । स॒र्वायु॑रसि स॒र्वमायु॑रसि । सर्वं॑ म॒ आयु॑र्भूयात् । स॒र्वमायु॑र्गेषम् ॥ भूर्भुवः॑ सु॒वः ॥ अ॒ग्निर्-ध॑र्मे॒णान्नादः॑ । मृ॒त्युर्-ध॑र्मे॒णान्न॑पतिः । ब्रह्म॑ क्षु॒त्रं स्वाहा॑ । 31

TB 2.5.7.3

प्र॒जाप॑तिः प्र॒णेता । बृ॒हस्प॑तिः पुर ए॒ता । य॒मः प॑न्थाः । च॒न्द्रमाः॑ पुनर॒सुः स्वाहा॑ ॥ अ॒ग्निरे॒न्नादोऽन्न॑पतिः । अ॒न्नाद्य॑म॒स्मिन् य॒ज्ञे यज॑मानाय ददातु स्वाहा॑ ॥ सोमो॑ राजा॒ राज॑पतिः । रा॒ज्यम॒स्मिन् य॒ज्ञे यज॑मानाय ददातु स्वाहा॑ ॥ वरु॑णः स॒म्राट् ध॑स॒म्राद॑तिः । सा॒म्राज्य॑म॒स्मिन् य॒ज्ञे यज॑मानाय ददातु स्वाहा॑ । 32

TB 2.5.7.4

मि॒त्रः क्षु॒त्रं क्षु॒त्रप॑तिः । क्षु॒त्रम॒स्मिन् य॒ज्ञे यज॑मानाय ददातु स्वाहा॑ ॥ इन्द्रो॑ बलं॑ बल॑पतिः । बल॑म॒स्मिन् य॒ज्ञे यज॑मानाय ददातु स्वाहा॑ ॥ बृ॒हस्प॑तिर् ब्रह्म॑ ब्रह्म॑पतिः । ब्रह्मा॒स्मिन् य॒ज्ञे यज॑मानाय ददातु स्वाहा॑ ॥ स॒वि॒ता रा॒ष्ट्रं रा॒ष्ट्रप॑तिः । रा॒ष्ट्रम॒स्मिन् य॒ज्ञे यज॑मानाय ददातु स्वाहा॑ ॥ पू॒षा वि॒शां वि॑द॑तिः । वि॒शम॒स्मिन् य॒ज्ञे यज॑मानाय ददातु स्वाहा॑ () ॥ सर॑स्वती पु॒ष्टिः पु॒ष्टिप॑त्नी । पु॒ष्टिम॒स्मिन् य॒ज्ञे यज॑मानाय ददातु स्वाहा॑ ॥ त्वष्टा॑ पशूनां मि॒थुना॑नां॑ रू॒पकृ॑द्-रू॒पप॑तिः । रू॒पेणा॒स्मिन् य॒ज्ञे यज॑मानाय प॒शून् द॑दातु स्वाहा॑ । 33

special korvai

(अग्निः सोमो वरुणो मित्र इन्द्रो बृहस्पतिः सविता पूषा सरस्वती त्वष्टा दश)

(च - स्वाहा - साम्राज्यमस्मिन् यज्ञे यजमानाय ददातु स्वाहा - विशमस्मिन् यज्ञे यजमानाय ददातु स्वाहा चत्वारि च) (A7)

2.5.8 अनुवाकं 8 - उपहोमाः**TB 2.5.8.1**

स ई पाहि य ऋजीषी तरुत्रः । यः शिप्रवान् वृषभो यो मंतीनाम् । यो गोत्रभिद्-वज्रभृद्यो हरिष्ठाः । स इन्द्र चित्राः अभितृन्धि वाजान् ॥ आ ते शुष्मो वृषभ एतु पश्चात् । ओत्तरादधरागा पुरस्तात् । आ विश्वतो अभि समैत्स्वर्वाङ् । इन्द्रं द्युम्नः सुर्वर्वद्वेह्यस्मे ॥ प्रोष्वस्मै पुरोरथम् । इन्द्राय शूषमर्चत 34

TB 2.5.8.2

अभीके चिदु लोककृत् । सङ्गे समथ्सु वृत्रहा । अस्माकं बोधि चोदिता । नभन्ता-मन्यकेषाम् । ज्याका अधि धन्वसु ॥ इन्द्रं वयः शुनासीरम् । अस्मिन् यज्ञे हवामहे । आवाजैरुप नो गमत् ॥ इन्द्राय शुनासीराय । सुचा जुहुत नो हविः 35

TB 2.5.8.3

जुषतां प्रति मेधिरः ॥ प्र हव्यानि घृतवन्त्यस्मै । हर्यश्वाय भरता सजोषाः । इन्द्रर्तुभिर् ब्रह्मणा वावृधानः । शुनासीरी हविरिदं जुषस्व ॥ वयः सुपर्णा उपसेदुरिन्द्रम् । प्रियमेधा ऋषयो नाधमानाः । अप ध्वान्तमूर्णुहि पूर्द्धि चक्षुः । मुमुग्ध्यस्मान् निधयेव बद्धान् ॥ बृहदिन्द्राय गायत 36

TB 2.5.8.4

मरुतो वृत्रहन्तमम् । येन ज्योति-रजनयन्नृतावृधः । देवं देवाय जागृवि ॥ का मिहैकाः क इमे पतङ्गाः । मान्थालाः कुलि परि मा पतन्ति । अनावृतैनान्-प्रधमन्तु देवाः । सौपर्णं चक्षुस्तनुवा विदेय ॥ एवा वन्दस्व वरुणं बृहन्तम् । नमस्या धीरममृतस्य गोपाम् । स नः शर्म त्रिवरूथं वियसत् 37

TB 2.5.8.5

यूयं पात स्वस्तिभिः सदा नः ॥ नाके सुपर्णमुप यत्-पतन्तम् । हृदा वेनन्तो अभ्यचक्षत त्वा । हिरण्यपक्षं वरुणस्य दूतम् । यमस्य योनौ शकुनं भुरण्युम् ॥ शं नो देवीरभिष्टये । आपो भवन्तु पीतये । शं योरभिसंवन्तु नः ॥ ईशाना वार्याणाम् । क्षयन्ती-श्चरषणीनाम् 38

TB 2.5.8.6

अपो याचामि भेषजम् ॥ अफ्सु मे सोमो अब्रवीत् । अन्तर विश्वानि भेषजा । अग्निं च विश्वशम्भुवम् । आपश्च विश्वभेषजीः ॥ यदुफ्सु ते सरस्वति । गोष्वश्वेषु यन्मधु । तेन मे वाजिनीवति । मुखमङ्घ्रिं सरस्वति ॥ या सरस्वती वैशम्भल्या 39

TB 2.5.8.7

तस्यां मे रास्व । तस्यांस्ते भक्षीय । तस्यांस्ते भूयिष्ठभाजो भूयास्म ॥ अहं त्वदस्मि मदसि त्वमेतत् । ममांसि योनिस्तव योनिरस्मि । ममेव सन्वहं हव्यान्यग्रे । पुत्रः पित्रे लोककृज्जातवेदः ॥ इहैव सन्तत्र सन्त त्वा ऽग्रे । प्राणेन वाचा मनसा बिभर्मि । तिरो मा सन्तमायुर्मा प्रहासीत् 40

TB 2.5.8.8

ज्योतिषा त्वा वैश्वानरेणोपतिष्ठे ॥ अयं ते योनिर्ऋत्वियः । यतो जातो अरोचथाः । तं जानन्नग्र आरोह । अथा नो वर्द्धया रयिम् ॥ या ते अग्रे यज्ञिया तनूस्तये-ह्यारोहात्माऽऽत्मानम् । अच्छा वसूनि कृण्वन्नस्मे नर्या पुरूणि । यज्ञो भूत्वा यज्ञमासीदु स्वां योनिम् । जातवेदो भुव आजायमानः

सक्षय एहि ॥ उपावरोह जातवेदः पुनस्त्वम् 41

TB 2.5.8.9

देवेभ्यो हव्यं वह नः प्रजानन् । आयुः प्रजा रयिमुस्मासु धेहि । अजस्रो दीदिहि नो दुरोणे ॥
तमिन्द्रं जोहवीमि मघवानमुग्रम् । सत्रादधान-मप्रतिष्कृत शवांसि । मंहिष्ठो गीर्भिरा च यज्ञियो
ऽववर्तत् । राये नो विश्वा सुपथा कृणोतु वज्री ॥ त्रिकद्रुकेषु महिषो यवांशिरं तुविशुष्मस्तृपत् ।
सोममपिबद्-विष्णुना सुतं यथावशत् । स ई ममाद् महि कर्म कर्तवे महामुरुम् 42

TB 2.5.8.10

सैन सश्वद्-देवं देवः सत्यमिन्दुः सत्य इन्द्रः ॥ विदद्यती सरमा रुग्णमद्रेः । महि पार्थः
पूर्व्यः सद्भिर्यक्रः । अग्रं नयथ सुपद्यक्षराणाम् । अच्छा रवं प्रथमा जानती गात् ॥ विदद्-गव्यः
सरमा दृढमूर्धम् । येना चुकं मानुषी भोजते विट् । आ ये विश्वा स्वपृत्यानि चक्रुः । कृण्वानासो
अमृतत्वाय गातुम् ॥ त्वं नृभिर्नृपते देवहूतौ 43

TB 2.5.8.11

भूरीणि वृत्वा हर्यश्च हसि । त्वं निदस्युं चुमुरिम् । धुनिं चास्वापयो दभीतये सुहन्तु ॥ एवा
पाहि प्रत्नथा मन्देतु त्वा । श्रुधि ब्रह्म वावृधस्वोत गीर्भिः । आविः सूर्यं कृणुहि पीपिहीषः ।
जहि शत्रूँरभि गा इन्द्र तृन्धि ॥ अग्रे बाधस्व विमृधो नुदस्व । अपामीवा अप रक्षांसि सेध
। अस्माथ-समुद्राद्-बृहतो दिवो नः 44

TB 2.5.8.12

अपां भूमानमुप नः सृजेह ॥ यज्ञ प्रतिष्ठि सुमतौ सुशेवा आ त्वा । वसूनि पुरुधा विंशन्तु ।
दीर्घमायुर यजमानाय कृण्वन् । अथामृतेन जरितारमङ्गिध ॥ इन्द्रः शुनावद्-वितनोति सीरम् ।
सम्वत्सरस्य प्रतिमाणमेतत् । अर्कस्य ज्योतिस्तदिदास ज्येष्ठम् । सम्वत्सरः शुनवत्सीरमेतत्

॥ इन्द्रस्य राधः प्रयतं पुरु त्मना () । तदर्करूपं विमिमानमेति । द्वादशारे प्रतितिष्ठतीद्-वृषा
॥ अश्वायन्तो गव्यन्तो वाजयन्तः । हवामहे त्वोपगन्तु वा उ । अभूषन्तस्त्वा सुमतौ नवायाम्
। वयमिन्द्र त्वा शुनः हुवेम । 45

(अर्चत - हविर - गायत - यस्सच - चरूषणीनां - वैशम्भल्या - हासीत् - त्व - मुरुं -
देवहूतौ - नः - त्मना षट् च) (A8)

PrapAtaka Korvai with starting words of 1 to 8 anuvAkams :-

(प्राण - उदेहि - पुनर्न - आ नो भर - यज्ञो रायो - वार्त्रहत्याय - वसूनाः - स ई पाह्य ष्ठौ)

korvai with starting words of 1, 11, 21 series of daSinis :-

(प्राणो रक्ष - त्यगृभीता - धारावरा मरुतो - दीर्घायुत्वाय - ज्योतिषा त्वा पञ्चचत्वारिंशत्)

first and last word 2nd aShTakam 5th prapAtakam :-

(प्राणः - शुनः हुवेम)

॥ हरिः ॐ ॥ ॥ कृष्ण यजुर्वेदीय तैत्तिरीय ब्राह्मणे द्वितीयाष्टके पञ्चमः प्रपाठकः समाप्तः ॥
Appendix ट.भ.2.5.5.4 - "विचक्रमे 1", "त्रिदेवः2" विचक्रमे पृथिवीमेष एताम् । क्षेत्राय
विष्णुर् मनुषे दशस्यन् । ध्रुवासो अस्य कीरयो जनांसः । उरुक्षितिः सुजनिमा चकार ॥ 1
त्रिदेवः पृथिवीमेष एताम् । विचक्रमे शतर्चसं महित्वा । प्र विष्णु-रस्तु तवसस्त वीयान् । त्वेषः
ह्यस्य स्थविरस्य नाम ॥ 2 Both appearing in T.B.2.4.3.5

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च

2.6.1 अनुवाकं 1 - ग्रहाः

TB 2.6.1.1

स्वा॒र्द्धीं त्वा॑ स्वा॒दुना॑ । ती॒व्रां ती॒व्रेण॑ । अ॒मृता॑-म॒मृतेन॑ । मधु॑मतीं मधु॑मता । सृ॒जामि॑ सꣳ सोमे॑न
। सोमो॑ऽस्य॒श्विभ्यां॑ पच्यस्व । सर॑स्वत्यै पच्यस्व । इन्द्रा॑य सु॒त्राम्णे॑ पच्यस्व ॥ परी॒तोषि॑ञ्चता
सु॒तम् । सोमो॑ य उ॒त्तमꣳ ह॒विः १

TB 2.6.1.2

दध॒न्वा यो न॑र्यो अ॒फस्व॑न्तरा । सु॒षाव॑ सोम॒मद्रि॑भिः ॥ पु॒नातुं॑ ते परि॒स्रुत॑म् । सोमꣳ सूर्य॑स्य
दुहि॒ता । वारे॑ण शश्व॑ता तना॑ । वा॒युः पू॒तः प॒वित्रे॑ण । प्रा॒ङ्स्सोमो॑ अति॒द्रुतः॑ । इन्द्र॑स्य यु॒ज्यः
सखा॑ ॥ वा॒युः पू॒तः प॒वित्रे॑ण । प्र॒त्यङ्स्सोमो॑ आति॒द्रुतः॑ २

TB 2.6.1.3

इन्द्र॑स्य यु॒ज्यः सखा॑ ॥ ब्रह्मा॑ क्षु॒त्रं प॑वते तेज॑ इन्द्रि॒यम् । सुर॑या सोमः॑ सु॒त आसु॑तो मदा॑य
। शु॒क्रेण॑ देव दे॒वताः॑ पि॒पृग्धि॑ । रसे॑नान्नं यज॑मानाय धेहि ॥ कु॒विदु॑ङ्ग यव॑मन्तो यव॑ चित्
। यथा॑ दान्त्य॑नुपूर्व॑ वि॒यूय॑ । इहे॑हैषां कृणु॑त भोज॑नानि । ये ब॒र॒हिषो॑ नमो॑वृत्तिं न जग्मुः ॥
उ॒प॒या॒म-गृ॑हीतोऽस्य॒श्विभ्यां॑ त्वा जुष्ट॑ गृह्णामि ३

TB 2.6.1.4

सर॑स्वत्या इन्द्रा॑य सु॒त्राम्णे॑ ॥ ए॒ष ते॒ योनि॑स्तेज॑से त्वा । वी॒र्या॑य त्वा बला॑य त्वा ॥ तेजो॑ऽसि
तेजो॑ मयि॑ धेहि । वी॒र्य॑मसि वी॒र्यं मयि॑ धेहि । बल॑मसि बलं॑ मयि॑ धेहि ॥ नाना॑ हि वां दे॒वहि॑तꣳ
सदः॑ कृतम् । मा सꣳसृ॑क्षाथां पर॒मे व्यो॑मन् । सुरा॑ त्वमसि॑ शु॒ष्मिणी॑ सोम॑ ए॒षः । मा मां
हिꣳसीः स्वां॑ योनि॑मावि॒शन् ॥ ४

TB 2.6.1.5

उ॒प॒या॒म॒गृ॒ही॒तोऽ॒स्या॒श्वि॒नं तेजः॑ । सा॒र॒स्व॒तं वी॒र्य॑म् । ऐ॒न्द्रं ब॒लम् ॥ ए॒ष ते॒ योनि॑र्मोदाय॒ त्वा ।
आ॒न॒न्दाय॑ त्वा॒ मह॑से॒ त्वा ॥ ओ॒जोऽ॒स्यो॒जो मयि॑ धेहि । म॒न्युर॑सि म॒न्युं मयि॑ धेहि । महो॑ऽसि
महो॑ मयि॑ धेहि । सहो॑ऽसि सहो॑ मयि॑ धेहि ॥ या व्या॒घ्रं वि॒षू॒चिका॑ () । उ॒भौ वृ॒कं च॑ रक्ष॑ति
। श्ये॒नं प॑त॒त्रिण॑सि॒हम् । से॒मं पा॒त्व॒हसः॑ ॥ सं पृ॒चः स्थ॑ सं मा॑ भ॒द्रेण॑ पृ॒ङ्ग । वि॒पृचः॑
स्थ॑ वि मा॑ पा॒प्मना॑ पृ॒ङ्ग । 5

(ह॒विः - प्र॒त्यङ्स्वो॒मो आ॒ति॒द्रु॒तो - गृ॒ह्णा - म्या॒वि॒शन् - वि॒षू॒चिका॒ पञ्च॑ च) (A1)

2.6.2 अनुवाकं 2 - ग्रहोपस्थानम्

TB 2.6.2.1

सो॒मो रा॒जाऽमृ॑तं॒ सु॒तः । ऋ॒जी॒षेणा॑ज॒हान्मृ॑त्युम् । ऋ॒तेन॑ स॒त्यमिन्द्रि॑यम् । वि॒पानं॑ शु॒क्रम॑न्ध॒सः
। इन्द्र॑स्येन्द्रि॒यम् । इ॒दं प॒योऽमृ॑तं मधु॑ ॥ सोमं॑ म॒द्भ्यो व्य॑पिबत् । छ॒न्द॒सा ह॑सः॒ शुचि॑षत् ।
ऋ॒तेन॑ स॒त्यमिन्द्रि॑यम् । अ॒द्भ्यः क्षी॑रं व्य॑पिबत् 6

TB 2.6.2.2

क्रु॒ड्ढाङ्गि॑र॒सो धि॒या । ऋ॒तेन॑ स॒त्यमिन्द्रि॑यम् । अ॒न्नात् परि॑स्रु॒तो रस॑म् । ब्र॒ह्म॑णा व्य॑पिबत् क्ष॒त्रम्
। ऋ॒तेन॑ स॒त्यमिन्द्रि॑यम् ॥ रे॒तो मू॒त्रं वि॑ज॒हाति॑ । योनिं॑ प्रवि॒शदिन्द्रि॑यम् । गर्भो॑ ज॒रायु॑णाऽऽवृ॑तः
। उ॒ल्बं ज॑हाति॒ जन्म॑ना । ऋ॒तेन॑ स॒त्यमिन्द्रि॑यम् 7

TB 2.6.2.3

वे॒देन॑ रू॒पे व्य॑करोत् । सु॒ता॒सु॒ती प्र॒जाप॑तिः । ऋ॒तेन॑ स॒त्यमिन्द्रि॑यम् ॥ सोमे॑न॒ सोमौ॑ व्य॑पिबत्
। सु॒ता॒सु॒तौ प्र॒जाप॑तिः । ऋ॒तेन॑ स॒त्यमिन्द्रि॑यम् । दृ॒ष्ट्वा रू॒पे व्या॑करोत् । स॒त्या॒नृ॒ते प्र॒जाप॑तिः ।

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 88

अश्रद्धा-मनृतेऽदधात् । श्रद्धाः सत्ये प्रजापतिः () । ऋतेन सत्यमिन्द्रियम् ॥ दृष्ट्वा परिस्सुतो रसम् । शुक्रेण शुक्रं व्यपिबत् । पयः सोमं प्रजापतिः । ऋतेन सत्यमिन्द्रियम् । विपानः शुक्रमन्धसः । इन्द्रस्येन्द्रियम् । इदं पयोऽमृतं मधु । 8

special korvai

(सोमो राजा विपानः सोममद्भ्योऽन्नाद् रेतो मूत्रं वेदेन सतासुती सोमेन सुतासुतौ दृष्ट्वा रूपे दृष्ट्वा परिस्सुतो रसं विपानं दश)

(अद्भ्यः क्षीरं व्यपिब - जन्मनर्तेन सत्यमिन्द्रियः - श्रद्धाः सत्ये प्रजापतिरष्टौ च) (A2)

2.6.3 अनुवाकं 3 - ग्रहहोमः

TB 2.6.3.1

सुरावन्तं बरहिषदः सुवीरम् । यज्ञः हिंन्वन्ति महिषा नमोभिः । दधानाः सोमं दिवि देवतासु । मदेमेन्द्रं यजमानाः स्वर्काः ॥ यस्ते रसः संभृत ओषधीषु । सोमस्य शुष्मः सुरया सुतस्य । तेन जिन्व यजमानं मदेन । सरस्वती-मश्विना-विन्द्र-मग्निम् ॥ यमश्विना नमुचेरासुरादधि । सरस्वत्यसनोदिन्द्रियाय 9

TB 2.6.3.2

इमं तः शुक्रं मधुमन्त-मिन्दुम् । सोमः राजानमिह भक्षयामि ॥ यदत्र रिप्तः रसिनः सुतस्य । यदिन्द्रो अपिबच्छचीभिः । अहं तदस्य मनसा शिवेन । सोमः राजानमिह भक्षयामि ॥ पितृभ्यः स्वधाविभ्यः स्वधा नमः । पितामहेभ्यः स्वधाविभ्यः स्वधा नमः । प्रपितामहेभ्यः स्वधाविभ्यः स्वधा नमः । अक्षन् पितरः 10

TB 2.6.3.3

अमीमदन्त पितरः । अतीतृपन्त पितरः । अमीमृजन्त पितरः । पितरः शुन्धद्धम् ॥ पुनन्तु मा

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 89

पितरः सोम्यासः । पुनन्तु मा पितामहाः । पुनन्तु प्रपितामहाः । पवित्रेण शतायुषा । पुनन्तु
मा पितामहाः । पुनन्तु प्रपितामहाः 11

TB 2.6.3.4

पवित्रेण शतायुषा ॥ विश्वमायुर्व्यश्रवै । "अग्र आयूषि पवसे 3" "ऽग्रे पवस्व4" । "पवमानः
सुवर्जनः5" "पुनन्तु मा देवजनाः6" । "जातवेदः पवित्रवद्7" "यत्ते पवित्रमर्चिषि8" । "उभाभ्यां
देव सवितर9" "वैश्वदेवी पुनती10" ॥ ये संमानाः समनसः । पितरो यमराज्ये । तेषां लोकः
स्वधा नमः । यज्ञो देवेषु कल्पताम् । 12

TB 2.6.3.5

ये संजाताः समनसः । जीवा जीवेषु मामकाः । तेषां श्रीर्मयि कल्पताम् । अस्मिन् लोके शतं
समाः ॥ द्वे सुती अशृणवं पितृणाम् । अहं देवानामुत मर्त्यानाम् । याभ्यामिदं विश्वमेजुथ-समेति
। यदन्तरा पितरं मातरं च ॥ इदं हविः प्रजननं मे अस्तु । दशवीरः सर्वगणः स्वस्तये ()
। आत्मसनिं प्रजासनिं । पशुसन्धयसनिं लोकसनिं । अग्निः प्रजां बहुलां मे करोतु । अन्नं
पयो रेतो अस्मासु धत्त । रायस्पोष-मिषमूर्जमस्मासु दीधत्-स्वाहा । 13

(इन्द्रियाय - पितरः - शतायुषा पुनन्तु मा पितामहाः पुनन्तु प्रपितामहाः-कल्पताः-स्वस्तये
पञ्च च) (A3)

2.6.4 अनुवाकं 4 - उपहोमाः

TB 2.6.4.1

सीसेन तन्त्रं मनसा मनीषिणः । ऊर्णासूत्रेण कवयो वयन्ति । अश्विना यज्ञः सविता सरस्वती
। इन्द्रस्य रूपं वरुणो मिषज्यन् ॥ तदस्य रूपममृतं शचीभिः । तिस्रो दधुर्देवताः सरराणाः
। लोमानि शष्पैर् बहुधा न तोक्मभिः । त्वगस्य मांसमभवन्न लाजाः ॥ तदश्विना मिषजां

रुद्रवर्तनी । सरस्वती वयति पेशो अन्तरः 14

TB 2.6.4.2

अस्थिं मज्जानं मासरैः । करोतुरेण दधतो गवां त्वचि ॥ सरस्वती मनसा पेशलं वसु ।
नासत्याभ्यां वयति दरशतं वपुः । रसं परिस्तुता न रोहितम् । नग्रहुर्द्वीरस्तसरं न वेमं ॥ पयसा
शुक्रमृतं जनित्रम् । सुरया मूत्राज्जनयन्ति रेतः । अपामंतिं दुर्मतिं बाधमानाः । ऊवद्वयं वातं
सुबुवं तदारात् । 15

TB 2.6.4.3

इन्द्रः सुत्रामा हृदयेन सत्यम् । पुरोडाशेन सविता जजान । यकृत् क्लोमानं वरुणो भिषज्यन् ।
मतस्त्रे वायव्यैर्न मिनाति पित्तम् ॥ आन्त्राणि स्थाली मधु पिन्वमाना । गुदा पात्राणि सुदुघा न
धेनुः । श्येनस्य पत्रं न प्लीहा शचीभिः । आसन्दी नाभिरुदरं न माता ॥ कुम्भो वनिष्ठुर्जनिता
शचीभिः । यस्मिन्नग्रे योन्यां गर्भो अन्तः 16

TB 2.6.4.4

प्लाशीर्व्यक्तः शतधार उथ्सः । दुहे न कुम्भीः स्वधां पितृभ्यः ॥ मुखं सदस्य शिर इथ्सदेन ।
जिह्वा पवित्रमश्विना सः सरस्वती । चप्पं न पायुर्भिषगस्य वालः । वस्तिर्न शेषो हरसा तरस्वी
॥ अश्विभ्यां चक्षुरमृतं ग्रहाभ्याम् । छागेन तेजो हविषा श्रुतेन । पक्ष्माणि गोधूमैः क्लैरुतानि
। पेशो न शुक्लमसितं वसाते । 17

TB 2.6.4.5

अविर्न मेषो नसि वीर्याय । प्राणस्य पन्थां अमृतो ग्रहाभ्याम् । सरस्वत्युपवाकैर्व्यानम् । नस्यानि
ब्रह्मिर् बदैरैर्-जजान ॥ इन्द्रस्य रूपमृषभो बलाय । कर्णाभ्यां श्रोत्रममृतं ग्रहाभ्याम् । यवा
न ब्रह्मिर् भुवि केसराणि । कर्कन्धुं जज्ञे मधु सारघं मुखात् ॥ आत्मन्नुपस्थे न वृकस्य लोमं ।

मुखे श्मश्रूणि न व्याघ्रलोमम् 18

TB 2.6.4.6

केशा न शीर॒षन् यश॑से श्रियै शिखा॑ । सि॒हस्य॑ लोम॒ त्विषि॑-रिन्द्रियाणि॑ ॥ अङ्गान्या॑त्मन्-भिषजा॑
तदु॒श्विना॑ । आ॒त्मान॑मङ्गैः सम॑धाथ॒ सर॑स्वती । इन्द्र॑स्य रूप॑श्च शत॑मान॒मायुः॑ । च॒न्द्रेण॑ ज्योति॑रमृतं
दधा॑ना ॥ सर॑स्वती॒ योन्यां॑ गर्भ॑मन्तः । अ॒श्विभ्यां॑ पत्नी॒ सुकृ॑तं बिभर्ति॑ । अ॒पाश्च॑ रसे॒न वरु॑णो
न साम्ना॑ । इन्द्र॑श्च श्रियै ज॒नय॑न्नप्सु राजा॑ () ॥ तेजः॑ पशूनाश्च॒ हवि॑रिन्द्रियाव॑त् । प॒रिस्रु॑ता
पय॑सा सार॒घं मधु॑ । अ॒श्विभ्यां॑ दुग्धं॒ भिषजा॑ सर॑स्वत्या सुतासुताभ्या॑म् । अ॒मृतः॑ सोम॒ इन्दुः॑ । 19

(अन्तर - आरा - दुन्तर - वंसाते - व्याघ्रलोमश्च - राजा चत्वारि च) (A4)

2.6.5 अनुवाकं 5 - अभिषेकः

TB 2.6.5.1

मि॒त्रोऽसि॑ वरु॑णोऽसि॑ । सम॑हं वि॒श्वैर्दे॒वैः ॥ क्ष॒त्रस्य॑ नाभि॑रसि॑ । क्ष॒त्रस्य॑ योनि॑रसि॑ ॥ स्यो॒नामासी॑द
। सुष॑दामासी॑द । मा त्वा॑ हि॒सीत् । मा मा॑ हि॒सीत् ॥ निष॑साद धृ॒तव्र॑तो वरु॑णः । प॒स्त्या॑स्वा
20

TB 2.6.5.2

साम्ना॑ज्याय सु॒क्रतुः॑ ॥ दे॒वस्य॑ त्वा सवि॑तुः प्र॑सवे । अ॒श्विनो॑र्बा॒हुभ्या॑म् । पू॒ष्णो हस्ता॑भ्याम् ।
अ॒श्विनो॑र्भैष॑ज्येन । तेज॑से ब्रह्मवर्च॑साया॒भिषि॑ञ्चामि ॥ दे॒वस्य॑ त्वा सवि॑तुः प्र॑सवे । अ॒श्विनो॑र्-
बा॒हुभ्या॑म् । पू॒ष्णो हस्ता॑भ्याम् । सर॑स्वत्यै भैष॑ज्येन 21

TB 2.6.5.3

वी॒र्या॑या॒न्नाद्या॑या॒भिषि॑ञ्चामि ॥ दे॒वस्य॑ त्वा सवि॑तुः प्र॑सवे । अ॒श्विनो॑र्बा॒हुभ्या॑म् । पू॒ष्णो हस्ता॑भ्याम्

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 92

। इन्द्र॑स्येन्द्रि॒येण॑ । श्रि॒यै यश॑से बला॒याभिषि॑ञ्चामि ॥ कोऽसि॑ कत॒मोऽसि॑ । कस्मै॑ त्वा काय॑
त्वा ॥ सु॒क्षोका॑(4) सुम॑ङ्गल॒ो(4) सत्य॑राजा(3)न् ॥ शिरो॑ मे श्रीः 22

TB 2.6.5.4

यशो॑ मुख॑म् । त्विषिः॑ केशा॑श्च श्मश्रू॑णि । राजा॑ मे प्रा॒णोऽमृत॑म् । स॒म्राट् चक्षुः॑ । वि॒राट्छ्रोत्र॑म्
। जि॒ह्वा मे भ॒द्रम् । वाङ्म॑हः । मनो॑ म॒न्युः । स्व॒राङ्गामः॑ । मोदाः॑ प्रमो॒दा अ॒ङ्गुली॒रङ्गानि॑ 23

TB 2.6.5.5

चित्तं॑ मे सहः॑ । बा॒हू मे बल॑मिन्द्रि॒यम् । हस्तौ॑ मे कर्म॑ वी॒र्यम् । आ॒त्मा क्षत्र॑मुरो॒ मम॑ । पृ॒ष्ठीमे॑
रा॒ष्ट्रमुद॑रम॒सौ । ग्री॒वाश्च श्रो॑ण्यौ । ऊ॒रू अ॑र॒त्नी जा॑नुनी । विशो॑ मेऽङ्गानि॑ स॒र्वतः॑ । नाभि॑मे
चित्तं॑ वि॒ज्ञान॑म् । पा॒युर्मेऽप॑चितिर्भ॒सत् 24

TB 2.6.5.6

आ॒न॒न्द॒न॒न्दावा॑ण्डौ मे॑ । भगुः॑ सौभा॑ग्यं प॒सः ॥ जङ्घा॑भ्यां प॒द्भ्यां धर्मो॑ऽस्मि । वि॒शि राजा॑ प्रति॑ष्ठितः
॥ प्रति॑ क्ष॒त्रे प्रति॑तिष्ठामि रा॒ष्ट्रे । प्रत्य॑श्वेषु॑ प्रति॑तिष्ठामि गोषु॑ । प्रत्य॑ङ्गेषु॑ प्रति॑तिष्ठाम्या॒त्मन् । प्रति॑
प्रा॒णेषु॑ प्रति॑तिष्ठामि पु॒ष्टे । प्रति॑ द्यावा॑पृथि॒व्योः । प्रति॑तिष्ठामि य॒ज्ञे । 25

TB 2.6.5.7

त्र॒या दे॒वा एका॑दश । त्र॒यस्त्रि॑ं॒शाः सुरा॑धंसः । बृह॒स्पति॑ पुरोहि॒ताः । दे॒वस्य॑ सवि॒तुः स॒वे ।
दे॒वा दे॒वैर॑वन्तु मा । प्र॒थ॒मा द्वि॒तीयैः॑ । द्वि॒तीया॑स्तृ॒तीयैः॑ । तृ॒तीयाः॑ स॒त्येन॑ । स॒त्यं य॒ज्ञेन॑ । य॒ज्ञो
यजु॑र्भिः 26

TB 2.6.5.8

यजू॑ंषि॒ साम॑भिः । सामा॑न्यृग्भिः । ऋ॒चो या॒ज्याभिः॑ । या॒ज्या व॑षट्कारैः । व॒षट्कारा॑ आहु॒तिभिः॑

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 93

। आहु॑तयो मे॒ कामा॑न्ध्र॒ सम॑र्द्धयन्तु ॥ भूः स्वाहा॑ ॥ लोमा॑नि॒ प्रय॑ति॒र्मम॑ । त्वङ्ग॑ आन॑ति॒रागा॑तिः ।
। मा॒सं म॒ उप॑नतिः () । व स्व॑स्थि॒ । म॒ज्जा म॒ आन॑तिः । 27

(प॒स्त्या॑स्वा - सर॑स्वत्यै भैष॑ज्येन॒ - श्री - रङ्गा॑नि - भ॒सद् - य॒ज्ञे - य॒ज्ञो य॒जुर्भि॑ - रु॒प॑नति॒र्द्वे च॑) (A5)

2.6.6 अनुवाकं 6 - अवभृथः

TB 2.6.6.1

यद्दे॑वा दे॒वहे॑डनम् । दे॒वांस॑श्च॒कृमा व॒यम् । अ॒ग्नि॒र्मा तस्मा॑दे॒नसः॑ । वि॒श्वान् मुञ्च॑त्व॒हंसः॑ ॥
यदि॑ दि॒वा यदि॑ नक्त॑म् । ए॒ना॒सि च॒कृमा व॒यम् । वा॒युर्मा तस्मा॑दे॒नसः॑ । वि॒श्वान् मुञ्च॑त्व॒हंसः॑
॥ यदि॑ जाग्र॒द्-यदि॑ स्वप्ने॑ । ए॒ना॒सि च॒कृमा व॒यम् 28

TB 2.6.6.2

सूर्यो॑ मा॒ तस्मा॑दे॒नसः॑ । वि॒श्वान् मुञ्च॑त्व॒हंसः॑ ॥ यद्वा॑मे॒ यद॑रण्ये । यथ॑ स॒भायां यदि॑न्द्रि॒ये ।
यच्छू॒द्रे यदु॑र्य॑ । ए॒नश्च॑कृ॒मा व॒यम् । यदे॒कस्या॑धि॒ धर्म॑णि । तस्या॑व॒यज॑नमसि ॥ यदा॑पो अ॒घ्निया॑
वरु॑णेति॒ शपा॑महे । ततो॑ वरु॒ण नो मुञ्च॑ । 29

TB 2.6.6.3

अव॑भृथ निच॑ङ्कुण निच॑रुरा॒सि निच॑ङ्कुण । अव॑ दे॒वैर्-दे॒वकृ॑त॒मेनो॑ऽयाट् । अव॑ म॒र्त्यैर्म॒र्त्यकृ॑तम् ।
उ॒रोरा नो॑ दे॒व रि॑ष॒स्पाहि॑ ॥ सु॒मित्रा न॒ आप॑ ओष॑धयः सन्तु । दु॒र्मित्रा॑स्तस्मै॑ भुयासुः । यो॑ऽस्मान्
द्वेष्टि॑ । यं च॑ व॒यं द्वि॑ष्मः ॥ द्रु॒पदा॑दि॒वेन्-मु॑मुचा॒नः । स्वि॒न्नः स्ना॒त्वी मला॑दिव 30

TB 2.6.6.4

पू॒तं प॒वित्रे॑णे॒वाज्य॑म् । आपः॑ शु॒न्धन्तु॑ मै॒नसः॑ ॥ उ॒द्वयं तम॑स॒स्परि॑ । पश्य॑न्तो॒ ज्योति॑रु॒त्तर॑म् ।
दे॒वं दे॒वत्रा॑ सूर्य॑म् । अ॒गन्म॒ ज्योति॑रु॒त्तम॑म् ॥ प्र॒तियु॑तो॒ वरु॑णस्य॒ पाशः॑ । प्र॒त्यस्तो॒ वरु॑णस्य॒

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 94

पाशः ॥ एधोऽस्येधिषीमहि । समिदंसि 31

TB 2.6.6.5

तेजोऽसि तेजो मयि धेहि ॥ अपो अन्वचारिषम् । रसेन समंसृक्षमहि । पयस्वाऽ अग्न आऽगमम् । तं मा सऽसृज वर्चसा । प्रजया च धनेन च ॥ समाववर्ति पृथिवी । समुषाः । समु सूर्यः । समु विश्वमिदं जगत् () । वैश्वानर ज्योतिर्भूयासम् । विभुं कामं व्यश्नवै ॥ भूः स्वाहा । 32

(स्वप्न एनासि चकृमा वयं - मुञ्च - मलादिव - समिदंसि - जगत् त्रीणि च) (A6)

2.6.7 अनुवाकं 7 - ऐन्द्रे प्रश्नौ प्रयाजानामेकादश मैत्रावरुणप्रैषाः

TB 2.6.7.1

होता यक्षथ-समिधेन्द्र-मिडस्पदे । नाभा पृथिव्या अधि । दिवो वर्षन्थ समिद्वयते । ओजिष्ठश्चरुषणीसहान् । वेत्वाज्यस्य होतर्यज ॥ होता यक्षत्तनूनपातम् । ऊतिभिर्जेतार-मपराजितम् । इन्द्र देवऽ सुवर्दिदम् । पृथिभिर् मधुमत्तमैः । नराशऽसेन तेजसा 33

TB 2.6.7.2

वेत्वाज्यस्य होतर्यज ॥ होता यक्षदिडाभि-रिन्द्र-मीडितम् । आजुह्वान-ममर्त्यम् । देवो देवैः सवीर्यः । वज्रहस्तः पुरंदुरः । वेत्वाज्यस्य होतर्यज ॥ होता यक्षद्-ब्र-हिषीन्द्र निषद्वरम् । वृषभं नर्यापसम् । वसुभी रुद्रैरादित्यैः । स्युग्भिर्-ब्र-हिरा ऽसदत् 34

TB 2.6.7.3

वेत्वाज्यस्य होतर्यज ॥ होता यक्षदोजो न वीर्यम् । सहो द्वार इन्द्रमवर्द्धयन् । सुप्रायणा विश्रयन्तामृतावृधः । द्वार इन्द्राय मीदुषे । वियन्त्वाज्यस्य होतर्यज ॥ होता यक्षदुषे इन्द्रस्य धेनू । सुदुषे मातरौ मही । सवातरौ न तेजसी । वृथ्समिन्द्र-मवर्द्धताम् 35

TB 2.6.7.4

वी॒ता॒मा॒ज्य॑स्य॒ हो॒त॒र्य॑जं ॥ हो॒ता॑ यक्ष॒द् दै॒व्या॒ हो॒ता॑रा । भि॒ष॒जा॒ स॒खा॑या । ह॒वि॒षे॑न्द्रं॒ भि॒ष॒ज्य॑तः ।
क॒वी॒ दे॒वौ प्र॑चे॒त॒सौ । इन्द्रा॑य॒ धत्त॑ इन्द्रि॒यम् । वी॒ता॒मा॒ज्य॑स्य॒ हो॒त॒र्य॑जं ॥ हो॒ता॑ यक्ष॒त्ति॒स्रो दे॒वीः
। त्रय॑स्त्रि॒धा॒त॒वोऽप॑सः । इ॒डा॒ सर॑स्वती॒ भार॑ती 36

TB 2.6.7.5

म॒हीन्द्र॑प॒त्नी॒र॒-ह॒वि॒ष्म॑न्तीः । वि॒य॒न्त्वा॒ज्य॑स्य॒ हो॒त॒र्य॑जं ॥ हो॒ता॑ यक्ष॒त्त्व॒ष्टा॒र॒-मिन्द्रं॑ दे॒वम् । भि॒ष॒ज॑श्
सु॒य॒जं घृ॒त॒श्चि॒यम् । पु॒रु॒रूप॑श् सु॒रे॒त॑सं म॒घो॒नि॑म् । इन्द्रा॑य॒ त्व॒ष्टा॒ द॒ध॒दिन्द्रि॑याणि । वे॒त्वा॒ज्य॑स्य॒
हो॒त॒र्य॑जं ॥ हो॒ता॑ यक्ष॒द्-व॒न॒स्प॑तिम् । श॒मि॒ता॒र॑श् श॒त॒क्र॑तुम् । धि॒यो जो॒ष्टा॒र॒-मिन्द्रि॑यम् 37

TB 2.6.7.6.

म॒द्धा॑ स॒म॒ञ्ज॑न्प॒थि॒भिः सु॒गे॒भिः । स्व॒दा॑ति ह॒व्यं म॒धु॒ना घृ॑तेन । वे॒त्वा॒ज्य॑स्य॒ हो॒त॒र्य॑जं ॥ हो॒ता॑
यक्ष॒दिन्द्र॑श् स्वा॒हाऽऽज्य॑स्य । स्वा॒हा मे॒द॑सः । स्वा॒हा स्तो॒का॒ना॑म् । स्वा॒हा स्वा॒हा॑कृ॒ती॒ना॑म् ।
स्वा॒हा ह॒व्य॑सू॒क्ती॒ना॑म् । स्वा॒हा दे॒वा॑श् औ॒ज्य॑पान् । स्वा॒हेन्द्र॑श् हो॒त्राज्जु॑षा॒णाः () । इन्द्र॑ आ॒ज्य॑स्य
वि॒य॒न्तु । हो॒त॒र्य॑जं । 38

special korvai

(स॒मि॒धेन्द्रं॑ त॒नून॑पा॒त॒मि॒डा॑भिर् ब॒रु॒हि॒ष्यो॒जं उ॒षे दै॒व्या॑ तिस्र॑स्त्व॒ष्टा॒रं व॒न॒स्प॑ति॒मिन्द्रं॑म् । स॒मि॒धेन्द्रं॑
च॒तुर्वे॑त्वे॒को वि॒य॒न्तु द्वि॒र्वी॒ता॒मे॒को वि॒य॒न्तु द्वि॒र्वे॑त्वे॒को वि॒य॒न्तु हो॒त॒र्य॑जं)
(ते॒ज॑सा-ऽस॒द॒द॒वर्द्ध॑तां-भा॒रती॑-न्द्रि॒यं-जु॑षा॒णा द्वे च॑) (A7)

2.6.8 अनुवाकं 8 - ऐन्द्रे प्रश्नौ प्रयाजयाज्याः

TB 2.6.8.1

समिद्धं इन्द्रं उषसामनीके । पुरोरुचां पूर्वकृद्वावृधानः । त्रिभिर्देवैस्त्रिंशता वज्रबाहुः । जघान वृत्रं
वि दुरो ववार ॥ नराशंसः प्रति शूरो मिमानः । तनूनपात्-प्रति यज्ञस्य धाम । गोभिर्-वृषावान्-
मधुना समञ्जन् । हिरण्यैश्चन्द्री यजति प्रचेताः ॥ ईडितो देवैर्हरिवाः अभिष्टिः । आजुह्वानो
हविषा शर्द्धमानः 39

TB 2.6.8.2

पुरदुरो मघवान् वज्रबाहुः । आयातु यज्ञमुप नो जुषाणः ॥ जुषाणो ब्रह्महिरिवात्र इन्द्रः ।
प्राचीनः सीदत्प्रदिशां पृथिव्याः । उरुव्यचाः प्रथमानः स्योनम् । आदित्यैरुक्तं वसुभिः सजोषाः
॥ इन्द्रं दुरः कव्यो धावमानाः । वृषाणं यन्तु जनयः सुपत्नीः । द्वारो देवीरभितो विश्रयन्ताम्
। सुवीरा वीरं प्रथमाना महोभिः । 40

TB 2.6.8.3

उषासा नक्ता बृहती बृहन्तम् । पयस्वती सुदुघे शूरमिन्द्रम् । पेशस्वती तन्तुना सम्व्ययन्ती ।
देवानां देवं यजतः सुरुक्मे ॥ दैव्या मिमाना मनसा पुरुत्रा । होताराविन्द्रं प्रथमा सुवाचा ।
मूर्धन् यज्ञस्य मधुना दधाना । प्राचीनं ज्योतिरहविषा वृधातः ॥ तिस्रो देवीरहविषा वर्द्धमानाः
। इन्द्रं जुषाणा वृषणं न पत्नीः 41

TB 2.6.8.4

अच्छिन्नं तन्तुं पयसा सरस्वती । इडां देवी भारती विश्वतूर्तिः ॥ त्वष्टा दधदिन्द्राय शुष्मम् ।
अपाकोऽचिष्टुर्यशसे पुरूणि । वृषा यजन् वृषणं भूरिरेताः । मूर्धन् यज्ञस्य समनक्तु देवान् ॥
वनस्पति-रवसृष्टो न पाशैः । तमन्या समञ्जच्छमिता न देवः । इन्द्रस्य हव्यैर्जठरं पृणानः ।
स्वदाति हव्यं मधुना घृतेन () ॥ स्तोकाणामिन्दुं प्रति शूर इन्द्रः । वृषायमाणो वृषभ-स्तुराषाद्
। घृतप्रुषा मधुना हव्यमुन्दन् । मूर्धन् यज्ञस्य जुषताः स्वाहा । 42

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 97

(शर्द्धमानो - महोभिः - पत्नीर् - घृतेन चत्वारि च) (A8)

2.6.9 अनुवाकं 9 - ऐन्द्रे प्रश्नौ वपादीनां याज्यानुवाक्याः

TB 2.6.9.1

"आचरू षणिप्रा11", "विवेषु यन्मा12" ॥ "तश् सुद्वीचीः13" ॥ सत्यमित्तन्न त्वावाश् अन्यो अस्ति । इन्द्रं देवो न मर्त्यो ज्यायान् । अहन्नहिं परिशयानमर्णः । अवांसृजोऽपो अच्छा समुद्रम् ॥ प्रसंसाहिषे पुरुहूत शत्रून् । ज्येष्ठस्ते शुष्मं इह रातिरस्तु । इन्द्राभरु दक्षिणेना वसूनि । पतिः सिन्धूनामसि रेवतीनाम् () ॥ स शेवृधमधिधा द्युम्नमस्मे । महिं क्षत्रं जनाषाडिन्द्र तव्यम् । रक्षां च नो मघोनः पाहि सूरीन् । राये च नः स्वपत्या इषे धाः । 43

(रेवतीनां चत्वारि च) (A9)

2.6.10 अनुवाकं 10 - ऐन्द्रे प्रश्नौ अनुयाजानामेकादश मैत्रावरुणप्रैषाः

TB 2.6.10.1

देवं बरुहिरिन्द्रश् सुदेवं देवैः । वीरवथ-स्तीर्णं वेद्यामवर्द्धयत् । वस्तोर्वृतं प्राक्तोर्भृतम् । राया बरुहिष्मतोऽत्यगात् । वसुवने वसुधेयस्य वेतु यजं ॥ देवीद्वार इन्द्रश् संघाते । विद्वीर्यामन्नवर्द्धयन्न । आ वथ्सेन तरुणेन कुमारेण च मीविता अपार्वणम् । रेणुककाटं नुदन्ताम् । वसुवने वसुधेयस्य वियन्तु यजं । 44

TB 2.6.10.2

देवी उषासा नक्ता । इन्द्रं यज्ञे प्रयत्यहेताम् । दैवीर्विशः प्रायांसिष्टाम् । सुप्रीते सुधिते अभूताम् । वसुवने वसुधेयस्य वीतां यजं ॥ देवी जोष्ट्री वसुधिति । देवमिन्द्रमवर्द्धताम् । अयाव्यन्याऽघा द्वेषांसि । आऽन्या वाक्षीद् वसु वार्याणि । यजमानाय शिक्षिते 45

TB 2.6.10.3

वसुवने वसुधेयस्य वीतां यजं ॥ देवी ऊर्जाहुती दुधे सुदुधे । पयसेन्द्रमवर्द्धताम् । इषमूर्जमन्या
ऽवाक्षीत् । सग्धिः सपीतिमन्या । नवेन पूर्वं दयमाने । पुराणेन नवम् । अधाता-मूर्जमूर्जाहुती वसु
वार्याणि । यजमानाय शिक्षिते । वसुवने वसुधेयस्य वीतां यजं ॥ 46(10)ट.भ.2.6.10.4 देवा
दैव्या होतांरा । देवमिन्द्रमवर्द्धताम् । हुताघशः सावाभाष्टा वसु वार्याणि । यजमानाय शिक्षितौ ।
वसुवने वसुधेयस्य वीतां यजं ॥ देवीस्तिस्त्रस्त्रो देवीः । पतिमिन्द्रमवर्द्धयन् । अस्पृक्षद्भारती
दिवम् । रुद्रैर्यज्ञः सरस्वती । इडा वसुमती गृहान् 47

TB

0

TB 2.6.10.5

वसुवने वसुधेयस्य वियन्तु यजं ॥ देव इन्द्रो नराशंसः । त्रिवरूथ-स्त्रिवन्धुरः । देवमिन्द्रमवर्द्धयत्
। शतेन शितिपृष्ठानामाहितः । सहस्रेण प्रवर्तते । मित्रावरुणेदस्य होत्रमरुहतः । बृहस्पतिः
स्तोत्रम् । अश्विनाऽऽर्द्धयवम् । वसुवने वसुधेयस्य वेतु यजं । 48

TB 2.6.10.6

देव इन्द्रो वनस्पतिः । हिरण्यपर्णो मधुशाखः सुपिप्पलः । देवमिन्द्रमवर्द्धयत् । दिवमग्रेणाप्रात्
। आऽन्तरिक्षं पृथिवीमदृशीत् । वसुवने वसुधेयस्य वेतु यजं ॥ देवं ब्रुहिर्वारितीनाम् ।
देवमिन्द्रमवर्द्धयत् । स्वासुस्थ-मिन्द्रेणासन्नम् । अन्या ब्रुहीष्यभ्यभूत् () । वसुवने वसुधेयस्य
वेतु यजं ॥ देवो अग्निः स्विष्टकृत् । देवमिन्द्रमवर्द्धयत् । स्विष्टं कुर्वन्थ स्विष्टकृत् । स्विष्टमद्य
करोतु नः । वसुवने वसुधेयस्य वेतु यजे । 49

special korvai

दे॒वं ब॒रु॒हिर् दे॒वीर्द्वा॒रो दे॒वी उ॒षा॒सा न॒क्ता दे॒वी जो॒ष्ट्री दे॒वी ऊ॒र्जाहु॑ती दे॒वा दै॒व्या हो॒ता॒रा शि॒क्षितौ॑
दे॒वीस्ति॒स्रस्ति॒स्रो दे॒वीः प॒तिं दे॒व इन्द्रो॑ न॒राश॑सो दे॒व इन्द्रो॑ व॒नस्प॑तिर् दे॒वं ब॒रु॒हिर्वारि॑तीनां
दे॒वो अ॒ग्निः स्वि॑ष्ट॒कृद् दे॒वम् । वे॒तु वि॒यन्तु॑ च॒तुर्वी॑ता॒मेको॑ वि॒यन्तु॑ च॒तुर्वे॑तु । अ॒वर्द्ध॑य॒दवर्द्ध॑यन्
त्रि॒रव॑र्द्धता॒मेको॑ ऽवर्द्ध॑यः श्रु॒तुर॑वर्द्ध॑यत् । व॒स्तो॒रा व॒थ्सेन॑ दै॒वीर॑या॒वीषः॑ ह॒तास्पृ॑क्षच्छ॒तेन॑ दि॒वमिन्द्रः॑
स्वा॒स॒स्थः स्वि॑ष्टम् । शि॒क्षिते॑ शि॒क्षिते॑ शि॒क्षितौ॑ ।

(वि॒यन्तु॑ यजं - शि॒क्षिते॑ - शि॒क्षिते॑ वसु॒वने॑ वसु॒धेय॑स्य वी॒तां यज॑-गृ॒हान्-वे॒तु यजा॑-भू॒ध ष॒ट्) (A10)

2.6.11 अनुवाकं 11 - पशुत्रये प्रय जार्था मैत्रावरुणप्रैषाः

TB 2.6.11.1

हो॒ता यक्ष॑थ॒-स॒मिधा॑ऽग्नि॒मि॒डस्प॑दे । अ॒श्विनेन्द्रः॑ स॒रस्व॑तीम् । अ॒जो धूम्रो॑ न गो॒धूमैः॑ क्लै॒र्भेष॑जम्
। मधु॑ श॒ष्पैर्न॑ तेजं इन्द्रि॒यम् । प॒यः सोमः॑ प॒रि॒स्रुता॑ घृ॒तं मधु॑ । वि॒यन्त्वाज्य॑स्य हो॒त॒र्यजं॑ ॥ हो॒ता
यक्ष॑त्त॒नून॑पा॒थ स॒रस्व॑ती । अ॒वि॒र्मे॒षो न भेष॑जम् । प॒था मधु॑म॒ता ऽऽभ॑रन् । अ॒श्विनेन्द्रा॑य वी॒र्यम्॑ 50

TB 2.6.11.2

ब॒दरै॑रु॒प॒वाका॑भिर् भेष॒जं तो॒क्मभिः॑ । प॒यः सोमः॑ प॒रि॒स्रुता॑ घृ॒तं मधु॑ । वि॒यन्त्वाज्य॑स्य हो॒त॒र्यजं॑
॥ हो॒ता यक्ष॑न्न॒राश॑स॒नं न॒ग्रहु॑म् । प॒तिः सु॒रायै॑ भेष॒जम् । मे॒षः स॒रस्व॑ती भि॒षक् । र॒थो न
च॒न्द्र॒ग्रश्वि॑नो॒र्वपा॑ इन्द्र॒स्य वी॒र्यम्॑ । ब॒दरै॑रु॒प॒वाका॑भिर् भेष॒जं तो॒क्मभिः॑ । प॒यः सोमः॑ प॒रि॒स्रुता॑ घृ॒तं मधु॑
। वि॒यन्त्वाज्य॑स्य हो॒त॒र्यजं॑ । 51

TB 2.6.11.3

हो॒ता यक्ष॑दि॒डोडि॑त आ॒जु॒ह्वानः॑ स॒रस्व॑तीम् । इन्द्रं॑ ब॒लेन॑ व॒र्द्धय॑न् । ऋ॒षभे॑ण ग॒वैन्द्रि॑यम् ।
अ॒श्विनेन्द्रा॑य वी॒र्यम्॑ । य॒वैः क॑र्क॒न्धुभिः॑ । मधु॑ ला॒जैर्न॑ मा॒सर॑म् । प॒यः सोमः॑ प॒रि॒स्रुता॑ घृ॒तं मधु॑
। वि॒यन्त्वाज्य॑स्य हो॒त॒र्यजं॑ ॥ हो॒ता यक्ष॑द्-ब॒रु॒हिः सु॒ष्टरी॑मोऽर्ण॒म्रदाः॑ । भि॒षङ्गा॑स॒त्या 52

TB 2.6.11.4

भिषजाऽश्विनाऽश्वा शिशुमती । भिषग्धेनुः सरस्वती । भिषग्दुह इन्द्राय भेषजम् । पयः सोमः
परिस्रुता घृतं मधु । वियन्त्वाज्यस्य होतर्यजं ॥ होता यक्षदुरो दिशः । कवष्यो न व्यचस्वतीः
। अश्विभ्यां न दुरो दिशः । इन्द्रो न रोदसी दुधे । दुहे कामान्थ सरस्वती 53

TB 2.6.11.5

अश्विनेन्द्राय भेषजम् । शुक्रं न ज्योतिरिन्द्रियम् । पयः सोमः परिस्रुता घृतं मधु । वियन्त्वाज्यस्य
होतर्यजं ॥ होता यक्षथ सुपेशसोषे नक्तं दिवा । अश्विना संजानाने । समञ्जाते सरस्वत्या ।
त्विषिमिन्द्रे न भेषजम् । श्येनो न रजसा हृदा । पयः सोमः परिस्रुता घृतं मधु 54

TB 2.6.11.6.

वियन्त्वाज्यस्य होतर्यजं ॥ होता यक्षद्वैव्या होतारा भिषजाऽश्विना । इन्द्रं न जागृवी दिवा नक्तं
न भेषजैः । शूषः सरस्वती भिषक् । सीसेन दुह इन्द्रियम् । पयः सोमः परिस्रुता घृतं मधु ।
वियन्त्वाज्यस्य होतर्यजं ॥ होता यक्षत् तिस्रो देवीर्न भेषजम् । त्रयस्त्रिधातवोऽपसः । रूपमिन्द्रे
हिरण्यम् 55

TB 2.6.11.7

अश्विनेडा न भारती । वाचा सरस्वती । मह इन्द्राय दधुरिन्द्रियम् । पयः सोमः परिस्रुता घृतं
मधु । वियन्त्वाज्यस्य होतर्यजं ॥ होता यक्षत्त्वष्टार-मिन्द्रमश्विना । भिषजं न सरस्वतीम् । ओजो
न जूतिरिन्द्रियम् । वृको न रभसो भिषक् । यशः सुरया भेषजम् 56

TB 2.6.11.8

श्रिया न मासरम् । पयः सोमः परिस्रुता घृतं मधु । वियन्त्वाज्यस्य होतर्यजं ॥ होता यक्षद्-
वनस्पतिम् । शमितारः शतक्रतुम् । भीमं न मन्युः राजानं व्याघ्रं नमसाऽश्विना भामं । सरस्वती

भिषक् । इन्द्राय दुह इन्द्रियम् । पयः सोमः परिस्रुता घृतं मधु । वियन्त्वाज्यस्य होतर्यजं । 57

TB 2.6.11.9

होता यक्षदग्निः स्वाहाऽऽज्यस्य स्तोकानाम् । स्वाहा मेदसां पृथक् । स्वाहा छागमश्विभ्याम् । स्वाहा मेषः सरस्वत्यै । स्वाहार्षभमिन्द्राय सिन्धाय सहसेन्द्रियम् । स्वाहाऽग्निं न भेषजम् । स्वाहा सोममिन्द्रियम् । स्वाहेन्द्रः सुत्रामाणः सवितारुवरुणं भिषजां पतिम् । स्वाहा वनस्पतिं प्रियं पाथो न भेषजम् । स्वाहा देवाः औज्यपान् 58

TB 2.6.11.10

स्वाहाऽग्निः होत्राज्जुषाणो अग्निर् भेषजम् । पयः सोमः परिस्रुता घृतं मधु । वियन्त्वाज्यस्य होतर्यजं ॥ होता यक्षदश्विना सरस्वतीमिन्द्रः सुत्रामाणम् । इमे सोमाः सुरामाणः । छागैर्न मेषैर्ऋषभैः सुताः । शष्पैर्न तोक्मभिः । लाजैर्महस्वन्तः । मदा मासरेण परिष्कृताः । शुक्राः पयस्वन्तोऽमृताः () । प्रस्थिता वो मधुश्चुतः । तानश्विना सरस्वतीन्द्रः सुत्रामां वृत्रहा । जुषन्ताः सौम्यं मधु । पिबन्तु मदन्तु वियन्तु सोमम् । होतर्यजं । 59

special korvai

समिधाऽग्निः षट् । तनूनपाथ सप्त । नराशः समृषिः । इडेडितो यवैरष्टौ । ब्रूहिः सप्त । दुरोऽश्विनां शुक्रन्नवं । सुपेशसोषे नक्तमृषिः । दैव्या होतारा सीसेन रसः । तिस्रस्त्वष्टारमष्टावष्टौ । वनस्पतिमृषिः । अग्निं त्रयोदश । अश्विना द्वादश त्रयोदश । समिधाऽग्निं बदरैर् बदरैर् यवैरश्विना त्विषिमश्विना न भेषजः रूपमश्विना भीमं भामम् ।

(वीर्यं - वियन्त्वाज्यस्य होतर्यजं - नासत्या - सरस्वती - मधु - हिरण्यं - भेषजं - वियन्त्वाज्यस्य होतर्यजा - ज्यपा - नमृताः पञ्च च) (A11)

2.6.12 अनुवाकं 12 - पशुत्रये प्रयाजयाज्या आप्रियः

TB 2.6.12.1

समिद्धो अ॒ग्निर॑श्विना । त॒प्तो घ॒र्मो वि॒राट् सु॒तः । दु॒हे धे॒नुः सर॑स्वती । सोम॑ः शु॒क्रमि॒हेन्द्रि॒यम् ॥
त॒नूपा भि॒षजा॑ सु॒ते । अ॒श्विनो॒भा सर॑स्वती । म॒द्धा रजा॑ःसीन्द्रि॒यम् । इन्द्रा॑य प॒थिभिर् व॒हान् ॥
इन्द्रा॑येन्दुः सर॑स्वती । नरा॑शःसेन न॒ग्रहुः ६०

TB 2.6.12.2

अ॒धाता॑म॒श्विना॒ मधु॑ । भे॒षजं॑ भि॒षजा॑ सु॒ते ॥ अ॒जुह्वा॑ना सर॑स्वती । इन्द्रा॑येन्द्रि॒याणि॑ वी॒र्यम् ।
इडा॑भिर॒श्विना॒विष॑म् । समूर्जः॑ सः र॒यिं द॑धुः ॥ अ॒श्विना॒ नमु॑चेः सु॒तम् । सोम॑ः शु॒क्रं प॑रि॒स्रुता॑
। सर॑स्वती॒ तमा॑भरत् । ब॒रुहि॑षेन्द्रा॒य पा॑त॒वे । ६१

TB 2.6.12.3

क॒व॒च्यो न॑ व्यच॑स्वतीः । अ॒श्विभ्या॑ न दुरो दि॒शः । इन्द्रो॑ न रोद॑सी दु॒घै । दु॒हे का॒मान्ध॒-सर॑स्वती
॥ उ॒षासा॑ नक्त॑म॒श्विना । दि॒वेन्द्रः॑ सा॒यमिन्द्रि॒यैः । स॒जा॒ना॒ने सु॒पेश॑सा । सम॑जा॒ते सर॑स्वत्या
॥ पा॒तं नो॑ अ॒श्विना॒ दिवा॑ । पा॒हि नक्तः॑ सर॑स्वति ६२

TB 2.6.12.4

दै॒व्यां हो॒तारा॑ भि॒षजा॑ । पा॒तमिन्द्रः॑ सचा॑ सु॒ते ॥ ति॒स्रस्त्रे॒धा सर॑स्वती । अ॒श्विना॒ भा॒रती॑डा॑ ।
ती॒व्रं प॑रि॒स्रुता॑ सोम॑म् । इन्द्रा॑य सु॒षव॑र्मद॑म् ॥ अ॒श्विना॒ भे॒षजं॑ मधु॑ । भे॒षजं॑ नः सर॑स्वती । इन्द्रे
त्वष्टा॑ यशः॑ श्रिय॑म् । रू॒पः रू॒पमधुः॑ सु॒ते () ॥ ऋ॒तुथेन्द्रो॑ वन॑स्पतिः । श॒शमा॑नः प॑रि॒स्रुता॑
। की॒लाल॑म॒श्विभ्या॑ मधु॑ । दु॒हे धे॒नुः सर॑स्वती ॥ गो॒भिर्न॑ सोम॑म॒श्विना । मा॒सरे॑ण प॑रि॒ष्कृता॑ ।
सम॑धा॒ताः सर॑स्वत्या । स्वा॒हेन्द्रे॑ सु॒तं मधु॑ । ६३

(न॒ग्रहुः - पा॑त॒वे - सर॑स्व - त्यधुः सु॒तेऽष्टौ च॑) (A12)

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 103

2.6.13 अनुवाकं 13 - पशुत्रये वपादीनां याज्यानुवाक्याः

TB 2.6.13.1

अ॒श्विना॑ ह॒विर्नि॑न्द्रियम् । नमु॑चेर्द्वि॒या सर॑स्वती । आ शु॒क्रमा॑सुराद्वसु । म॒घमिन्द्रा॑य ज॒भिरे ॥
यम॑श्विना॒ सर॑स्वती । ह॒विषेन्द्र॑-मवर्द्धयन् । स बि॑भेद ब॒लं (व॒लं) म॒घम् । नमु॑चावासुरे सचा॑ ।
तमिन्द्रं॑ प॒शवः॑ सचा॑ ॥ अ॒श्विनो॒भा सर॑स्वती 64

TB 2.6.13.2

दधा॑ना अ॒भ्यनू॑षत । ह॒विषा॑ य॒ज्ञिनि॑न्द्रियम् ॥ य इन्द्रं॑ इन्द्रियं दधुः । स॒विता॑ वरु॒णो भ॑गः । स
सु॒त्रामा॑ ह॒विष्प॑तिः । यज॑मानाय सश्वत ॥ स॒विता॑ वरु॒णो दध॑त् । यज॑मानाय दा॒शुषे॑ । आद॑त्त
नमु॑चेर्वसु॑ । सु॒त्रामा॑ बल॑मिन्द्रियम् । 65

TB 2.6.13.3

वरु॑णः क्ष॒त्रमि॑न्द्रियम् । भ॒गेन॑ स॒विता॑ श्रिय॑म् । सु॒त्रामा॑ यश॑सा॒ बल॑म् । दधा॑ना य॒ज्ञमा॑शत ॥
अ॒श्विना॑ गोभि॑रिन्द्रियम् । अ॒श्वेभिर्॑ वी॒र्यं॑ बल॑म् । ह॒विषेन्द्र॑ सर॑स्वती । यज॑मान-मवर्द्धयन् ॥
ता नास॑त्या सुपे॒शासा॑ । हि॒रण्यव॑र्तनी॒ नरा॑ () । सर॑स्वती ह॒विष्म॑ती । इन्द्र॑ कर्म॑सु नोऽवत
॥ ता भि॑षजा॑ सुकर्म॑णा । सा सु॒दुघा॑ सर॑स्वती । स वृ॒त्रहा॑ शत॑क्रतुः । इन्द्रा॑य दधुरिन्द्रियम् । 66

(उ॒भा सर॑स्वती - बल॑मिन्द्रियं - नरा॑ षट्) (A13)

2.6.14 अनुवाकं 14 - पशुत्रये अनूयाजप्रेषाः

TB 2.6.14.1

दे॒वं ब॒रु॒हिः सर॑स्वती । सु॒देवमिन्द्रे॑ अ॒श्विना॑ । तेजो॑ न चक्षु॑रक्ष्योः । ब॒रु॒हिषा॑ दधुरिन्द्रियम् ।
व॒सुवने॑ वसु॒धेय॑स्य वियन्तु॒ यज॑ ॥ दे॒वीर्द्वारो॑ अ॒श्विना॑ । भि॒षजेन्द्रे॑ सर॑स्वती । प्रा॒णं न वी॒र्यं॑ न॒सि
। द्वा॒रो दधुरिन्द्रियम् । व॒सुवने॑ वसु॒धेय॑स्य वियन्तु॒ यज॑ । 67

TB 2.6.14.2

देवी उ॒षासा॑व॒श्विना॑ । भि॒षजे॑न्द्रे सर॑स्वती । ब॒लं न वाच॑मा॒स्ये । उ॒षाभ्यां॑ दधुरिन्द्रि॒यम् । व॒सुवने॑
वसु॒धेय॑स्य वियन्तु यज॑ ॥ देवी जो॒ष्ट्री अ॒श्विना॑ । सु॒त्रामे॑न्द्रे सर॑स्वती । श्रो॒त्रं न क॑र्णयो॒र्यशः॑ ।
जो॒ष्ट्रीभ्यां॑ दधुरिन्द्रि॒यम् । व॒सुवने॑ वसु॒धेय॑स्य वियन्तु यज॑ । 68

TB 2.6.14.3

देवी ऊ॒र्जाहु॑ती दु॒धे सु॒दुधे॑ । प॒यसे॑न्द्रः सर॑स्वत्य॒श्विना॑ भि॒षजा॑ऽवत । शु॒क्रं न ज्योतिः॑ स्तन॑यो॒राहु॑ती
धत्त इन्द्रि॒यम् । व॒सुवने॑ वसु॒धेय॑स्य वियन्तु यज॑ ॥ दे॒वा दे॒वानां॑ भि॒षजा॑ । हो॒ता रा॒विन्द्र॑-म॒श्विना॑
। व॒षट्कारैः॑ सर॑स्वती । त्वि॒षिं न हृद॑ये म॒तिम् । हो॒तृभ्यां॑ दधुरिन्द्रि॒यम् । व॒सुवने॑ वसु॒धेय॑स्य
वियन्तु यज॑ । 69

TB 2.6.14.4

दे॒वी-स्ति॒स्र-स्ति॒स्रो दे॒वीः । सर॑स्वत्य॒श्विना॑ भा॒रती॑डा । शू॒षं न म॑द्धये नाभ्या॑म् । इन्द्रा॑य
दधुरिन्द्रि॒यम् । व॒सुवने॑ वसु॒धेय॑स्य वियन्तु यज॑ ॥ दे॒व इन्द्रो॑ नरा॒शंसः॑ । त्रि॒व॒रूथः॑ सर॑स्वत्या
ऽश्वि॒भ्यामी॑यते रथः । रे॒तो न रू॒पम॑मृ॒तं ज॒नित्र॑म् । इन्द्रा॑य त्वष्टा दध॑दिन्द्रि॒याणि॑ । व॒सुवने॑
वसु॒धेय॑स्य वियन्तु यज॑ । 70

TB 2.6.14.5

दे॒व इन्द्रो॑ वन॒स्पतिः॑ । हि॒र॒ण्य॒प॒र्णो अ॒श्विभ्या॑म् । सर॑स्वत्याः सु॒पिप्प॒लः । इन्द्रा॑य पच्यते मधु॑
। ओ॒जो न जू॒तिमृ॑ष॒भो न भा॑मम् । वन॒स्पति॑र्नो दध॑दिन्द्रि॒याणि॑ । व॒सुवने॑ वसु॒धेय॑स्य वियन्तु यज॑
॥ दे॒वं ब॒रु॒हिर्वा॑रि॒तीना॑म् । अ॒द्धरे॑ स्ती॒र्णम॑श्वि॒भ्याम् । ऊ॒र्णम॑दाः सर॑स्वत्याः 71

TB 2.6.14.6.

स्योनमिन्द्र ते सदः । ईशायै मन्युः राजानं बरुहिषा दधुरिन्द्रियम् । वसुवने वसुधेयस्य वियन्तु यज ॥ देवो अग्निः स्विष्टकृत् । देवान् यक्षद् यथायथम् । होतांरा-विन्द्रमश्विना । वाचा वाचः सरस्वतीम् । अग्निः सोमः स्विष्टकृत् । स्विष्ट इन्द्रः सुत्रामां सविता वरुणो भिषक् । इष्टो देवो वनस्पतिः () । स्विष्टा देवा आज्यपाः । इष्टो अग्निरग्निना । होता होत्रे स्विष्टकृत् । यशो न दधदिन्द्रियम् । ऊर्जमपचितिः स्वधाम् । वसुवने वसुधेयस्य वियन्तु यज । 72

special korvai

(देवं बरुहिर देवीर् द्वारो देवी उषासावश्विना देवी जोष्ट्र देवी ऊर्जाहूती देवा देवानां भिषजां वषट्कारैर् देवीस्तिस्रस्तिस्रो देवीः सरस्वती देव इन्द्रो नराशंसो देव इन्द्रो वनस्पतिर्देवं बरुहिर्वारितीनां देवोअग्निः स्विष्टकृद् देवान्) ।

special korvai

(समिधाऽग्निं देवं बरुहिः सरस्वत्याश्विना सर्वं वियन्तु । द्वारंस्तिस्रः सर्वं वियन्तु । अज इन्द्रमोजोऽग्निं परः सरस्वतीम् । नक्तपूर्वः सरस्वति । अन्यत्र सरस्वति । भिषक् पूर्व दुह इन्द्रियं । अन्यत्र दधुरिन्द्रियम् । सौत्रामण्याः सुतासुती । अञ्जन्त्ययं यजमानः)

(द्वारो दधुरिन्द्रियं वसुवने वसुधेयस्य वियन्तु यज - जोष्ट्रीभ्यां दधुरिन्द्रियं वसुवने वसुधेयस्य वियन्तु यज - होतृभ्यां दधुरिन्द्रियं वसुवने वसुधेयस्य वियन्तु यजे - न्द्रियाणि वसुवने वसुधेयस्य वियन्तु यज - सरस्वत्या - वनस्पतिः षट्) (A14)

2.6.15 अनुवाकं 15 - सूक्तवाकप्रैषः

TB 2.6.15.1

अग्निमद्य होतांरमवृणीत । अयः सुतासुती यजमानः । पचन् पक्तीः । पचन् पुरोडाशान् । गृह्णन् ग्रहान् । बद्धन्नश्विभ्यां छागः सरस्वत्या इन्द्राय । बद्धन्थ सरस्वत्यै मेषमिन्द्रायाश्विभ्याम् । बद्धन्निन्द्रायरुषभ-मश्विभ्याः सरस्वत्यै । सूपस्था अद्य देवो वनस्पतिरभवत् । अश्विभ्यां छागेन सरस्वत्या इन्द्राय 73

TB 2.6.15.2

सरस्वत्यै मे॒षेणेन्द्रा॑या॒श्विभ्या॑म् । इन्द्रा॑य॒र॒षभे॑णा॒श्विभ्या॑ः सरस्वत्यै । अक्ष॑स्तान्मे॒दुस्तः॑ प्रति॒ प॒च॒ताऽग्रं॑भीषुः । अवी॑वृ॒धन्त॑ ग्र॒हैः । अपा॑ताम॒श्विना॑ सरस्वतीन्द्रः सु॒त्रामा॑ वृ॒त्रहा॑ । सोमा॑न्थ॒ सुरा॑म्णाः । उपो॑ उक्थाम॒दाः श्रौद्वि॑म॒दा॑ अद॒न् । अवी॑वृ॒धन् ताङ्गु॑षैः । त्वाम॑घ॒र॒ष आ॒र॒षेय॑र॒षीणां॑ नपादवृणीत । अ॒यः सु॑तासु॒ती यज॑मानः () । बहु॑भ्य॒ आसंग॑तेभ्यः । ए॒ष मे॑ दे॒वेषु॑ वसु॒ वार्या॑ यक्ष्यत॒ इति॑ । ता या दे॒वा दे॒वदाना॑न्यदुः । तान्य॑स्मा॒ आ च॒ शास्व॑ । आ च॑ गुरस्व । इ॒षित॑श्च॒ होत्र॑सि॒ भद्र॑वाच्याय॒ प्रेषि॑तो॒ मानु॑षः । सू॒क्तवा॑काय॒ सूक्ता॑ ब्रूहि । 74

(इन्द्राय - यजमानः सप्त च) (A15)

2.6.16 अनुवाकं 16 - पितृयज्ञ्याज्यानुवाक्याः

TB 2.6.16.1

"उ॒शन्त॑स्त्वा हवाम॒ह॑14", "आ नो॑ अ॒ग्ने सु॒केतु॑ना॒15" । "त्व॑ सोम॒ म॒हे भग॑16", "त्व॑ सोम॒ प्रचि॑कितो मनी॒षा॑17" । "त्वया॑ हि नः पि॒तरः॑ सोम॒ पूर्वे॑18", "त्व॑ सोम॒ पि॒तृभिः॑ सम्॒विदा॑नः19" । "ब॒र॒हि॒षदः॑ पि॒तर॑20", "आऽहं॑ पि॒तृन्॑21" । "उप॑हूताः पि॒तरो॑22", "ऽग्नि॑ष्वा॒त्ताः पि॒तरः॑23" ॥ अ॒ग्निष्वा॒त्तानृ॑तुम॒तो हवाम॑हे । नरा॒श॒से सोम॑पी॒थं य आ॑शुः । ते नो॒ अर्व॑न्तः सु॒हवा॑ भवन्तु । शं नो॑ भवन्तु द्वि॒पदे॑ शं चतु॑ष्पदे ॥ ये अ॒ग्निष्वा॒त्ता येऽन॑ग्निष्वा॒त्ताः 75

TB 2.6.16.2

अ॒हो॒मुचः॑ पि॒तरः॑ सो॒म्यासः॑ । परेऽव॑रेऽमृ॒तासो॑ भवन्तः । अधि॑ब्रुवन्तु ते अ॒वन्त्व॑स्मान् ॥ वा॒न्यायै॑ दुग्धे जुषमा॑णाः क॒र॒म्भम् । उ॒दीरा॑णा॒ अव॑रे परे च । अ॒ग्निष्वा॒त्ता ऋ॒तुभिः॑ सम्॒विदा॑नाः । इन्द्र॑वन्तो ह॒विरि॑दं जुषन्ताम् ॥ "यद॑ग्ने क॒व्यवा॑हन॒24, "त्वम॑ग्न ई॒डितो॑ जा॒तवे॑दः25" । "मात॑लीक॒व्यैः॑26" ॥ ये ता॑तृपु॒र्देव॑त्रा जेह॑मानाः () । हो॒त्रावृ॑धः स्तोम॑त॒ष्टासो॑ अ॒र्कैः । आऽग्ने॑

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 107

याहि सुविदत्रेभिर्वाङ् । सत्यैः कव्यैः पितृभिर्-धर्मसद्भिः ॥ हव्यवाहमजरं पुरुप्रियम् । अग्निं
घृतेन हविषा सपर्यन्तम् । उपासदं कव्यवाहं पितृणाम् । स नः प्रजां वीरवतीं समृण्वतु । 76

(अनग्निष्वात्ता - जेहमानाः सप्त च) (A16)

2.6.17 अनुवाकं 17 - ऐन्द्रो पशौ एकादश प्रयाजाः

TB 2.6.17.1

होता यक्षद्विडस्पदे । समिधानं महद्यशः । सुषमिद्धं वरेण्यम् । अग्निमिन्द्रं वयोधसम् । गायत्रीं
छन्द इन्द्रियम् । त्र्यविं गां वयो दधत् । वेत्वाज्यस्य होतर्यजं ॥ होता यक्षच्छुचिव्रतम् ।
तनूनपातमुद्भिदम् । यं गर्भमदितिर्दधे 77

TB 2.6.17.2

शुचिमिन्द्रं वयोधसम् । उष्णिहं छन्द इन्द्रियम् । दित्यवाहं गां वयो दधत् । वेत्वाज्यस्य होतर्यजं
॥ होता यक्षदीडेन्यम् । ईडितं वृत्रहन्तमम् । इडाभिरीड्यः सहः । सोममिन्द्रं वयोधसम् ।
अनुष्टुभं छन्द इन्द्रियम् । त्रिवृधं गां वयो दधत् 78

TB 2.6.17.3

वेत्वाज्यस्य होतर्यजं ॥ होता यक्षश्च सुबर्हिषदम् । पूषण्वन्त-ममर्त्यम् । सीदन्तं बर्हिषि प्रिये
। अमृतेन्द्रं वयोधसम् । बृहतीं छन्द इन्द्रियम् । पञ्चाविं गां वयो दधत् । वेत्वाज्यस्य होतर्यजं
॥ होता यक्षद् व्यचस्वतीः । सुप्रायणा ऋतावृधः 79

TB 2.6.17.4

द्वारो देवीर्हिरण्ययीः । ब्रह्माण इन्द्रं वयोधसम् । पङ्क्तिं छन्द इहेन्द्रियम् । तुर्यवाहं गां वयो
दधत् । वेत्वाज्यस्य होतर्यजं ॥ होता यक्षश्च-सुपेशसे । सुशिल्पे बृहती उभे । नक्तोषासा न

द॒र॒श॒ते । वि॒श्व॒मिन्द्रं॑ व॒यो॒धस॑म् । त्रि॒ष्टु॒भं छन्द॑ इन्द्रि॒यम् 80

TB 2.6.17.5

प॒ष्ट॒वाहं॑ गां व॒यो दध॑त् । वे॒त्वाज्य॑स्य॒ होत॑र्यजं ॥ हो॒ता यक्ष॑त् प्रचे॒तसा॑ । दे॒वाना॑मु॒त्त॒मं यशः॑ ।
हो॒ता॒रा दै॒व्या क॒वी । स॒यु॒जेन्द्रं॑ व॒यो॒धस॑म् । जग॑तीं छन्द॑ इ॒हेन्द्रि॒यम् । अ॒न॒द्वाहं॑ गां व॒यो दध॑त्
। वे॒त्वाज्य॑स्य॒ होत॑र्यजं ॥ हो॒ता यक्ष॑त् पेश॑स्वतीः 81

TB 2.6.17.6.

ति॒स्रो दे॒वीर॒हि॒र॒ण्ययीः॑ । भा॒र॒तीर॒बृ॒हती॑र्म॒हीः । प॒ति॒मिन्द्रं॑ व॒यो॒धस॑म् । वि॒राजं॑ छन्द॑ इ॒हेन्द्रि॒यम्
। धे॒नुं गां न व॒यो दध॑त् । वे॒त्वाज्य॑स्य॒ होत॑र्यजं ॥ हो॒ता यक्ष॑त् सु॒रेत॑सम् । त्व॒ष्टारं॑ पु॒ष्टि॒वर्द्ध॑नम्
। रू॒पाणि॑ बिभ्र॑तं पृथ॑क् । पु॒ष्टि॒मिन्द्रं॑ व॒यो॒धस॑म् 82

TB 2.6.17.7

द्वि॒पदं॑ छन्द॑ इ॒हेन्द्रि॒यम् । उ॒क्षाणं॑ गां न व॒यो दध॑त् । वे॒त्वाज्य॑स्य॒ होत॑र्यजं ॥ हो॒ता यक्ष॑च्छ॒त॒क्र॒तुम्
। हि॒र॒ण्य॒पर्ण॑-मु॒क्थि॒नम् । र॒श॒नां बिभ्र॑तं व॒शिम् । भ॒ग॒मिन्द्रं॑ व॒यो॒धस॑म् । क॒कु॒भं छन्द॑ इ॒हेन्द्रि॒यम्
। व॒शां वे॒हतं॑ गां न व॒यो दध॑त् । वे॒त्वाज्य॑स्य॒ होत॑र्यजं () ॥ हो॒ता यक्ष॑त्-स्वाहा॑कृ॒तीः । अ॒ग्निं
गृ॒ह॒प॒तिं पृथ॑क् । वरु॑णं भेष॑जं क॒विम् । क्ष॒त्र॒मिन्द्रं॑ व॒यो॒धस॑म् । अ॒ति॒च्छ॒न्द॒सं छन्द॑ इन्द्रि॒यम् ।
बृ॒ह॒द॒ष्ट॒भं गां व॒यो दध॑त् । वे॒त्वाज्य॑स्य॒ होत॑र्यजं । 83

special korvai

इ॒ड॒स्प॒देऽग्निं॑ गा॒य॒त्रीं त्र्य॑वि॒म् । शुचि॑व्र॒तः शुचि॑मु॒ष्णिहं॑ दि॒त्य॒वाह॑म् । ई॒डे॒न्यः सोमं॑-म॒नु॒ष्टु॒भं
त्रि॒व॒त्स॒म् । सु॒ब॒र॒हि॒ष॒द॒म॒मृ॒तेन्द्रं॑ बृ॒ह॒तीं पञ्चा॑विम् । व्य॒च॒स्व॒तीः सु॒प्रा॒य॒णा द्वा॒रौ ब्रा॒ह्म॒णः पा॒ङ्क्ति॑मि॒ह
तु॒र्य॒वाह॑म् । सु॒पेश॑से वि॒श्व॒मिन्द्रं॑ त्रि॒ष्टु॒भं प॒ष्ट॒वाह॑म् । प्र॒चे॒त॒सा स॒यु॒जेन्द्रं॑ जग॑तीमि॒हान॑द्वाह॑म् ।
पेश॑स्वतीस्ति॒स्रो भा॒र॒तीः प॒तिं वि॒राज॑मि॒ह धे॒नुं न । सु॒रेत॑सं त्व॒ष्टारं॑ पु॒ष्टिं द्वि॒पद॑मि॒हो॒क्षाणं॑ न ।

शतक्र॑तुं भग॑मिन्द्रं क॒कुभ॑मिह व॒शां वे॒हतं गां न । स्वाहा॑कृतीः क्ष॒त्रम॑तिच्छन्द॒सं बृ॒हदृ॑षभं गां व॒यः ।
। इन्द्रि॑यमुषि॒वसु॑नव॒दुशे॑हैन्द्रि॒यम॑ष्टं नव द॒श गां न वयो॑ दधु॒ध् सर्व॑वेतु ।
(दधे - दधद् - ऋतावृध - इन्द्रियं - पेशस्वतीर् - वयोधसं - वेत्वाज्यस्य होतर्यजं सप्त च) (A17)

2.6.18 अनुवाकं 18 - ऐन्द्रो पशौ प्रयाजयाज्याः

TB 2.6.18.1

समि॑द्धो अ॒ग्निः समि॑धा । सुष॑मिद्धो व॒रेण्यः । गा॒यत्री छन्द॑ इन्द्रि॒यम् । त्र्यवि॑र्गैर्वयो॑ दधुः ॥
तनू॑नपा॒च्छुचि॑व्रतः । तनू॑नपा॒च्च (तनू॑पा॒च्च) सर॑स्वती । उ॒ष्णिक्छन्द॑ इन्द्रि॒यम् । दित्य॑वा॒ज्ञैर्वयो॑
दधुः ॥ इडा॑भि॒रग्नि॑रीड्यः । सोमो॑ दे॒वो अम॑र्त्यः 84

TB 2.6.18.2

अ॒नुष्टु॑प्छन्द॑ इन्द्रि॒यम् । त्रि॒व॒थ्सो गौ॑र्वयो॑ दधुः ॥ सु॒ब॒र॒हिर॑ग्निः पू॒ष॒ण्वान् । स्ती॒र्ण॒ब॒र॒हिर॑मर्त्यः
। बृ॒हती छन्द॑ इन्द्रि॒यम् । प॒ञ्चा॒विर् गौ॑र्वयो॑ दधुः ॥ दुरो॑ दे॒वीर्दि॑शो म॒हीः । ब्र॒ह्मा दे॒वो बृ॒हस्प॑तिः
। प॒ङ्क्तिः छन्द॑ इ॒हेन्द्रि॒यम् । तुर्य॑वा॒ङ् गौ॑र्वयो॑ दधुः । 85

TB 2.6.18.3

उ॒षे य॒द्वा सु॑पेश॑सा । वि॒श्वे दे॒वा अम॑र्त्याः । त्रि॒ष्टुप् छन्द॑ इन्द्रि॒यम् । प॒ष्ट॒वा॒ज्ञैर्वयो॑ दधुः ॥ दै॒व्या
हो॒तारा॑ भिष॒जा । इन्द्रे॑ण स॒युजा॑ यु॒जा । जग॑ती छन्द॑ इ॒हेन्द्रि॒यम् । अ॒न॒ड्वा॒न्-गौ॑र्वयो॑ दधुः ॥
ति॒स्र इडा॑ सर॑स्वती । भा॒रती॑ म॒रुतो॑ वि॒शः 86

TB 2.6.18.4

वि॒राट्छन्द॑ इ॒हेन्द्रि॒यम् । धे॒नुगौ॑र्न वयो॑ दधुः ॥ त्व॒ष्टा तुरी॑पो अ॒द्भुतः । इन्द्रा॑ग्नी पु॒ष्टि॒वर्द्ध॑ना ।
द्वि॒पा॒च्छन्द॑ इ॒हेन्द्रि॒यम् । उ॒क्षा गौ॑र्न वयो॑ दधुः ॥ श॒मिता॑ नो व॒नस्प॑तिः । स॒वि॒ता प्र॑सुव॒न्भग॑म्
। क॒कु॒च्छन्द॑ इ॒हेन्द्रि॒यम् । व॒शा वे॒हद्वौ॑र्न वयो॑ दधुः () ॥ स्वाहा॑ य॒ज्ञं व॑रुणः । सु॒क्षत्रो॑ भेष॒जं

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 110

करत् । अतिः छन्दाः छन्द इन्द्रियम् । बृहदृषभो गौर्वयो दधुः । 87

(अमर्त्य - स्तुर्यवाङ्गौर्वयो दधुर् - विशो - वशा वेहद्गौर्न वयो दधुश्चत्वारि च) (A18)

2.6.19 अनुवाकं 19 - ऐन्द्रो पशौ वपादीनां यज्यानुवाक्याः

TB 2.6.19.1

वसन्तेनर्तुना देवाः । वसवस्त्रिवृतां स्तुतम् । रथन्तरेण तेजसा । हविरिन्द्रे वयो दधुः ॥ ग्रीष्मेण देवा ऋतुना । रुद्राः पञ्चदशे स्तुतम् । बृहता यशसा बलम् । हविरिन्द्रे वयो दधुः ॥ वरुणाभिः ऋतुनाऽऽदित्याः । स्तोमे सप्तदशे स्तुतम् 88

TB 2.6.19.2

वैरूपेण विशौजसा । हविरिन्द्रे वयो दधुः ॥ शारदेनर्तुना देवाः । एकविंश ऋभवं स्तुतम् । वैराजेन श्रिया श्रियम् । हविरिन्द्रे वयो दधुः ॥ हेमन्तेनर्तुना देवाः । मरुतस्त्रिणवे स्तुतम् । बलेन शक्रेरीः सहः । हविरिन्द्रे वयो दधुः () ॥ शैशिरेणर्तुना देवाः । त्रयस्त्रिंशे ऽमृतं स्तुतम् । सत्येन रेवतीः क्षत्रम् । हविरिन्द्रे वयो दधुः । 89

special korvai

(वसन्तेन ग्रीष्मेण वरुणाभिः शारदेन हेमन्तेन शैशिरेण षट्)

(स्तोमे सप्तदशे स्तुतः - सहो हविरिन्द्रे वयो दधुश्चत्वारि च) (A19)

2.6.20 अनुवाकं 20 - ऐन्द्रो पशौ अनूयाजानां मैत्रावरिणप्रैषाः

TB 2.6.20.1

देवं ब्रूहिन्द्रं वयोधसम् । देवं देवमवर्द्धयत् । गायत्रिया छन्दसेन्द्रियम् । तेज इन्द्रे वयो दधत् । वसुवने वसुधेयस्य वेतु यज । देवीर्द्वारो देवमिन्द्रं वयोधसम् । देवीर्देवमवर्द्धयन् । उष्णिहा

छन्दसेन्द्रियम् । प्राणमिन्द्रे वयो दधत् । वसुवने वसुधेयस्य वियन्तु यज । 90

TB 2.6.20.2

देवी देवं वयोधसम् । उषे इन्द्रमवर्द्धताम् । अनुष्टुभा छन्दसेन्द्रियम् । वाचमिन्द्रे वयो दधत् । वसुवने वसुधेयस्य वीतां यज ॥ देवी जोष्ट्री देवमिन्द्रं वयोधसम् । देवी देवमवर्द्धताम् । बृहत्या छन्दसेन्द्रियम् । श्रोत्रमिन्द्रे वयो दधत् । वसुवने वसुधेयस्य वीतां यज । 91

TB 2.6.20.3

देवी ऊर्जाहुती देवमिन्द्रं वयोधसम् । देवी देवमवर्द्धताम् । पृङ्ग्या छन्दसेन्द्रियम् । शुक्रमिन्द्रे वयो दधत् । वसुवने वसुधेयस्य वीतां यज ॥ देवा दैव्या होतां देवमिन्द्रं वयोधसम् । देवा देवमवर्द्धताम् । त्रिष्टुभा छन्दसेन्द्रियम् । त्विषिमिन्द्रे वयो दधत् । वसुवने वसुधेयस्य वीतां यज । 92

TB 2.6.20.4

देवी-स्तिष्ठ-स्तिष्ठो देवीर्वयोधसम् । पतिमिन्द्रं मवर्द्धयन् । जगत्या छन्दसेन्द्रियम् । बलमिन्द्रे वयो दधत् । वसुवने वसुधेयस्य वियन्तु यज ॥ देवो नराशंसो देवमिन्द्रं वयोधसम् । देवो देवमवर्द्धयत् । विराजा छन्दसेन्द्रियम् । रेत इन्द्रे वयो दधत् । वसुवने वसुधेयस्य वेतु यज । 93

TB 2.6.20.5

देवो वनस्पतिर्देवमिन्द्रं वयोधसम् । देवो देवमवर्द्धयत् । द्विपदा छन्दसेन्द्रियम् । भगमिन्द्रे वयो दधत् । वसुवने वसुधेयस्य वेतु यज ॥ देवं बरुहिर्वारितीनां देवमिन्द्रं वयोधसम् । देवो (देवं) देवमवर्द्धयत् । कुकुभा छन्दसेन्द्रियम् । यश इन्द्रे वयो दधत् । वसुवने वसुधेयस्य वेतु यज () ॥ देवो अग्निः स्विष्टकृद्देवमिन्द्रं वयोधसम् । देवो देवमवर्द्धयत् । अतिच्छन्दसा छन्दसेन्द्रियम् । क्षत्रमिन्द्रे वयो दधत् । वसुवने वसुधेयस्य वेतु यज । 94

2.6 द्वितीयाष्टके षष्ठः प्रपाठकः - सौत्रामणिः कौकिली होत्रं च <https://www.vedavms.in> 112

special korvai

(देवं ब॒रु॒हिर् गा॑यत्रिया तेजः । दे॒वीर्द्वार॑ उ॒ष्णिहो॑ प्रा॒णम् । दे॒वी दे॒वमु॒षे अ॑नु॒ष्टुभा॒ वाच॑म् । दे॒वी जो॒ष्ट्री बृ॑हत्या श्रोत्र॑म् । दे॒वी ऊ॒र्जाहू॑ती प॒ङ्क्त्या शु॒क्रम् । दे॒वा दै॒व्या हो॑ता॒रा त्रि॒ष्टुभा॒ त्विषि॑म् । दे॒वीस्ति॒स्रस्ति॒स्रो दे॒वीः पति॑ जग॑त्या बल॑म् । दे॒वो नरा॑शः सो वि॒राजा॒ रेतः॑ । दे॒वो वन॑स्पति॒र् द्वि॒पदा॒ भग॑म् । दे॒वं ब॒रु॒हिर् वारि॑तीनां क॒कुभा॒ यशः॑ । दे॒वो अ॒ग्निः स्वि॑ष्ट॒कृदति॑च्छन्दसा क्षु॒त्रम् । वे॒तु वि॒यन्तु॒ चतु॑र् वी॒तामे॒को वि॒यन्तु॒ चतु॑र्वे॒तु । अ॒वर्द्ध॑यद॒वर्द्ध॑यः श्व॒तुर॑वर्द्धता॒मेको॑ ऽवर्द्ध॑यः श्व॒तुर॑वर्द्धयत् ।)

(वि॒यन्तु॒ यज॑ - वी॒तां॒ यज॑-वी॒तां॒ यज॑-वे॒तु यज॑-वे॒तु यज॑ पञ्च च) (A20)

PrapAtaka Korvai with starting words of 1 to 20 anuvAkams :-

(स्वा॒द्वीं त्वा॒ - सोमः॑ - सुरा॑वन्तः - सी॒सेन॑ - मि॒त्रो॒ऽसि॑ - यद् दे॒वा - हो॒ता यक्ष॑थ॒ समि॑धेन्द्रः - समि॑द्ध इन्द्र - आच॑र॒ षणि॑प्रा - दे॒वं ब॒रु॒हिरिन्द्रः॑ सु॒देवः॑ - हो॒ता यक्ष॑थ॒ समि॑धा॒ऽग्निः॑ - समि॑द्धो अ॒ग्निर॑श्विना - ऽश्विना॑ ह॒विरे॑न्द्रि॒यं - दे॒वं ब॒रु॒हिः सर॑स्व - त्या॒ग्निम् - द्यो॒शन्तो॑ - हो॒ता यक्ष॑दि॒डस्प॑दे - समि॑द्धो अ॒ग्निः समि॑धा - वस॑न्तेन - दे॒वं ब॒रु॒हिरिन्द्रः॑ वयो॒धसं॑ वि॒श्रतिः॑)

korvai with starting words of 1, 11, 21 series of daSinis :-

(स्वा॒द्वीं त्वा॒ऽ - मी॑ मदन्त पि॒तरः॑ - साम्रा॑ज्याय - पू॒तं प॒वित्रे॑णे वा॒ज्यं - मु॒षासा॑नक्ता - ब॒दरै॑ - रधा॑ताम॒श्विना॑ - दे॒व इन्द्रो॑ वन॒स्पतिः॑ - प॒ष्ठवा॑हं गां - दे॒वी दे॒वं वयो॑धसं चतु॑र्नवतिः)

first and last word 2nd aShTakam 6th prapAtakam :-

(स्वा॒द्वीन्त्वा॑ - वे॒तु यज॑)

॥ हरिः॑ ॐ ॥ ॥ कृष्ण यजुर्वेदीय तैत्तिरीय ब्राह्मणे द्वितीयाष्टके षष्ठः प्रपाठकः समाप्तः ॥

Appendix (of Expansions) ट्.भू.2.6.3.4 "अग्र आयूँषि पवसे 3","ऽग्रे पवस्व4" अग्र आयूँषि पवस आ सुवोर्जमिषं च नः । आरे बांधस्व दुच्छुनां ॥ 3
 अग्रे पवस्व स्वपां अस्मे वर्चः सुवीर्यं । दधत् पोषं रयिं मयिं ॥ 4 (Appearing in T.S.1.3.14.8) ट्.भू.2.6.3.4 "पवमानः सुवर्जनः5" "पुनन्तु मा देवजनाः6" पवमानः सुवर्जनः । पवित्रेण विचरूषणिः । यः पोता स पुनातु मा ॥ 5
 पुनन्तु मा देवजनाः । पुनन्तु मनं वो धिया । पुनन्तु विश्वं आयवः ॥ 6 (Both appearing in T.B.1.4.8.1)
 ट्.भू.2.6.3.4 "जातवेदः पवित्रवद्7" "यत्ते पवित्रमर्चिषि8" जातवेदः पवित्रवत् । पवित्रेण पुनाहि मा । शुक्रेण देव दीद्यत् । अग्रे क्रत्वा क्रतूरनु ॥ 7 यत्ते पवित्रमर्चिषि । अग्रे विततमन्त्रा । ब्रह्म तेन पुनीमहे ॥ 8 (Both appearing in T.B.1.4.8.2)
 ट्.भू.2.6.3.4 "उभाभ्यां देव सवितर9" "वैश्वदेवी पुनती10" उभाभ्यां देव सवितः । पवित्रेण सवेन च । इदं ब्रह्म पुनीमहे ॥ 9
 वैश्वदेवी पुनती देव्यागात् । यस्यै ब्रह्मी-स्तनुवो वीतपृष्ठाः । तया मदन्तः सधमाद्येषु । वयं स्याम पतयो रयीणाम् ॥ 10 (Both appearing in T.B.1.4.8.2) ट्.भू.2.6.9.1 "आचरूषणिप्रा11" आचरूषणिप्रा वृषभो जनानाम् । राजा कृष्टीनां पुरुहूत इन्द्रः । स्तुतः श्रवस्यन्नवसोपमद्रिक् । युत्त्वा हरी वृषणा ऽऽयाह्यर्वाङ् ॥ 11 (Appearing in T.B.2.4.3.11) ट्.भू.2.6.9.1 "विवेष यन्मा12" विवेष यन्मा धिषणा जजान स्तवै पुरा पार्यादिन्द्र महः । अहंसो यत्र पीपरद्यथा नो नवेव यान्तं मुभये हवन्ते ॥ 12 (Appearing in T.S.1.6.12.3) ट्.भू.2.6.9.1 "तं सध्रीचीः13" तं सध्रीचीरूतयो वृष्णिन्यानि । पौंस्यानि नियुतः सश्चुरिन्द्रम् । समुद्रं न सिन्धवं उक्थशुष्माः । उरुव्यचंसगिरि आविशन्ति ॥ 13 (Appearing in T.B.2.4.5.2)
 ट्.भू.2.6.16.1 "उशन्तस्त्वा हवामह14" उशन्तस्त्वा हवामह उशन्तः समिधीमहि । उशन्तुशत आ वह पितृन् हविषे अत्तवे ॥ 14 (Appearing in T.S. 2.6.12.1) ट्.भू.2.6.16.1 "आ नो अग्रे सुकेतुनां15" "त्वं सोम महे भगं16" आ नो अग्रे सुकेतुनां । रयिं विश्वायुपोषसम् । मर्दीकं धेहि जीवसे ॥ 15

त्व॑ सोम॑ मु॒हे भ॑ग॒म् । त्वं॑ यू॒नं ऋ॑ताय॒ते । दक्षं॑ दधा॒सि जी॒वसै॑ ॥ 16 (Both appearing in T.B.2.4.5.3) ट्.भू.2.6.16.1 "त्व॑ सोम॑ प्रचि॑कितो मनी॒षा17", "त्वया॑ हि नः॑ पि॒तरः॑ सोम॑ पूर्वे॑18" त्व॑ सोम॑ प्रचि॑कितो मनी॒षा त्व॑ रजि॑ष्ठमनु॒ नेषि॑ पन्था॑ । तव॑ प्रणी॒ती पि॒तरो॑ न इ॒न्दो दे॒वेषु॑ रत्न॑म॒ भज॑न्त॒ धीराः॑ ॥ 17

त्वया॑ हि नः॑ पि॒तरः॑ सोम॑ पूर्वे॑ कर्मा॑णि च॒क्रुः प॑वमान॒ धीराः॑ । व॒न्वन्न॑वा॒तः परि॑धी॒ र्षो॑र्णु वी॒रेभि॑र॒श्वैर्म॑घवा॒ भवा॑ नः ॥ 18 (Both appearing in T.S.2.6.12.1) ट्.भू.2.6.16.1 "त्व॑ सोम॑ पि॒तृभिः॑ सम्॒विदा॑नः19" त्व॑ सोम॑ पि॒तृभिः॑ सं॒विदा॑नोऽनु॒ द्यावा॑पृथि॒वी आ त॑तन्थ । तस्मै॑ त इ॒न्दो ह॒विषा॑ वि॒धेम व॒यः स्या॑म॒ पत॑यो रयी॒णां ॥ 19 (Appearing in T.S.2.6.12.2) ट्.भू.2.6.16.1 "ब॒र्हिष॑दः पि॒तर॑20", "आऽहं॑ पि॒तृन्21", "उप॑हू॒ताः पि॒तरो॑22" ब॒र्हिष॑दः पि॒तर ऊ॒त्य॑र्वा॒ग्निमा वो॑ ह॒व्या च॑कृ॒मा जुष॑ध्वं । त आ ग॒ताऽव॑सा॒ शं त॑मे॒नाथा॑स्मभ्यः॒ शं यो॑र॒र॒पो द॑धात ॥ 20 (Appearing in T.S.2.6.12.2)

आऽहं॑ पि॒तृन्थ सु॒विद॑त्रा॒ अवि॑त्सि॒ नपा॑तं च वि॒क्रम॑णं च वि॒ष्णोः॑ । ब॒र्हिष॑दो ये स्व॒धया॑ सु॒तस्य॑ भज॑न्त॒ पित॑वस्त॒ इहाऽऽ ग॑मि॒ष्ठाः ॥ 21 (Appearing in T.S.2.6.12.3) उप॑हू॒ताः पि॒तरः॑ सो॒म्यासो॑ ब॒र्हिष्ये॑षु नि॒धिषु॑ प्रि॒येषु॑ । त आ ग॑मन्तु॒ त इ॒ह श्रु॑वन्त्वधि॒ ब्रु॑वन्तु॒ ते अ॑वन्त्व॒स्मान् ॥ 22 (Appearing in T.S.2.6.12.3)

ट्.भू.2.6.16.1 "ऽग्नि॑ष्वा॒त्ताः पि॒तरः॑23" अग्नि॑ष्वा॒त्ताः पि॒तर ए॒ह ग॑च्छत॒ सदः॑ सदः॑ सद॑त सु॒प्रणी॑तयः । अ॒त्ता ह॒वी॒षि प्र॑य॒तानि॑ ब॒र्हिष्य॑था॒ रयिः॑ स॒र्ववी॑रं दधा॒तन ॥ 23 (Appearing in T.S.2.6.12.2) ट्.भू.2.6.16.2 "यद॑ग्रे क॒व्यवा॑हन॒24, "त्वम॑ग्न ई॒डितो॑ जा॒तवे॑दः25", "मा॒त॒लीक॑व्यैः26" यद॑ग्रे क॒व्यवा॑हन पि॒तृन् यक्ष्य॑ता॒वृधः॑ । प्र च॑ ह॒व्यानि॑ वक्ष्य॒सि दे॒वेभ्य॑श्च पि॒तृभ्य॑ आ ॥ 24] त्वम॑ग्न ई॒डितो॑ जा॒तवे॑दोऽवा॒हृव्या॑नि॒ सुर॑भीणि॒ कृ॒त्वा । प्रा॒दाः पि॒तृभ्यः॑ स्व॒धया॑ ते अ॒क्षन्न॑द्धि॒ त्वं दे॒व प्र॑य॒ता ह॒वी॒षि । 25 मा॒त॒ली क॑व्यैर्य॒मो अ॒ङ्गिरो॑भि॒ बृ॒हस्प॑ति॒र॒ ऋ॒क॑भि॒ वा॒वृधा॑नः । या॑श्च॒ दे॒वा वा॑वृ॒धुर्ये॑ च॒ दे॒वान्थ स्वा॒हाऽन्ये॑ स्व॒धया॑ऽन्ये म॑दन्ति ॥ 26 (The abOvE 3 appearing in T.S.2.6.12.5) = = = = =

2.7 द्वितीयाष्टके सप्तमः प्रपाठकः - सवा एकाहविशेषाः

2.7.1 अनुवाकं 1 - बृहस्पतिसवः

TB 2.7.1.1

त्रिवृथ-स्तोमो भवति । ब्रह्मवर्चसं वै त्रिवृत् । ब्रह्मवर्चसमेवावरुन्धे ॥ अग्निष्टोमः सोमो भवति ।
ब्रह्मवर्चसं वा अग्निष्टोमः । ब्रह्मवर्चसमेवावरुन्धे ॥ रथतरं सामं भवति । ब्रह्मवर्चसं वै रथन्तरम्
। ब्रह्मवर्चसमेवावरुन्धे ॥ परिस्रजो होता भवति 1

TB 2.7.1.2

अरुणो मिर्मिरस्त्रिशुक्रः । एतद् वै ब्रह्मवर्चसस्य रूपम् । रूपेणैव ब्रह्मवर्चसमवरुन्धे ॥ बृहस्पति-
रकामयत देवानां पुरोधामं गच्छेयमिति । स एतं बृहस्पतिसवमपश्यत् । तमाऽहरत् । तेनायजत
। ततो वै स देवानां पुरोधामं गच्छत् । यः पुरोधामः स्यात् । स बृहस्पतिसवेन यजेत 2

TB 2.7.1.3

पुरोधामेव गच्छति ॥ तस्य प्रातस्सवने सन्नेषु नाराशसेषु । एकादश दक्षिणा नीयन्ते । एकादश
माद्वयदिने सवने सन्नेषु नाराशसेषु । एकादश तृतीयसवने सन्नेषु नाराशसेषु । त्रयस्त्रिंशथ-
संपद्यन्ते । त्रयस्त्रिंशद् वै देवताः । देवता एवावरुन्धे ॥ अश्वश्चतुस्त्रिंशः । प्राजापत्यो वा
अश्वः 3

TB 2.7.1.4

प्रजापतिश्चतुस्त्रिंशो देवतानां । यावतीरेव देवताः । ता एवावरुन्धे ॥ कृष्णाजिनोऽभिषिञ्चति ।
ब्रह्मणो वा एतद्-रूपम् । यत् कृष्णाजिनम् । ब्रह्मवर्चसेनैवैनं समर्द्धयति ॥ आज्येनाभिषिञ्चति
। तेजो वा आज्यम् । तेज एवास्मिन् दधाति () । 4

(होता भवति - यजेत - वा अश्वो - दधाति) (A1)

2.7.2 अनुवाकं 2 - वैश्यसवः

TB 2.7.2.1

यदा॑ग्ने॒यो भव॑ति । अ॒ग्निमु॑खा हृ॒द्भिः ॥ अथ॑ यत् पौ॒ष्णः । पु॒ष्टिर्वै पू॒षा । पु॒ष्टिर्-वै॒श्यस्य॑ ।
पु॒ष्टिमे॒वाव॑रुन्धे ॥ प्र॒स॒वाय॑ सावि॒त्रः ॥ अथ॑ यत् त्वा॒ष्ट्रः । त्वष्टा॑ हि रू॒पाणि॑ वि॒क॒रोति॑ ॥
निर्व॑रु॒णत्वाय॑ वा॒रुणः॑ 5

TB 2.7.2.2

अथो॑ य ए॒व कश्च॑ सन्ध॒सूयते॑ । स हि वा॑रु॒णः ॥ अथ॑ यद् वै॒श्वदे॒वः । वै॒श्वदे॒वो हि वै॒श्यः ॥ अथ॑
यन् मा॑रु॒तः । मा॒रुतो॑ हि वै॒श्यः ॥ स॒प्तैता॑नि ह॒वींषि॑ भवन्ति । स॒प्तग॑णा॒ वै म॒रुतः॑ ॥ पृ॒श्निः
प॒ष्ठौही॑ मा॒रुत्या॑ल॒भ्यते॑ । वि॒द्वै म॒रुतः॑ () ॥ वि॒श ए॒वैतन्-म॑द्व्य॒तोऽभि॑षिच्यते । तस्मा॑द् वा ए॒ष
वि॒शः प्रि॒यः । वि॒शो हि म॑द्व्य॒तोऽभि॑षिच्यते ॥ ऋ॒षभ॑च॒र्मेऽद्व्य॑भिषिञ्चति । स हि प्र॑जनयि॒ता ॥
द॒द्धाऽभि॑षिञ्चति । ऊ॒र्वा अ॒न्नाद्यं॑ दधि॑ । ऊ॒र्जेवैन॑-म॒न्नाद्ये॑न॒ सम॑र्द्धयति । 6

(वा॒रु॒णो - वि॒द्वै म॒रुतो॑ऽष्टौ च) (A2)

2.7.3 अनुवाकं 3 - ब्राह्मणसवः

TB 2.7.3.1

यदा॑ग्ने॒यो भव॑ति । अ॒ग्नेयो॑ वै ब्रा॒ह्मणः॑ ॥ अथ॑ यथ॑ सौ॒म्यः । सौ॒म्यो हि ब्रा॒ह्मणः॑ ॥ प्र॒स॒वायै॒व
सा॑वि॒त्रः ॥ अथ॑ यद् बा॑र॒हस्प॑त्यः । ए॒तद्वै ब्रा॒ह्मण॑स्य॒ वाक्प॑तीयम् ॥ अथ॑ यद॑ग्नी॒षोमी॑यः ।
अ॒ग्नेयो॑ वै ब्रा॒ह्मणः॑ । तौ य॒दा स॒गच्छे॑ते 7

TB 2.7.3.2

अथ॑ वी॒र्या॑व॒त्तरो॑ भवति ॥ अथ॑ यथ॑ सा॒रस्व॑तः । ए॒तद्भि॑ प्र॒त्यक्षं॑ ब्राह्म॑णस्य॑ वाक्प॒तीयम् ॥
नि॒र्वरु॑ण॒त्वायै॑व वा॒रुणः॑ । अथो॒ य ए॒व कश्च॑ सन्ध॒सूयते॑ । स हि वा॒रुणः॑ ॥ अथ॑ यद् द्या॒वापृ॑थि॒व्यः
। इन्द्रो॑ वृ॒त्राय॑ वज्रमु॒दय॑च्छत् । तं द्या॒वापृ॑थि॒वी नान्व॑मन्येताम् । तमे॒तेनै॒व भा॑ग॒धेये॒नान्व॑मन्येताम्
8

TB 2.7.3.3

वज्र॑स्य॒ वा ए॒षोऽनु॑मा॒नाय॑ । अनु॑मतवज्रः सू॒याता॒ इति॑ ॥ अ॒ष्टावे॑तानि॑ ह॒वीःषि॑ भवन्ति । अ॒ष्टाक्ष॑रा
गा॒यत्री । गा॒यत्री ब्र॑ह्मवर्च॒सम् । गा॒यत्रि॒यैव ब्र॑ह्मवर्च॒समव॑रुन्धे ॥ हि॒रण्ये॑न घृ॒तमु॒त् पु॑नाति । तेज॑स
ए॒व रु॒चे ॥ कृ॒ष्णाजि॑नेऽभिषि॒ञ्चति॑ । ब्रह्म॑णो॒ वा ए॒तद॑र॒क्सा॒मयो॑ रू॒पम् () । यत् कृ॑ष्णाजि॒नम् ।
ब्रह्म॑न्ने॒वैन॑-मृ॒क्सा॒मयो॑-र॒द्ध्यभि॑षि॒ञ्चति॑ ॥ घृ॒तेना॒-भि॑षि॒ञ्चति॑ । तथा॑ वी॒र्या॑व॒त्तरो॑ भवति । 9

(सृ॒गंछे॑ते - भा॒ग॒धेये॒नान्व॑मन्येताः- रू॒पं च॒त्वारि॑ च) (A3)

2.7.4 अनुवाकं 4 - सोमसवः

TB 2.7.4.1

न वै सोमे॑न॒ सोम॑स्य सु॒वोऽस्ति॑ । ह॒तो ह्ये॑षः । अ॒भिषु॑तो ह्ये॑षः । न हि ह॒तः सू॒यते॑ । सौ॒मीः
सू॒तवं॑शा॒माल॑भते । सोमो॒ वै रे॒तो॒धाः । रे॒त ए॒व तद्-द॑धाति ॥ सौ॒म्यर्चा॑ ऽभिषि॒ञ्चति॑ । रे॒तो॒धा
ह्य॑षा । रे॒तः सोमः॑ () । रे॒त ए॒वास्मि॑न् दधाति ॥ यत् किञ्च॑ रा॒जसू॑य॒मृते॑ सोम॑म् । तथ॑ सर्व॑
भवति ॥ अ॒षाढं॑ यु॒थ्सु॑ पृ॒तना॑सु प॒प्रिम् । सु॒व॒र॒षाम॑प्स्वां वृ॒जन॑स्य गो॒पाम् । भ॒रेषु॑जाः सु॒क्षितिः॑
सु॒श्रवं॑सम् । जय॑न्तं त्वा॒मनु॑ मदे॒म सोम॑ । 10

(रे॒तः सोमः॑ स॒प्त च॑) (A4)

2.7.5 अनुवाकं 5 - पृथिसवः

TB 2.7.5.1

यो वै सोमेन सूयते । स देवसवः । यः पशुनां सूयते । स देवसवः । य इष्ट्यां सूयते । स मनुष्यसवः । एतं वै पृथगे देवाः प्रायच्छन् । ततो वै सोऽप्यारण्यानां पशूनामसूयत । यावन्तीः कियन्तीश्च प्रजा वाचं वदन्ति । तासां सर्वासां सूयते 11

TB 2.7.5.2

य एतेन यजते । य उ चैनमेवं वेद ॥ नाराशस्यर्चा ऽभिषिञ्चति । मनुष्यां वै नाराशसः । निहुत्य वावैतत् । अथाभिषिञ्चति ॥ यत् किञ्च राजसूय-मनुत्तरवेदीकम् । तत् सर्वं भवति ॥ ये मे पञ्चाशतं दुदुः । अश्वानां सधस्तुतिः () । द्युमदग्रे महि श्रवः । बृहत् कृधि मघोनाम् । नृवदमृत नृणाम् । 12

(सूयते - सधस्तुतिस्त्रीणि च) (A5)

2.7.6 अनुवाकं 6 - गोसवः

TB 2.7.6.1

एष गोसवः । षट्त्रिंश उक्थ्यो बृहत् सामा । पवमाने कण्वरथन्तरं भवति ॥ यो वै वाजपेयः । स सम्राट्सवः । यो राजसूयः । स वरुणसवः । प्रजापतिः स्वाराज्यं परमेष्ठी । स्वाराज्यं गौरेव ॥ गौरिव भवति 13

TB 2.7.6.2

य एतेन यजते । य उ चैनमेवं वेद ॥ उभे बृहद्-रथन्तरे भवतः । तद्धि स्वाराज्यम् ॥ अयुतं दक्षिणाः । तद्धि स्वाराज्यम् ॥ प्रतिधुषा ऽभिषिञ्चति । तद्धि स्वाराज्यम् ॥ अनुद्धते वेद्यै दक्षिणत आहवनीयस्य बृहत्ः स्तोत्रं प्रत्यभिषिञ्चति । इयं वाव रथन्तरम् 14

TB 2.7.6.3

अ॒सौ बृ॒हत् । अ॒नयो॑रे॒वैन॒-मन॑न्तर॒हित॒-म॒भिषि॑ञ्चति ॥ प॒शुस्तो॑मो वा ए॒षः । तेन॑ गो॒स्रवः॑ ।
ष॒द्वि॒शः सर्वः॑ ॥ रे॒वज्जा॒तः सह॑सा वृ॒द्धः । क्ष॒त्राणां॑ क्ष॒त्रभृ॑त्तमो वयो॒धाः । म॒हान् म॑हि॒त्वे
त॑स्त॒भानः॑ । क्ष॒त्रे रा॒ष्ट्रे च॑ जागृ॒हि । प्र॒जाप॑तेस्त्वा परमे॒ष्ठिनः॑ स्वा॒रा॒ज्येना॒भिषि॑ञ्चा॒-मीत्या॑ह () ॥
स्वा॒रा॒ज्य-मे॒वैनं॑ गमयति । 15

(इ॒व भ॒वति॑ - र॒थन्त॑र - मा॒हैकं॑ च) (A6)

2.7.7 अनुवाकं 7 - ओदनसवमन्त्राः

TB 2.7.7.1

सि॒हे व्या॒घ्र उ॒त या॑ पृ॒दाकौ॑ । त्वि॒षिर॒ग्नौ ब्रा॑ह्म॒णे सू॒र्ये या॑ । इन्द्रं॑ या दे॒वी सु॒भगा॑ ज॒जानं॑ । सा
न॒ आग॑न् वर्च॒सा सम॑वि॒दा॒ना ॥ या रा॑ज॒न्ये दु॒न्दुभा॑वाय॒तायाम्॑ । अ॒श्वस्य॑ क्र॒न्धे पु॒रुष॑स्य मा॒यौ
। इन्द्रं॑ या दे॒वी सु॒भगा॑ ज॒जानं॑ । सा न॒ आग॑न् वर्च॒सा सम॑वि॒दा॒ना ॥ या ह॒स्तिनि॑ द्वा॒पिनि॑ या
हि॒रण्ये॑ । त्वि॒षि-र॒श्वेषु॑ पु॒रुषेषु॑ गो॒षु 16

TB 2.7.7.2

इन्द्रं॑ या दे॒वी सु॒भगा॑ ज॒जानं॑ । सा न॒ आग॑न् वर्च॒सा सम॑वि॒दा॒ना ॥ रथे॑ अ॒क्षेपु॑ वृ॒षभ॑स्य वा॒जे ।
वा॒ते प॒र्जन्ये॑ वरु॒णस्य॑ शु॒ष्मे । इन्द्रं॑ या दे॒वी सु॒भगा॑ ज॒जानं॑ । सा न॒ आग॑न् वर्च॒सा सम॑वि॒दा॒ना
॥ रा॒डसि॑ वि॒राडसि॑ । स॒म्राडसि॑ स्व॒राडसि॑ ॥ इन्द्रा॑य त्वा तेज॑स्वते तेज॑स्वन्तः॒ श्रीणामि॑ ।
इन्द्रा॑य त्वौज॑स्वतु ओज॑सवन्तः॒ श्रीणामि॑ 17

TB 2.7.7.3

इन्द्रा॑य त्वा प॒यस्वते॑ प॒यस्वन्तः॒ श्रीणामि॑ । इन्द्रा॑य त्वाऽऽयु॑ष्मत् आयु॑ष्मन्तः॒ श्रीणामि॑ ॥
तेजो॑ऽसि । तत् ते प्र॒यच्छामि॑ । तेज॑स्वदस्तु मे॒ मुख॑म् । तेज॑स्वच्छि॒रो अस्तु॑ मे । तेज॑स्वान्.

विश्वतः प्रत्यङ् । तेजसा संपिपृग्धि मा ॥ ओजोऽसि । तत् ते प्रयच्छामि 18

TB 2.7.7.4

ओजस्वदस्तु मे मुखम् । ओजस्वच्छिरो अस्तु मे । ओजस्वान् विश्वतः प्रत्यङ् । ओजसा संपिपृग्धि मा ॥ पयोऽसि । तत्ते प्रयच्छामि । पयस्वदस्तु मे मुखम् । पयस्वच्छिरो अस्तु मे । पयस्वान् विश्वतः प्रत्यङ् । पयसा संपिपृग्धि मा । 19

TB 2.7.7.5

आयुरसि । तत् ते प्रयच्छामि । आयुष्मदस्तु मे मुखम् । आयुष्मच्छिरो अस्तु मे । आयुष्मान् विश्वतः प्रत्यङ् । आयुषा संपिपृग्धि मा ॥ इममग्न आयुषे वर्चसे कृधि । प्रियः रेतो वरुण सोम राजन् । मातेवास्मा अदिते शर्म यच्छ । विश्वे देवा जरदष्टिर्यथा ऽसत् । 20

TB 2.7.7.6

आयुरसि विश्वायुरसि । सर्वायुरसि सर्वमायुरसि ॥ यतो वातो मनो जवाः । यतः क्षरन्ति सिन्धवः । तासां त्वा सर्वासा रुचा । अभिषिञ्चामि वर्चसा ॥ समुद्र इवासि गृह्णानां । सोम इवास्यदीभ्यः । अग्निरिव विश्वतः प्रत्यङ् । सूर्य इव ज्योतिषा विभूः । 21

TB 2.7.7.7

अपां यो द्रवणे रसः । तमहमस्मा आमुष्यायुणाय । तेजसे ब्रह्मवर्चसाय गृह्णामि । अपां य ऊर्मो रसः । तमहमस्मा आमुष्यायुणाय । ओजसे वीर्याय गृह्णामि । अपां यो मद्भ्यतो रसः । तमहमस्मा आमुष्यायुणाय । पुष्ट्यै प्रजननाय गृह्णामि । अपां यो यज्ञियो रसः () । तमहमस्मा आमुष्यायुणाय । आयुषे दीर्घायुत्वाय गृह्णामि । 22

(गोष - वोजस्वन्तः श्रीणा - म्योजोऽसि तत्ते प्रयच्छामि - पयसा संपिपृग्धि मा-सद् - विभूर् -

यज्ञियो रसो द्वे च) (A7)

2.7.8 अनुवाकं 8 - ओदनसवगता स्थारोहणमन्त्राः

TB 2.7.8.1

अभिप्रेहि वीरयस्व । उग्रश्चेत्तां सपत्नहा ॥ आतिष्ठ मित्रवर्द्धनः । तुभ्यं देवा अधिब्रवन् ॥ "अङ्कौ न्यङ्कावभित्27" "आतिष्ठ वृत्रहन्-रथम्28" ॥ आतिष्ठन्तं परि विश्वे अभूषन् । श्रियं वसानश्चरति स्वरोचाः । महत्-तदस्यासुरस्य नाम । आ विश्वरूपो अमृतानि तस्थौ ॥ अनु त्वेन्द्रो मदुत्वन् बृहस्पतिः 23

TB 2.7.8.2

अनु सोमो अन्वग्निरावीत् । अनु त्वा विश्वे देवा अन्वन्तु । अनु सप्त राजानो य उताभिषिक्ताः ॥ अनु त्वा मित्रावरुणाविहावन्तम् । अनु द्यावापृथिवी विश्वशंभू । सूर्यो अहोभिरनु त्वाऽवतु । चन्द्रमा नक्षत्रैरनु त्वाऽवतु ॥ द्यौश्च त्वा पृथिवी च प्रचेतसा । शुक्रो बृहद्-दक्षिणा त्वा पिपर्तु । अनु स्वधा चिंकिताः सोमो अग्निः () । आऽयं पृणक्तु रजसी उपस्थम् । 24

(बृहस्पतिः - सोमो अग्निरेकं च) (A8)

2.7.9 अनुवाकं 9 - ओदनसवः

TB 2.7.9.1

प्रजापतिः प्रजा असृजत । ता अस्मात्-सृष्टाः पराचीरायन् । स एतं प्रजापतिरोदुन-मपश्यत् । सोऽन्नं भूतोऽतिष्ठत् । ता अन्यत्राच्चाद्यमवित्त्वा । प्रजापतिं प्रजा उपावर्तन्त । अन्नमेवैनं भूतं पश्यन्तीः प्रजा उपावर्तन्ते । य एतेन यजते । य उ चैनमेवं वेद ॥ सर्वाण्यन्नानि भवन्ति 25

TB 2.7.9.2

सर्वे पुरुषाः । सर्वाण्येवान्नान्यवरुन्धे । सर्वान् पुरुषान् ॥ राडसि विराडसीत्याह । स्वाराज्यमेवैनं गमयति ॥ यद्विरण्यं ददाति । तेजस्तेनावरुन्धे । यत्तिसृधन्वम् । वीर्यं तेन । यदष्ट्राम् 26

TB 2.7.9.3

पुष्टिं तेन । यत्-कमण्डलुम् । आयुष्टेन ॥ यद्विरण्यमाबद्धाति । ज्योतिर्वै हिरण्यम् । ज्योतिरेवास्मिन्-दधाति । अथो तेजो वै हिरण्यम् । तेज एवात्मन् धत्ते ॥ यदोदुनं प्राश्नाति । एतदेव सर्वमवरुद्धयं 27

TB 2.7.9.4

तदस्मिन्-नेकधाऽधात् ॥ रोहिण्यां कार्यः । यद्वाह्मण एव रोहिणी । तस्मादेव । अथो वर्षमेवैनं समानानां करोति ॥ उद्यता सूर्येण कार्यः । उद्यन्तं वा एतः सर्वाः प्रजाः प्रतिनन्दन्ति ॥ दिदक्षेण्यो दरुशनीयो भवति । य एवं वेद ॥ ब्रह्मवादिनो वदन्ति 28

TB 2.7.9.5

अवेत्योऽवभृथा(3) ना(3) इति । यद्-दर्भपुञ्जिलैः पवयति । तथ् स्विदेवावैति । तन्नावैति ॥ त्रिभिः पवयति । त्रयं इमे लोकाः । एभिरेवैनं लोकैः पवयति । अथो अपां वा एतत् तेजो वर्चः । यद्-दुर्भाः । यद्-दर्भपुञ्जिलैः पवयति () । अपामेवैनं तेजसा वर्चसाऽभिषिञ्चति । 29

(भुव - न्त्यष्ट्रा - मवरुद्धयं - वदन्ति - दुर्भा यद् दर्भपुञ्जिलैः पवयत्येकं च) (A9)

2.7.10 अनुवाकं 10 - पञ्चशारदीयविधिः

TB 2.7.10.1

प्रजापतिरकामयत् ब्रह्मर्भूयान्थ-स्यामिति । स एतं पञ्चशारदीयं-मपश्यत् । तमाऽहरत् । तेनायजत । ततो वै स ब्रह्मर्भूया-नभवत् । यः कामयेत् ब्रह्मर्भूयान्थ-स्यामिति । स पञ्चशारदीयेन यजेत

। ब॒होरे॒व भू॒यान् भवति ॥ म॒रु॒थ॒ स्तो॒मो वा ए॒षः । म॒रु॒तो हि दे॒वानां॑ भूयि॑ष्ठाः । 30

TB 2.7.10.2

ब॒हु॒र्भवति॑ । य ए॒तेन॑ यज॑ते । य उ॑ चैनमे॒वं वे॒द ॥ प॒ञ्चशा॒र॒दीयो॑ भवति । पञ्च॑ वा ऋ॒तवः॑
स॒र्व॒थ्स॒रः । ऋ॒तुष्वे॒व स॒र्व॒थ्स॒रे प्र॑ति॒तिष्ठ॑ति । अथो॑ पञ्चा॒क्षरा॑ प॒ङ्क्तिः । पा॒ङ्क्तो॑ य॒ज्ञः । य॒ज्ञमे॒वाव॑रुन्धे
॥ स॒प्तद॒शः स्तो॒मा ना॑ति॒यन्ति॑ () । स॒प्तद॒शः प्र॒जाप॑तिः । प्र॒जाप॑ते॒रास्यै॑ । 31

(भूयिष्ठा - यन्ति द्वे च) (A10)

2.7.11 अनुवाकं 11 - पञ्चशारदीयगतपशुविधिः

TB 2.7.11.1

अ॒गस्यो॑ म॒रुद्भ्य॑ उ॒क्ष्णः प्रौक्ष॑त् । तानिन्द्र॑ आद॑त्त । त ए॒नं व॒ज्रमु॒द्यत्या॒भ्याय॑न्त । तान॒गस्त्य॑श्चै॒वेन्द्र॑श्च
क॒याशु॑भी॒येना॑शमयताम् । ताञ्छा॒न् तानु॑पा॒ह्वय॑त् । यत् क॑याशुभी॒यं भव॑ति॒ शान्त्यै॑ ॥ तस्मा॑दे॒त
ए॒न्द्रा मा॒रुता॑ उ॒क्षाणः॑ स॒वनी॑या भवन्ति । त्रयः॑ प्रथ॒मेऽह॑न्नाल॒भ्यन्ते॑ । एवं॑ द्विती॒ये । एवं॑ तृती॒ये 32

TB 2.7.11.2

ए॒वं च॑तु॒र्थे । पञ्चो॑त्त॒मेऽह॑न्नाल॒भ्यन्ते॑ । व॒र॒षि॒ष्ठमि॒व ह्ये॒तद॑हः ॥ व॒र॒षि॒ष्ठः स॒मा॒नानां॑ भवति । य
ए॒तेन॑ यज॑ते । य उ॑ चैनमे॒वं वे॒द ॥ स्वा॒रा॒ज्यं वा ए॒ष य॒ज्ञः । ए॒तेन॑ वा ए॒क॒यावा॑ कान्दुमः
स्वा॒रा॒ज्य॒मगच्छ॑त् ॥ स्वा॒रा॒ज्यं गच्छ॑ति । य ए॒तेन॑ यज॑ते 33

TB 2.7.11.3

य उ॑ चैनमे॒वं वे॒द ॥ मा॒रु॒तो वा ए॒ष स्तो॒मः । ए॒तेन॑ वै म॒रु॒तो दे॒वानां॑ भूयि॑ष्ठा अभवन् । भूयि॑ष्ठः
स॒मा॒नानां॑ भवति । य ए॒तेन॑ यज॑ते । य उ॑ चैनमे॒वं वे॒द ॥ प॒ञ्चशा॒र॒दीयो॑ वा ए॒ष य॒ज्ञः । आ
प॑ञ्चमा॒त्-पु॒रुषा॑द॒न्नम॑ति । य ए॒तेन॑ यज॑ते । य उ॑ चैनमे॒वं वे॒द () ॥ स॒प्तद॒शः स्तो॒मा ना॑ति॒यन्ति॑

। सप्तदशः प्रजापतिः । प्रजापतेरेव नैति । 34

special korvai

(अगस्त्यः स्वराज्यं मारुतः पञ्चशार्दीयो वा एष यज्ञः सप्तदशप्रजापतेरेव नैति)

(तृतीये - गच्छति य एतेन यजते - ऽत्ति य एतेन यजते य उ चैनमेवं वेद त्रीणि च) (A11)

2.7.12 अनुवाकं 12 - अग्निष्टुद्यागे ग्रहाणां पुरोरुचः

TB 2.7.12.1

अस्याजरासो दुमा मरित्राः । अर्चद्धूमासो अग्रयः पावकाः । श्विचीचयः श्वात्रासो भुरण्यवः ।
वनरुषदो वायवो न सोमाः ॥ यजां नो मित्रावरुणा । यजां देवाः ऋतं बृहत् । अग्ने यक्षि स्वं
दमम् ॥ अश्विना पिबन्तः सुतम् । दीद्यग्नी शुचि व्रता । ऋतुना यज्ञाहसा । 35

TB 2.7.12.2

द्वे विरूपे चरतः स्वर्धे । अन्याऽन्या वृथ्समुपधापयेते । हरिरन्यस्यां भवति स्वधावान् । शुक्रो
अन्यस्यां ददृशे सुवर्चाः ॥ पूर्वापरं चरतो माययैतौ । शिशू क्रीडन्तौ परियातो अद्धरम् ।
विश्वान्यन्यो भुवनाऽभिचष्टे । ऋतून्यो विदधञ्जायते पुनः ॥ त्रीणि शता त्रीषहस्राण्यग्निम् ।
त्रिंशच्च देवा नव चासपर्यन् 36

TB 2.7.12.3

औक्षन्-घृतैरास्त्वणन्-बर्हिरस्मै । आदिद्धोतारं न्यषादयन्त ॥ अग्निनाऽग्निः समिद्धयते । क्विर्-
गृहपतिर्युवा । हव्यवाङ्-जुह्वस्यः ॥ अग्निर्-देवानां जठरम् । पूतदक्षः क्विक्रतुः । देवो
देवेभिरागमत् ॥ अग्निश्रियो मरुतो विश्वकृष्टयः । आ त्वेषमुग्रमव ईमहे वयम् 37

TB 2.7.12.4

ते स्वा॒निनो॑ रु॒द्रियां॑ व॒र॒षनि॑र्णिजः । सि॒ऽहा न ह॑ष॒क्रतवः॑ सु॒दान॑वः ॥ यदु॑त्त॒मे म॑रुतो म॒द्भ्यमे॑
वा॑ । यद्वा॑ऽव॒मे सु॑भगासो दि॒विष्ठ॑ । ततो॑ नो रु॒द्रा उ॒त वा॑ऽन्वस्य॑ । अ॒ग्रे वि॒त्ताद्ध॑विषो यद्य॒जामः॑
॥ ई॒डे अ॒ग्निः स्व॑वसं॒ नमो॑भिः । इ॒ह प्र॑स॒प्तो वि॑च॒यत्कृतं॑ नः । रथै॑रिव॒ प्रभ॑रे वाज॒यद्भिः॑ ।
प्र॒दक्षि॑णिन्-म॒रुताः॑ स्तोमं॑मृ॒द्ध्याम् । 38

TB 2.7.12.5

श्रु॒धि श्रु॑त्कर्ण॒ वह्नि॑भिः । दे॒वैर॑ग्रे स॒याव॑भिः । आसी॑दन्तु ब॒र॒हिषि॑ । मि॒त्रो वरु॑णो अ॒र्यमा॑ ।
प्रा॒तर्या॑वा॒णो अ॒द्भुरम् ॥ वि॒श्वेषा॑-मदि॒तिर॒-य॒ज्ञिया॑नाम् । वि॒श्वेषा॑-मति॒थिर्-मा॒नुषा॑णाम् । अ॒ग्निर्-
दे॒वाना॑म॒व आवृ॑णानः । सु॒मृ॒डीको॑ भ॒वतु॑ वि॒श्ववे॑दाः ॥ त्वे अ॒ग्रे सु॒मतिं॑ भि॒क्षमा॑णाः 39

TB 2.7.12.6

दिवि॑ श्रवो॒ दधि॑रे य॒ज्ञिया॑सः । नक्ता॑ च च॒क्रुरु॑षसा॒ विरू॑पे । कृ॒ष्णं च॒ वर्ण॑म॒रुणं॑ च॒ सन्धुः॑ ॥
त्वा॒म॒ग्न आ॒दित्या॑स॒ आस्य॑म् । त्वां जि॒ह्वाः शु॑च॒यश्च॑क्रिरे कवे । त्वाः रा॑ति॒षाचो॑ अ॒द्भुरेषु॑ स॒श्विरे॑
। त्वे दे॒वा ह॒विर॑द॒न्त्याहु॑तम् ॥ नि त्वा॑ य॒ज्ञस्य॑ सा॒धन॑म् । अ॒ग्रे हो॒तार॑-मृ॒त्विज॑म् । व॒नुष्व॑द्-दे॒व
धी॑महि॒ प्रचे॑तसम् () । जी॒रं दू॒तम॑म॒र्त्यम् । 40

(य॒ज्ञवा॒हसा॒ - ऽस॒पर्य॑न् - व॒य - मृ॒द्ध्यां - भि॒क्षमा॑णाः - प्र॒चे॑तस॒मेकं॑ च) (A12)

2.7.13 अनुवाकं 13 - इन्द्रस्तुद्यागे ग्रहाणां पुरोरुचः

TB 2.7.13.1

तिष्ठा॒ हरी॒ रथ॑ आ यु॒ज्यमा॑ना या॒हि । वा॒युर्न॑ नि॒युतो॑ नो अ॒च्छ । पि॒बा॒स्यन्धो॑ अ॒भिसृ॑ष्टो अ॒स्मे
। इन्द्र॑ स्वाहा॒ ररि॑मा ते मदा॒य ॥ कस्य॑ वृषा॒ सुते॑ सचा॑ । नि॒युत्वा॑न् वृष॒भो र॑णत् । वृ॒त्रहा॑
सोम॑पीतये ॥ इन्द्र॑ व॒यं म॑हा॒धने॑ । इन्द्र॑म॒र्भे ह॑वामहे । युजं॑ वृ॒त्रेषु॑ वृ॒ज्जिण॑म् । 41

TB 2.7.13.2

द्वितायो वृत्रहन्तमः । विद इन्द्रः शतक्रतुः । उप नो हरिभिः सुतम् ॥ स सूर आजुनयञ्ज्योतिरिन्द्रम्
। अया धिया तरणिरद्रिबर्हाः । ऋतेन शुष्मीनवमानो अर्कैः । व्युस्त्रिधो अस्रो अद्रिर्विभेद ॥
उत त्यदाश्चश्चियम् । यदिन्द्र नाहुषीष्वा । अग्रे विश्व प्रतीदयत् । 42

TB 2.7.13.3

भरेष्विन्द्रः सुहवः हवामहे । अहोमुचः सुकृतं दैव्यञ्जनम् । अग्निं मित्रं वरुणं सातये भगम् ।
द्यावापृथिवी मरुतः स्वस्तये ॥ महि क्षेत्रं पुरुश्चन्द्रं विविद्वान् । आदिथ सखिभ्यश्च रथः समैरत्
। इन्द्रो नृभिर्जनद्दीद्यानः साकम् । सूर्यमुषसं गातुमग्निम् ॥ उरुं नो लोकमनुनेषि विद्वान् ।
सुवर्व-ज्योतिरभयः स्वस्ति 43

TB 2.7.13.4

ऋष्वा तं इन्द्र स्थविरस्य बाहू । उपस्थेयाम शरणा बृहन्ता ॥ आ नो विश्वाभिरूतिभिः सजोषाः
। ब्रह्म जुषाणो हर्यश्च याहि । वरीवृजथ स्थविरैभिः सुशिप्र । अस्मे दधद्-वृषणः शुष्ममिन्द्र
॥ इन्द्राय गावं आशिरम् । दुदुहे वज्रिणे मधु । यथ सीमुपहरेऽविदत् ॥ तास्ते वज्रिन् धेनवो
जोजयुर्नः () 44

TB 2.7.13.5

गभस्तयो नियुतो विश्ववाराः । अहरहर्भूय इज्जोगुंवानाः । पूर्णा इन्द्र क्षुमतो भोजनस्य ॥ इमां
ते धियं प्रभरे महो महीम् । अस्य स्तोत्रे धिषणा यत्त आनजे । तमुत्सवे च प्रसवे च सासहिम्
। इन्द्रं देवासः शर्वसा मदन्ननु । 45

(वज्रिणं - मयथ - स्वस्ति - जोजयुर्नः - + सप्त च) (A13)

2.7.14 अनुवाकं 14 - असोर्यामाविधिः

TB 2.7.14.1

प्रजापतिः पशून्सृजत । तैऽस्मात् सृष्टाः पराञ्च आयन् । तानग्निष्टोमेन नामोत् । तानुक्थ्येन नामोत् । तान्थ षोडशिना नामोत् । तान्नात्रिया नामोत् । तान्थ सन्धिना नामोत् । सौऽग्निमब्रवीत् । इमान्म ईप्सेति । तान्गिस्त्रिवृता स्तोमेन नामोत् 46

TB 2.7.14.2

स इन्द्रमब्रवीत् । इमान्म ईप्सेति । तानिन्द्रः पञ्चदशेन स्तोमेन नामोत् । स विश्वान् देवानब्रवीत् । इमान्म ईप्सेति । तान् विश्वे देवाः सप्तदशेन स्तोमेन नामुवन् । स विष्णुमब्रवीत् । इमान्म ईप्सेति । तान् विष्णुरेकविंशेन स्तोमेनामोत् । वारवन्तीयेनावारयत () 47

TB 2.7.14.3

इदं विष्णुर् विचक्रम इति व्यक्रमत ॥ यस्मात् पशवः प्र प्रेव भ्रशेरन् । स एतेन यजेत ॥ यदामोत् । तदसोर्यामस्यासोर्यामत्वम् ॥ एतेन वै देवा जैत्वानि जित्वा । यं काममकामयन्त तमामुवन् । यं कामं कामयते । तमेतेनामोति । 48

(स्तोमेन नामो - दवारयत - +नव च) (A14)

2.7.15 अनुवाकं 15 - राजाभिषेकः

TB 2.7.15.1

व्याघ्रोऽयमग्नौ चरति प्रविष्टः । ऋषीणां पुत्रो अभिशस्तिपा अयम् । नमस्कारेण नमसा ते जुहोमि । मा देवानां मिथुया कर्म भागम् ॥ सावीरहि देव प्रसवाय पित्रे । वर्ष्माणमस्मै वरिमाणमस्मै । अथास्मभ्यः सवितः सर्वताता । दिवे दिव आसुवा भूरिपश्वः ॥ भूतो भूतेषु चरति प्रविष्टः । स भूतानामधिपतिर्बभूव 49

TB 2.7.15.2

तस्यै मृत्यौ चरति राजसूयम् । स राजा राज्य-मनुमन्यतामिदम् ॥ येभिः शिल्पैः पप्रथानामदहत्
। येभिर्द्रव्यामभ्यपिशत्-प्रजापतिः । येभिर्वाचं विश्वरूपाः समव्ययत् । तेनेममग्न इह वर्चसा
समङ्गिध ॥ येभिरादित्यस्तपति प्रकेतुभिः । येभिः सूर्यो ददृशे चित्रभानुः । येभिर्वाचं पुष्कलेभिरव्ययत्
। तेनेममग्न इह वर्चसा समङ्गिध । 50

TB 2.7.15.3

आऽयं भातु शर्वसा पञ्च कृष्टीः । इन्द्र इव ज्येष्ठो भवतु प्रजावान् । अस्मा अस्तु पुष्कलं चित्रभानु
। आऽयं पृणक्तु रजसी उपस्थम् ॥ यत्ते शिल्पं कश्यप रोचनावत् । इन्द्रियावत्-पुष्कलं चित्रभानु
। यस्मिन्ध सूर्या अर्पिताः सप्त साकम् । तस्मिन्-राजान्-मधिविश्रयेमम् ॥ द्यौरसि पृथिव्यसि ॥
व्याघ्रो वैयाघ्रेऽधि 51

TB 2.7.15.4

विश्रयस्व दिशो महीः । विशस्त्वा सर्वा वाञ्छन्तु । मा त्वद्-राष्ट्रमधिभ्रशत् ॥ या दिव्या आपः
पयसा संभ्रूवुः । या अन्तरिक्ष उत पार्थिवीर्याः । ता सां त्वा सर्वासा रुचा । अभिषिञ्चामि
वर्चसा । अभि त्वा वर्चसा सिचं दिव्येन । पयसा सह । यथाऽऽसां राष्ट्रवर्द्धनः 52

TB 2.7.15.5

तथा त्वा सविता करत् । इन्द्रं विश्वा अवीवृधन् । समुद्र व्यचसं गिरः । रथीतमः रथीनाम्
। वाजानाः सत् पतिं पतिम् । वसवस्त्वा पुरस्तादभिषिञ्चन्तु गायत्रेण छन्दसा । रुद्रास्त्वा
दक्षिणतोऽभिषिञ्चन्तु त्रैष्टुभेन छन्दसा । आदित्यास्त्वा पश्चादभिषिञ्चन्तु जागतेन छन्दसा । विश्वे
त्वा देवा उत्तरतोऽभिषिञ्चन्-त्वानुष्टुभेन छन्दसा । बृहस्पति-स्त्वोपरिष्ठा-दभिषिञ्चन्तु पाङ्गेन छन्दसा
। 53

TB 2.7.15.6

अरुणं त्वा वृकमुग्रं खजं कुरम् । रोचमानं मरुतामग्रे अर्चिषः । सूर्यवन्तं मधवानं विषासहिम् ।
। इन्द्रमुक्थ्येषु नामहूतमः हुवेम ॥ प्र बाहवांसिसृतं जीवसे नः । आ नो गव्यूतिमुक्षतं घृतेन
। आ नो जनैश्चवयतं युवाना । श्रुतं मे मित्रावरुणा हवेमा ॥ इन्द्रस्य ते वीर्यकृतः । बाहू
उपावहरामि () । 54

(बभू - वाव्ययत् तेनेममग्र इह वर्चसा समङ्गिध - वैयाग्रेऽधि - राष्ट्रवर्द्धनः - पाङ्केन छन्दसो
- पावहरामि) (A15)

2.7.16 अनुवाकं 16 - राजाभिषेकाङ्गं रथारोहणम्

TB 2.7.16.1

अभि प्रेहि वीरयस्व । उग्रश्चेत्तां सपत्नहा ॥ आतिष्ठ वृत्रहन्तमः । तुभ्यं देवा अधिब्रवन् ॥
अङ्गौ न्यङ्कावभितो रथं यौ । ध्वान्तं वाताग्रमनुसं चरन्तौ । दूरे हेति-रिन्द्रियावां पतुत्री । ते
नोऽग्नयः पप्रयः पारयन्तु ॥ नमस्त ऋषे गद । अव्यथायै (अव्यथायै) त्वा स्वधायै त्वा 55

TB 2.7.16.2

मा न इन्द्राभितुस्त्व-दृष्वारिष्टासः । एवा ब्रह्मन्तवेदस्तु ॥ तिष्ठा रथे अधि यद्-वज्रहस्तः ॥ आ
रश्मीन्देव युवसे स्वध्वः ॥ "आतिष्ठ वृत्रहन् 29", "नातिष्ठन्तं परि 30" । "अनु त्वेन्द्रो मदु 31]".
"त्वनु त्वा मित्रावरुणौ 32" ॥ द्यौश्च त्वा पृथिवी च प्रचेतसा । शुक्रो बृहद्-दक्षिणा त्वा पिपर्तु
। अनु स्वधा चिकिताः सोमो अग्निः । अनु त्वाऽवतु सविता सुवेन । 56

TB 2.7.16.3

इन्द्रं विश्वा अवीवृधन् । समुद्र व्यचसं गिरः । रथीतमः रथीनाम् । वाजानाः सत् पतिं पतिम्

॥ परिं मा सेन्या घोषाः । ज्यानां वृञ्जन्तु गृद्धवः । मेथिष्ठाः पिन्वमाना इह । मां गोपतिमभि
सम्विशन्तु ॥ तन्मेऽनुमति-रनुमन्यताम् । तन्माता पृथिवी तत् पिता द्यौः 57

TB 2.7.16.4

तद्वावाणः सोमसुतो मयोभुवः । तदश्विना शृणुतः सौभगा युवम् ॥ "अवते हेड 33", "उदुत्तमम्
34" ॥ एना व्याघ्रं परिषस्वजानाः । सिहः हिन्वन्ति महते सौभगाय । समुद्रं न सुहवं
तस्थिवांसम् । मर्मज्यन्ते द्वीपिनमस्वन्तः ॥ उदसावेतु सूर्यः । उदिदं मामकं वचः । उदिहि
देव सूर्य () । सह वयुना मम । अहं वाचो विवाचनम् । मयि वागस्तु धर्षसिः । यन्तु नदयो
वरुषन्तु पर्जन्याः । सुपिप्पला ओषधयो भवन्तु ॥ अन्नवतामोदुनवतामामिक्षवताम् । एषा राजा
भूयासम् । 58

(स्वधायै त्वा - सुवेन - द्यौः - सूर्य सप्त च) (A16)

2.7.17 अनुवाकं 17 - राजाभिषेकाङ्गं वपनम्

TB 2.7.17.1

ये केशिनः प्रथमाः सत्रमासत । येभिराभृतं यदिदं विरोचते । तेभ्यो जुहोमि बहुधा घृतेन ।
रायस्पोषेणेमं वर्चसा सःसृजाथ ॥ नते ब्रह्माणस्तपसो विमोकः । द्विनाम्नी दीक्षा वशिनी ह्युग्रा
। प्रकेशाः सुवते काण्डिनो भवन्ति । तेषां ब्रह्मेदीशे वपनस्य नान्यः ॥ आरोह प्रोष्ठं विषहस्व
शत्रून् । अवासाग्दीक्षा वशिनी ह्युग्रा 59

TB 2.7.17.2

देहि दक्षिणां प्रतिरस्वायुः । अथा मुच्यस्व वरुणस्य पाशात् ॥ येनावपथ सविता क्षुरेण ।
सोमस्य राज्ञो वरुणस्य विद्वान् । तेन ब्रह्माणो वपतेदमस्योर्जेमम् । रय्या वर्चसा सःसृजाथ ॥
मा ते केशाननु गाद्वर्च एतत् । तथा धाता करोतु ते । तुभ्यमिन्द्रो बृहस्पतिः । सविता वर्च

आदधात् । 60

TB 2.7.17.3

तेभ्यो॑ नि॒धानं॑ बहु॒धा व्यैच्छन् । अ॒न्तरा॑ द्यावा॑पृथि॒वी अ॒पः सु॒वः । दु॒र्भस्त॑म्बे वी॒र्य॑कृ॒ते नि॒धाय॑ ।
पौ॒ऽस्ये॑नेमं॒ वर्च॑सा॒ स॒ऽसृ॑जाथ ॥ बलं॑ ते बाहु॒वोः सं॒वि॒ता द॑धातु । सोम॑स्त्वाऽन॒क्तु प॑यसा घृ॒तेन॑
। स्त्रीषु॑ रू॒पम॑श्चि॒नैत॒न्नि॒धत्त॑म् । पौ॒ऽस्ये॑नेमं॒ वर्च॑सा॒ स॒ऽसृ॑जाथ ॥ यथ् सी॒मन्तं॑ क॒ङ्क॒तस्ते॑ लि॒लेखं॑
। यद्वा॑ क्षुरः॒ परि॑व॒वर्ज॑ वप॒ऽस्ते () । स्त्रीषु॑ रू॒पम॑श्चि॒नैत॒न्नि॒धत्त॑म् । पौ॒ऽस्ये॑नेमं॒ स॒ऽसृ॑जाथो
वी॒र्येण॑ । 61

special korvai

(ये केशिनो नर्ते मा ते बलं यथ् सीमन्तं पञ्च)
(अवासाग्दीक्षा वाशिनी ह्युग्रा-ऽऽदधाद्-ववर्ज वपस्ते द्वे च) (A17)

2.7.18 अनुवाकं 18 - विद्यनाख्य एकाहविशेषः

TB 2.7.18.1

इन्द्रं॑ वै स्वा॒ विशो॑ म॒रुतो॑ नापा॒चाय॑न् । सोऽन॑पचाय्यमान ए॒तं वि॑घ्नम॑पश्यत् । तमाऽह॑रत् ।
तेना॑यजत । तेनै॒वासां॑ त॒ऽस॒स्त॑म्भं व्य॒हन् । यद् व्य॑हन् । तद्-वि॑घ्नस्य॑ विघ्न॒त्वम् ॥ वि॒
पा॒प्मानं॑ भ्रातृ॒व्य॒ हते॑ । य ए॒तेन॑ यज॑ते । य उ॑ चैनमे॒वं वेद॑ । 62

TB 2.7.18.2

य॒ऽराजा॑नं॒ विशो॑ नाप॒चाये॑युः । यो वा॑ ब्राह्म॒णस्त॑मसा पा॒प्मना॑ प्रावृ॒तः स्यात् । स ए॒तेन॑
यजे॑त । वि॒घ्नेनै॒वैन॑द्-वि॒हत्य॑ । वि॒शामा॑धि॒पत्यं॑ गच्छति ॥ तस्य॑ द्वे द्वा॒दशे॑ स्तो॒त्रे भव॑तः ।
द्वे च॑तुर्वि॒ंशे । औ॒द्भि॒द्यमे॒व तत् । ए॒तद्वै क्षु॒त्रस्यो॑द्भि॒द्यम् । यद॑स्मै स्वा॒ विशो॑ ब॒लिः ह॑रन्ति । 63

TB 2.7.18.3

हरन्त्यस्मै विशो बलिम् । ऐनमप्रतिख्यातं गच्छति । य एवं वेद ॥ प्रबाहुग्व अग्रे क्षत्राण्यातेपुः । तेषामिन्द्रः क्षत्राण्यादत्त । न वा इमानि क्षत्राण्य भूवन्निति । तन्नक्षत्राणां नक्षत्रत्वम् । आश्रेयसो भ्रातृव्यस्य तेजं इन्द्रियं दत्ते । य एतेन यजते । य उ चैनमेवं वेद । 64

TB 2.7.18.4

तद् यथा ह वै संचाक्रिणौ कल्लकावुपा-वहितौ स्याताम् । एवमेतौ युग्मन्तौ स्तोमौ । अयुक्षु स्तोमेषु क्रियेते । पाप्मनोऽपहृत्यै ॥ अपं पाप्मानं भ्रातृव्यं हते । य एतेन यजते । य उ चैनमेवं वेद ॥ तद् यथा ह वै सूतग्रामण्यः । एवं छन्दांसि । तेष्वसावादित्यो बृहतीरभ्यूढः 65

TB 2.7.18.5

सुतोबृहतीषु स्तुवते सुतो बृहन् । प्रजयां पशुभि-रसानीत्येव ॥ व्यतिषक्ताभिः स्तुवते । व्यतिषक्तं वै क्षत्रं विशा । विशैवेन क्षत्रेण व्यतिषजति ॥ व्यतिषक्ताभिः स्तुवते । व्यतिषक्तो वै ग्रामणीः संजातैः । सजातैरेवेन व्यतिषजति ॥ व्यतिषक्ताभिः स्तुवते । व्यतिषक्तो वै पुरुषः पाप्मभिः () । व्यतिषक्ता-भिरेवास्य पाप्मनो नुदते । 66

(वेद - हरन् - त्येनमेवं वेदा - भ्यूढः - पाप्मभिरेकं च) (A18)

PrapAtaka Korvai with starting words of 1 to 18 anuvAkams :-

(त्रिवृद् - यदाग्रेयोऽग्निमुखा हृद्धिर् - यदाग्रेय आग्रेयो - न वै सोमेन - यो वै सोमे - नैष गोस्रवः - सिंहे - ऽभिप्रेहि मित्रवर्द्धनः - प्रजापतिस्ता ओदुनं - प्रजापतिरकामयत बहोर् भूया - नृगस्त्यो - ऽस्याजरांस - स्तिष्ठा हरी - प्रजापतिः पशून् - व्याघ्रोऽयम् - भिप्रेहि वृत्रहन्तमो - ये केशिन - इन्द्रं वा अष्टादश)

2.7 द्वितीयाष्टके सप्तमः प्रपाठकः - सवा एकाहविशेषाः <https://www.vedavms.in> 133

korvai with starting words of 1, 11, 21 series of daSinis :-

(त्रिवृद् - यो वै सोमे - नायुरसि विश्वायुर् - बहुर भवति - तिष्ठा हरी रथ - आऽयं भातु - तेभ्यो निधानः षट्षष्टिः)

first and last word 2nd aShTakam 6th prapAtakam :-

(त्रिवृत् - पाप्मनो नुदते)

॥ हरिः ॐ ॥ ॥ कृष्ण यजुर्वेदीय तैत्तिरीय ब्राह्मणे द्वितीयाष्टके सप्तमः प्रपाठकः समाप्तः ॥

Appendix (of Expansions) ट.भ.2.7.8.1 "अङ्घ्रौ न्यङ्कावभित्27 अङ्घ्रौन्यङ्का वभितो रथं यौ ध्वान्तं वाताग्रमनु सचरन्तौ दूरे हेतिरिन्द्रियावांन् पतन्नी ते नोऽग्रयः पप्रयः पारयन्तु ॥ 27 (Appearing in T.S. 1.7.7.2), (Also same appearing above, in T.B.2.7.16.1)